江蘇地方文獻叢書




**装幀設計** 郭寶林



## 主編 薛正興







江蘇地方文獻叢書

### 圖書在版編目(CIP)數據

寒山寺志/(民國)葉昌熾撰;張維明校補. - 南京:江 蘇古籍出版社,1999.8

(江蘇地方文獻叢書/薛正興主編) ISBN 7-80643-224-8

I. 寒… II.①葉… ②張… II. 寺廟、寒山寺 - 名勝古迹 - 江蘇 - 蘇州市 - 史料 IV. K928.75

中國版本圖書館 CIP 數據核字(1999)第 35086 號

### 寒山寺志

著作者 (民國)葉昌熾 撰 張維明 校補

責任編輯 吴偉斌

出版發行 江蘇古籍出版社

發行部電話 025-3223462

社 址 南京市中央路 165 號 郵編 210009

經 銷 江蘇省新華書店

照 排 南京理工排版校對公司

印刷者 揚中市印刷廠 郵編:212200

開 本 850×1168

印 張 6

印 數 1-4000 册

字 數 114 千字

版 次 1999年8月第1版第1次印刷

標準書號 ISBN 7-80643-224-8/K·84


定 價 8.00元

(江蘇古籍版圖書凡印裝錯誤可向承印廠調换)

成久陽應完 花城書唐張 從石中 逐松音中計 维根稿在白 己且重偽征定从政的



罗聘绘寒山拾得像碑






枫桥铁铃关






大雄宝殿



江村桥



寒山寺钟楼



寒山寺普明宝塔

# 《江蘇地方文獻叢書》編輯說明

參考。 精神、建設社會主義新江蘇、都是不可或缺的。 者,提供一套比較完整的江蘇地方文獻的基本資料,以供分析研究和閱讀 方文獻叢書》,就是爲了給文史研究工作者、大中學校師生及有關文化 地利用這份珍貴的文化遺産,對於發展和繁榮民族新文化、發揚愛國主義 江蘇自古以來爲人文薈萃之地,流傳至今的文獻典籍浩如烟 我們編輯出版這套《江蘇 海。 工作 充分 地

史、譜牒、志乘之珍品,少數著名的總集及影響較大的方志、日記、傳記也酌 教育、科學、文化、地理、風物、習俗、掌故等内容的筆記、雜記、游記、野 《江蘇地方文獻叢書》將有選擇地出版記述江蘇歷史上政治、 經

編輯説明

量收入。

本爲底本,一般均作必要的校勘,并加新式標點,有少數品種也將采用今人 《江蘇地方文獻叢書》根據具體情况,分别采用未刊稿本、鈔本或舊刻

新注的形式。

江蘇古籍出版社

一九九九年一月

\_

總

目

目

卷二

志	志	志	志兴	志安
志事第九	志游第、	志産第七	志僧第六	志碑第五
	八:			
六	五七七	: 五.	<b>:</b> 四	三六
五.	七	_	八	六

卷三

志詩第十 …………………… 七七

附《寒山子詩集》解題及諸家書牘、詩話、序、跋、考證………………… 11二

附寒、拾事迹 …………………………………………………………… |○|

附録	志碑續補	志鐘續補	文震孟《寒山寺重建大雄殿記》	明姚廣孝《寒山寺重興記》	寺記輯存	志塔	程德全序	《寒山寺志》初稿輯存	
	_	_	_			_	-		

總

寒山寺楹聯輯存 ......

楓橋歷代宅第園林 ......

 $\equiv$ 

五. 五.

五.四

四九

四七

四三

四二

三 三 八

修志紀事輯自《緣督盧日記鈔》	敢樓鐵鈴關
修志紀事輯自《緣督盧日記鈔》	敵樓鐵鈴關

# 枚 補 説 明

産、軼聞掌故、寒拾事迹等,體例精當,史料翔實,文字典雅,被推爲蘇州寺園小 志中的上乘之作。 寒山寺志》三卷,葉昌熾撰。 所記寺院變遷、詩詞記文、佛像鐘碑、僧人寺

寺院 有七楹副殿。 嘉祐(一〇五六—一〇六三)中,賜號普明禪院。 唐貞觀(六二七一六四九)中,天台高僧寒山、拾得曾止於此,故名寒山寺。北宋 水陸二支直通正側院門。 見當時楓橋寺的概貌:寺院呈長方形,四周墻垣峻起,山門西向。運河、官塘分 不可詳考,一説始於梁天監(五〇二—五一九)間。舊名妙利普明塔院。相傳 《坐落在蘇州閶門外七里古運河畔,比鄰楓橋,曾稱楓橋寺。 其創建年代已 寒山寺是我國著名的江南古刹,因唐人張繼《楓橋夜泊》一絶而名揚中外。 據《吴郡志》卷三十三引紹興十六年(一一四六)孫覿《楓橋寺記》 進山門,過小橋,便是七楹正殿,兩側爲三楹廡殿,後 從南宋《平江圖》碑上,可以考

寺内 巡 撫陳夔龍等籌款集資,拓門構堂,鑄鐘築樓,稍謀興復。 廢。嘉靖(一五二二— 塔臨官道 載 通 (一八六○),清軍縱火,殿宇樓閣蕩爲烟埃。光緒三十二年(一九○六),江蘇巡 撫 1、疑即水陸院。整座寺院規制嚴整,規模宏大。 元人湯仲 程 正有寶塔 「太平興 德全、布政使陸鍾琦等又募修擴建,重構大殿,翼以樓亭迴廊,題額「古 ?,三門背運河。」景觀依然。 國 初,節度使孫承祐重建浮圖七成,寺有水陸院, 座。 旁有 一五六六)中所鑄巨鐘,也因 一殿堂,坐北朝南,面 元末,寺塔俱毁。 闊三間,高敞宏偉 遇倭變而銷爲 明、清間,寒山寺屢經 宣統三年(一九一一), 友有咏寺詩云: 嚴麗! 炮。 前 靚 咸 與 深。」圖 豐十 水 道 年 興 孤 相

貴花 法家 寺院 鐘 寒 房 山寺」,初步形成了現在的 等主 張樗寮的行書《金剛般若波羅密經》及董其昌、林則徐等人的題跋,共三十 木。 現 新 有 中 大雄 紺 要 或 宇蒼林,古樸莊 建 成 築。庭院裏 立 寶 殿、 後,寒山寺經多次修葺,已被列爲江蘇 廡殿 栽 羅 重。 植 漢堂、藏經樓寒拾殿 形 日 制 寺 本各界友好代 ·内文物薈萃,尤以石刻 表團贈送的 鐘 樓、楓 省重點 和 樱花 江樓、霜 古鐘著名。 樹、 文物保 鐘 五葉 閣、碑 護 松等名 南宋書 單 廊 位

焯指繪《寒山子像》刻石,也是不可多得的珍品。 文徵 光 補 八 夜,中外游人滙 111 緒 民 再 シ康 石 搜索甚力,而遂不能得焉!乃將新鑄一鐘,資往懸之。」(詳見卷後《志鐘續 高明、 唐· 捐鑄 堪 到 三十二年(一八〇六)鑄造的鐵鐘,外徑達一百二十餘厘米。 有 不 稱稀世之珍。 爲賦 空空。」(詳見卷後《志碑續補》)鐘銘詩碑,令人沉思。 ,上有伊藤博文所撰的銘文:「嘗聞寺鐘轉入我邦,今失所 寅、鄧石如、康有爲等人的 詩云: 聚寺院,聆聽鐘聲,辭舊 「鐘聲已渡海雲東,冷盡 俞樾手書《楓橋夜泊》詩碑,譽爲翰墨之寶。 碑刻,以及羅聘所繪《寒山拾得像》、鄭文 迎 新 寒山古寺風。勿使豐干又饒舌,他 大雄 寶殿内所 今鐘樓所懸,即 置銅鐘、係日 此 每逢除夕之 在 外 岳 H 形、 本 寒

多 而 己。 得 難 一醉裏 以 計數。 看題 壁, 然而, 如 今張繼多」。 能搜討故實、 古往今來, 修志傳世者, 關於 楓橋寒山寺的詩賦記文, 至今仍只有葉昌熾一人

縣(今蘇州市)人。光緒二年(一八七六)舉人,十二年一甲進士。 葉昌 熾(一八四七— 一九一七),字鞠裳, 號緣督,晚署寂鑒遺民,江蘇長洲 歷任翰林院侍

校補

説明

淵博 旗,長 定。 裳批 至今 院 廬 鄭 其 署。次年,葉昌熾據舊稿 所改易,致使葉昌熾深懷 而尤擅詞。 格,字叔問,又字俊臣,號 文 而 日 世交吴 或 焯 鄭文焯(一八五六—一九一八),奉天鐵嶺人,自言高密鄭玄後裔 記 仍完 作 校。」書稿 史館 期 鈔 批 僑 長 》、《奇觚廎詩文集》等。《寒山寺志》是他應程德全之請 縣 好 注 初稿纂成於宣統三年(一九一一)六月,由程德全延請 提 版 寓蘇州。 著有《 無 的 潘 本、金石之學。 調 氏 内 正文二十四頁,程德全序二頁。 損 、會典館幫總纂、甘肅 地 容 刊 大鶴 保 刻 真 學問博 行 存 相 山房 世。 後 在 整理修訂。 小坡、瘦碧、大鶴山人。光緒元年舉人。隷籍漢 不 蘇 人讀之,每以 但 滿。時值辛亥革命前 全集》。 洽,經義 著有《藏 州博物館。封 刻 本僅載 可惜生前未 訓詁、 對於《寒山寺志》初稿,鄭文焯眉批墨 書紀事詩》、《語石》、《邠州石室録 學政、江蘇 葉氏對「高密某 爲 、六書、 面 憾。 題 半頁十一行,行二十三格。 簽: 金石、醫經樂律書畫 能付梓,直 慶 夕,政局 存古學堂史學總教 幸 「寒 的 公」的 Ш 是,初稿 動 寺稿本,文 至 蕩 一九二二年,才由 批 ,稿本也就留存府 本 駁 ,爲紀念募 名 竟 之辭 等職 士 ,無一不精, 小 歷 鄭 前 ×, 坡 劫 文 幼 公、 葉 鞠 不滅 修 緣 卷次 不見 名 焯 黄 豫 厘

直 致 事 Ŧī. 一、志碑 迹、 有 日爲: 書其名其 四端 寒 Ш 第六、卷第二志僧第七、志游 程 詩集題辭。 職 序、自序、卷第一志橋第一、志寺第二、志塔第三、志象第 一、篇 并 標 目内容 明 朝 稿 「擬删易,二、各篇後 代,四、碑帖 本 内 還 夾有箋條。 無須 第 八、志事第九、志詩第十、卷第三附 照本 鄭文焯的 小 序 提行。至於直斥陳夔龍 擬 删 批注 削,三、臨文不 、除修辭、考補 避 四、 尊長,應 則 志 外,大 寒拾 題 鐘 第 跋

爲

至

無味」,其傲

然耿

介,由此

可見一

斑。

文,則 馨 及 祐 歸 熾 有 等人 》、《修 令寺 文 獻 我 盡 卷第二」,而「潘 記 們這 的 資料,增纂《 志紀 畦 力 輯 批 集」作 覆 存 語一一輯 次 核 事 × 原著、 》等。 《鐘 二旦畦 整 理 補 碑 原物 , 人校記。 拾遺補闕,以備考閱 氏 編》、《附 續 即 集」,以 刻 補 以 及有 本 ×, « 潘 及 氏 録 則將「志詩第十」歸 楹 粥 兩 刻本爲底本,參 〉各一 文獻。 稿 聯輯 些避 本卷次略 篇 存》、《 諱 書 字,則 收 中 楓 録 有 個 橋 1 不同 校了初稿本,并將鄭文焯、葉昌 隨 别 歷代宅第園 初 人「卷第三」。 文 明 稿 徑 顯 本 改。同時 的 初 的 筆誤,如「 稿 程《 本」的 林 序 根 對 × \* 於 志 據 張 ^ 敵 志 書 實 枯」作「張 詩第十 樓鐵 中的 塔》,還 地 考察 鈴 引

此一并致謝。 市民族宗教事務處、市佛教協會、寒山寺、市舊城建設辦公室等單位的幫助,於 在本書的整理出版過程中,曾得到蘇州博物館、市政協文史資料委員會、 校補中的舛誤,祈望讀者不吝指正。

張維明 一九八七年六月於蘇州

### 自字

與」、「法螺」之院、「落木」之庵、鐘梵銷沈、蘿蒿塞徑、未有過而問者。 輪 聞异詞,靈踪儻夢,不可得詳。其時吾郡適經毗嵐之劫,金閶十里,一炬靡遺,飆 先擔笠至吴也。然《太平廣記》引《仙傳拾遺》,又謂其大曆中隱天台翠屏山。 傳》及宋沙門志南《三隱集記》,其人當在貞觀初,安得元和時尚住世?亦未聞 游 書得明師道衍《記》(二),謂「唐元和中,有寒山子,掣風掣顛,來此縛茆以居。 惕若,退而搜討文獻,咨於故實。嘗棹扁舟,出游郊郭。問所謂「寒山寺」者,斷 同治辛未,先師 在空,刹幢摧倒。 天台寒岩,與拾得、豐干爲友,終隱而去」。 竊考寒山行業,見於閭邱《詩集 頹垣,鞠爲茂草。 楓 江之側,俠橋 馮林一宮允重修《蘇州府志》,授簡昌熾,以釋道之宮見屬。奉命 今雖承平日久,自城以西,精藍名刹,近如「積善」,遠如「吾 爲市。橋南有寒山寺,襟帶通衢,烟波明瑟,唐以前古 無論宋碑不可得,即文、唐兩碣,亦淪於灌莽之中。惟從故 惟此寺華 [刹也。 傳

自

序

《昭慶寺志》之例,拾遺補闕,輯爲此篇。回憶四十年前,校邠廬中,師友觀摩之 遠人也。昌熾不敏,幸睹勝因,頌告甫之清風,際《斯干》之良日,謹援西湖理安 環結佩,往往以瓶鉢之勝緣,爲敦槃之談助,廢而罔舉,語焉弗詳,皆非所以示 嚴樓閣,一刹那間,彈指涌現。 識,皆宜歡躍贊嘆。見仁見知,本無了義。 獻,又何裨於萬一?雖然,龍象中興,金湯攸寄,檀度因緣,功德 可感也已。 樂,惘惘如夢。同時纂修諸君子,皆墓有宿草。即昌熾亦老且病,俯仰今昔,其重 風、保存古迹哉?蓋以唐賢篇什,煊赫人口,海舶流傳,鷄林摹印。瀛寰人士,攬 丞雲陽程公謀於陸申甫方伯,又拓而新之,輪焉奂焉, 閎規大起,豈惟是暢導宗 嗟夫!以炳燭之餘光,續然燈之墜緒,咫聞謏見,非踳則訛,鄉邦文 前中丞今直隷制府貴陽陳公三三經始版築,今中 拈起鈍帚,何必放下。 無量。 時宣統三年, 凡有知

### 自序校記

歲在辛亥,六月既望,長洲葉昌熾謹記(三)。

道。 成祖用兵有天下,道衍力爲多。永樂二年四月,拜資善大夫、太子少師。帝與語,呼少師 而不

名。」本書諸篇亦皆作「少師」,則此處疑脱「少」字。 初稿本「貴陽陳公」、「雲陽程公」、「宛平方伯」(刻本改作「陸申甫方伯」)上均空一格。 姚廣孝《寒山寺重興記》見書後《補編

 $\equiv$ 記 鄭文焯(下簡稱鄭氏)眉批:「刻書不須空一格。」刻本未空格。 初稿本此後列卷次篇目:

 $\subseteq$ 

貴陽陳公

卷第一

志寺第二

志橋第一

志塔第三

志象第四

志鐘第五

卷第二 志碑第六

志僧第七

自

序

志事第九 志游第八

寒山寺志

寒拾事迹

志詩第十

鄭氏眉批:「擬删易。」寒山詩集題辭

來,圜 能 沈 守 邦 從 又 行 風 起, 沈戟 卷。 文 諸 千里,吴、越一家,老、韓同傳,人其 禁其不出,即不能禁其無所改竄,以昌熾冗長潦 拓 日 獻 : 大夫之後。 余 示 梵 橋 歸 甫脱稿,中丞即索觀甚急。 碑文、商権條例、郵筒奔走、幾於置驛。纂成《寺志》十篇、附録二篇、次爲 ,徵求故實。歸而陳書發篋,屬辭比事。 門,白微高 天 辟雍,淪 與其進也,不與其退也。」夫以岩岩具瞻,建牙開府,朝廷畀以封疆之 田後, 、樓閣,皆成劫灰」,一寺之興廢又何與?雖然,此稿 鄉居養拙,未嘗一過 雲陽中丞下車之始,保存古迹, 爲草莽,詩書之禍,烈於秦燔,一書之存亡何與? 揭,而 此稿遂陸沈不 維時在宣統辛亥秋仲,天 州 謂 門。 出矣!嗚呼! 我 何? 先 顧 以 又 既 可園校事牽率,扁 聖云:「不 倒,世所 唇同 **葦寒山寺落成,以昌熾粗** 自 年陸文節公暨何筱雅 先 共弃之人,附驥 聖 地 逆詐,不億不信。」 固尚 哲王開天明道 傾覆,武昌變起, 舟往 存也, 异日不 佛經謂「毗嵐 來,亦時 尾 知鄉 以 太 而

子登高節,寂鑒遺民書於花橋老屋,時年六十有四。 南園之記,遂移北山之文,直道猶存,人心不死,鄙人雖蒙大詬,固所願焉!壬 舊稿,録而存之,篇第字句,皆有移易,獨於書法,悉仍舊文。 若後有君子,等於 决幾而作,不俟終日,亦豈依阿淟涊之士所能者?兩賢之盛心,何可負也。爰出 恭,此寺因緣,華藏海中一刹塵耳。今文節臨危授命,大節磊磊軒天地,即太守 寄,國民恃爲政令之源。文字諈諉,又不等於竿牘,悠悠蒼天,孰究其後?當難 之未作也,中丞坐鎮於上,文節與筱雅同年承流宣化於下,凡百庶事,同寅協

俟來哲。 初無恩怨。 五德終始,知定論之難憑,六家源流,又要旨之各异。儒墨各一,是非牛李, 匪高蹈海之節。庾元規塵起,既無汚我之嫌,羊叔子使來,安有酖人之意? 拙政自安者,無預當世之理亂。 或謂此序扞冒時忌,可以不出,余謂不然。 疆學爲義者,不徇一姓之廢興, 閎達君子,其何責焉?小春朔日,緣裻再識。 方今輿論自由,昌言無諱,豈有文字,遂挂網羅?知我罪我,敬 鄙人惸獨殘年,飾巾待逝,但守移山之愚,

**篤信航頭古文,驚怖閻、胡、江、孫諸家,若避大厲。始知稽天巨浸,望羊向若,不** 述之事、各有體裁、根柢古誼、深通流 睹。章左司亦有《宿寒山寺》詩。「寒山」之名,兩賢又何以不謀而 口 肓 之學,引 亦在二十里外。此寺非依山構宇,但可遠眺,張懿孫當日泊舟橋下,不容懵 不過一荒寒之山寺」。敬聞命矣!楓橋負郭,劫後荒涼,誠 事計偕,未嘗易一刺、同一尊。中丞不察,遽以 載。 市也。「昌門何峨峨、飛閣跨通波」,見於陸士衡詩。 而 起廢 笑置之,但文章天下之公器,亦未可以默 筱雅仁兄同年大公祖 鄙 繩 疾,高密家風,曷勝愧服。某君爲貴公子,爲諸侯上客,僑寓 人束髮論交,亦頗有介紹者,但以後門寒素,自慚形穢。 而批 报 也。 昔在 執事: 里中,見一士,號能詩,而 頃誦 略,閉門造車,出門合轍,非可 惠簡,并拙 拙 爾也。某君 稿 稿一 相就正,宜遭有道之訶譴。本 不知《御覽》爲 册,敬悉。某君簽駁,針 靈岩、支硎諸峰,至近者 謂 寒 非昔比,從前 山寺、「羌無故實、 合也?大抵 里社 何 以 吴閶 書。 章 文 固五 句 酒、公 又有 聲 然 垂 都 病 撰 無 几

序

官、年 書 繼 宗 開 遺,安用志爲? 過 志 心 迹 簿 兼 史,提綱挈領 一、獨 井蛙 法 風 又詳於郡志 有 Ш 録 一牛鳴 詩。寒、拾因緣,尚 門庭,標舉職 小説、游記、詩話、語録 敬 寐 月,義例 不 而 因方爲主,遇 政棋。 佩良箴, 寤 過 地耳。 始 付諸 色 、體約 聞 即 降而 駭 武林湖 老衲 但未 若論 海 有 也 志。即 0 内通 牴 不 員 丈 蕪。 古今 敢鐭舟以求 牾 封域 鄉、 成壁 上諸刹 在傳 無關 如吾蘇,訪靈岩者,考吴宫之遺迹 人之謦咳 室 7,但樹 撰《一 圖 一鎮、一 臨 無 四家之體,咨於故實,稍整齊 疑之列。此志自當因詩起義,博采遺 經 風 宏指 ,若唐之《括地志》、《元和郡 如 一定之體也。 統志》者 聊資談 一界相碑,若論文法,但作一 ,輒掉眩不自禁。幸告中丞,善爲藏拙 靈隱、昭慶之類,寺各有志,志自爲體 劍 蓋 Ш 耳。 與地志 弟藏 水,更不得援此爲例。 柄 ,固當奉爲 未敢自附 書既 寒山 不同,尤未可 鮮 劫 老而 先 火婁經,刹 作者 河 之則 健忘, 游鄧 之林也。 繩 郡 縣 可。 志當 志 以 游 尉者 》,宋 掇拾叢殘,等於 史 竿不墜,祇 至 記 聞, 於 詳 例。某君 至 即 年來戲 述 寒山 之王 於姓氏 旁搜教 於 口 各隨 省 諸惟 漢 囊 诗,不 存、 志 高 因張 括 門 月之 職 削 其 1

諒

敬

頌

治年愚弟昌熾頓首

後序

易纂《志産》一篇,次於《志僧》之後。他山之錯,未始非某君一言之賜,謹 篇,相輪久毀,雖數典之無忘,要駢枝之爲病。今得吴氏《捐田始末記》,遂 4 程適當武昌變起, 倥傯之際, 繕而未發, 補録於此。原稿本有《志塔》一

賜進士出身翰林院侍講國史館提調會典館幫總纂甘肅學政臣葉昌熾

### 志橋[]]

寓賢羈客,臨流抒嘯,信手拈來,無非霜天鐘籟。觀唐時梵夾,即題「封橋常 楓橋距山門僅一牛鳴地,自張繼題詩,四方游士至吴,無不知有寒山寺者。

唐 張繼《楓橋夜泊》:《吴都文粹》作「晚泊」。 月落烏啼霜滿天,江楓漁火對愁眠。 姑

住」字,則是橋也,不啻爲誕登之寶筏。樹幢初地,敢告司津。《志橋》第一。

蘇城外寒山寺,夜半鐘聲到客船。

領,以此二十八字冠全書之首。無此詩,志雖不作可也。韋左司以下諸詩, 右録張懿孫詩一首,橋與寺所由名,亦即此志所由托始也。振裘者,必挈其

别爲一篇,不援爲例。

楓橋,在閶門外九里,自古有名。 南北客經由,未有不憩此橋而題咏者。《吳郡志》。

楓 橋 駐防。 在間 門西七里,地與長邑合治,爲水陸孔道,販貿所集,有豆市、米市 乾隆《蘇州府 志》。

胥 塘北流 又 西出

橋灣。《姑蘇志》、乾隆《府志》合纂。

自 胥 塘 村橋,日 北流,經南濠至閶門釣橋,與北濠山塘水會,日沙盆潭。 楓 橋諸水、北流與虎邱山塘水合、日射瀆。 同上 自潭西流,出渡

僧

橋

會楓

江

明萬 《府 曆三十二年,滸墅鈔關户部主事董漢儒築楓橋堤,自楓橋至關二十里。乾隆 志

或 .朝雍正九年,修築長洲縣運河塘,自楓橋起,至望亭通湖橋無錫縣界止。《<sub>長洲</sub>

或 初 釋 性 能、號法華、寓寒山寺、修楓橋。適逢鼎革、方上龍門、大兵即過 其下。

《吴門補乘》參《百城烟水

志

楓 橋(三)《豹隱紀談》云: 舊作「封橋」。 王郇公居吴時,書張繼詩刻石作「楓

字,相承至今。天平寺藏經多唐人書,背有「封橋常住」四字朱印。知 府吴潜至

嘗見佛書,曹氏所寫,益可信云。虛熊《蘇州府志》。按:封橋寺藏經,明李日華《六研齋筆 詩,且云:寺有藏經,題「至和三年,曹文迺寫,施封橋寺」。作「楓」者,非。熊 寺,賦詩云「借問封橋橋畔人」,筆史言之,潜不肯改,信有據也。 翁逢龍亦有

記》、國朝張燕昌《金粟箋説》亦載其事。 據盧《志》所紀〔三〕,唐以前皆作「封橋」。自王郇公書爲「楓」字,而「封」字之

名遂晦矣!

又按: 後,無可疑也[四]。 橋,信乎其古矣!寒山子尚在隋、唐間,即云天監已有塔院,亦當在有橋 紅闌三百,見於白刺史詩,與「八門」、「六十坊」并稱。 楓橋與妙利普明塔院,皆不詳經始歲月。《吴郡志》謂楓橋自古有 吾郡通津之有

## 卷一志橋校記

志橋 鄭 氏勾去題後小序,并作眉批:「擬 删 後 准 此。

又,初稿本於唐張繼《楓橋夜泊》詩後,尚録明高啓《楓橋》、謝晉《楓橋歌送吴秀才之金陵》二詩。鄭

卷

寒山寺志

氏眉批:「詩可不録。」

也。 又 裘者必挈其領,明此志之不徒作也,非後録諸篇所可例也。」鄭氏勾去按語 初稿本張、高、謝三詩後,葉昌熾有按語:「録張懿孫詩,橋與寺所由名也。非此詩,志雖不作可 録高季迪詩,長言咏嘆,意不盡於詩也。 録謝孔昭詩,今昔盛衰之感也。 以此三章爲托,始振

[二] 楓橋 鄭氏眉批"「楓、封音假。」

〔三〕 據 初稿本此上有「按」字。鄭氏勾去本條按語。

四〕 可 鄭氏勾去此字。

## 志寺[]]

林之興替,而洛陽治亂繫之。 之宫,靈岩、元墓亦各有寺志,其例更隘矣。 吴中山水圖經,若《虎丘志》、《横溪録》、《瀆上編》,其例隘矣。 矧寒山負郭,歷劫再新,望閶門之峨峨,鬱觚 然陽衒之作《伽藍記》,但載叢 降而爲釋子

棱而特起,其可無載筆以繼《斯干》之後乎?《志寺》第二。

明禪院

,即楓橋寺也。

寒山 禪寺,在間門西十里楓橋下,舊名妙利普明塔院。宋太平興國初,節度使孫

在吴縣西十里,舊楓橋妙利普明塔院也。

《吴郡志》。

拾得嘗止此,故名,不可考也。紹興四年,僧法遷重建。洪武中,僧昌崇重修。 承祐建浮圖七成。 嘉祐中,改普明禪院。然唐人已稱寒山寺矣!相傳寒山、

姑蘇志》。

重興之後也。 射瀆三庵,而佚其一。然據此可見寒山寺在明初尚爲叢林,蓋正在僧昌崇 歸并寺三:秀峰寺、慧慶寺、南峰寺即古支硎寺。 按 ··《姑蘇志》又稱:洪武歸并佛宇,但列叢林,而以子院附見其下。 庵四: 祗有文殊、雲泉、 此寺

可 矣!」是此山之以「寒」名,自凡夫始。寺之得名在先,山之得名在後〔五〕,不 中勝迹,而末繫寒山二語云:「『溪回難記曲,山叠不知重。」亦寒山先我 有『時陟涅槃山』句。而寒泉則支朗品題。因命之曰寒山焉!」其下詳紀山 本,據凡夫自述云"「山本無名、《郡志》:『涅槃嶺在其左。』又見寒山詩, 也。其地去金誾不遠〔三〕,或疑寒山寺得名以此〔四〕。余家藏有《寒山志》寫 又按、吴城之西有寒山,實天平山之陰。上爲法螺禪院,明趙凡夫别業行 以後加先也明矣!

寒山寺, 武 間,僧本寂 間 僧 在 昌崇闢 楓 橋下。 鑄鐘建樓。萬曆 建。 起於梁天監間,舊名妙利普明塔院。 明永樂 四 三年,深谷昶修。 十年,僧明吾鑒 建龍 正統己未,郡侯 函閣,而 元季,寺、 大殿毀。四 況鍾 塔俱毁。 再修 + 0 六年 嘉靖 洪

寒山禪寺, 修 復之。 實妙利普明塔院,不詳其經始歲月。 本朝康熙五十年冬,大殿又火。 舊有水陸院,嚴麗靚深,屢出 明萬曆四十六年,大殿火,明年 靈響,

今久湮壞。

塔亦莫如其迹。乾隆《蘇州府志》。

膏 釋

城

烟水

西流

師

徒

鼎新。

本朝順治初〔六〕,幾爲汛署,僧天與力守弗廢。

詳

後《志僧》篇。

按: 烟衰 《記》作「重建」,爲得其實。今雖相輪已頹,風鈴闃寂,而遺址 古岸依然窣堵波。」是南宋時塔固巍然無恙。 張 來久矣!王《志》謂「宋太平興國初,孫承祐建」。 師中詩。「塔影落前浦。」范文穆詩: 草之中,瞻人天而頂禮,未可以數典而忘祖也。 寒山 舊爲妙利普明塔院,招提名義,檀度因緣,皆以塔著。 墙墙 上浮圖道旁堠。」張孝祥詩: 即後來湯仲友詩: 而乾隆《府 其毁 在 仿佛猶 元、明之際,考 志》據 開 「孤塔臨 Ш 得於荒 有塔, 孫覿

承平,未經劫火。逮後一首則入明後,應詔修史,自都歸吴之作。故其下又 亡。一人之詩,齟齬不合。蓋浮圖毀於元末,季迪適值板蕩之交,送别時尚 非,不見青山舊塔微。」自注:「舊有塔,今廢。」前一首,塔在,後一首,塔 官道,三門背運河。」其時已人元矣!至明初,高啓《寒山寺送别》詩: 有「官秩加身應謬得,錦衣今已作荷衣」之句。 裏鐘催行客起,塔中燈照遠僧歸。」又有《歸吴至楓橋》詩: 今昔已殊,滄桑一霎,可慨 「遥看城郭尚疑 「船

乾隆三十九年甲午八月,住持比丘宣能續建大殿、前軒。題名碑殘石。按"宣統三年, 當事募工重建,從土中得殘石,記助緣姓氏,前題歲月甚詳,但無文字,故《志碑》篇未録。又按:日 建」,日 前 軒」,其先必有建大殿者 ,惜文獻闕如,不可考矣。 「續

也夫。

不詳。 爲 按 且 隘 烟埃,而 咸豐 ,僅蔽風雨,亦未詳何時何人所草創。 庚申赭寇之劫,問門適當寇衝。 以 此 前、惟住持果圓募修、見於内閣中書趙文麟《捐地 一寺亦遂無寸椽矣!寇平既久,始有披荆棘而立梵宇者,既庳 城未陷,官軍先縱火,層樓 碑 》,歲月亦 杰閣,蕩

光緒三十二年〔七〕,今直隷總督陳夔龍由中州移節撫吴,謀於僚屬〔八〕,捐俸鳩 一,拓其門,臨大路,構堂三楹。 由堂而進,東 西各三屋 堂之西,構鐘樓,鑄

宣 統 三年,巡撫雲陽程德全偕布政使陸鍾琦,又拓 懸之其上,以存古迹〔九〕。 而新之二二,重建大殿。 前

俞樾《記》。

詳下《志碑》篇□○〕。

吴下精藍之冠。 鄒福保《記》。 詳後《志碑》篇

爲

御碑亭,後有樓三楹

,可遠眺

金繩寶地门三,焕然一新。

長廊精舍,幾爲

鐘

宋孫覿《楓橋寺記》[一三]

武 而 自長慶訖宣和,更七代三百年,吴人老死不見兵革,覆 東南之冠,詩云「茂苑太繁雄」是也。 [吴泰伯廟棟,猶有唐昭宗時「寧海鎮東軍節度使錢鏐」姓名書其上,可謂盛 肅 王,獨嘗順事中國。 王錢鏐以破黄巢、誅董昌之功、盡有浙東西之地。五代分裂 平江自唐白公爲刺史時,即事賦詩,已有八門、六十坊、三百橋、十 有宋受命,盡籍土地府庫 建乾符、光啓間,大盗蜂出 ,帥其屬 露 朝京師 生養,至 一,争爲 諸 ,遂去其 DU 藩據 + 强 三萬 萬户,爲 雄 國。 有 數 蓋 州 而

之,而 矣 矣 實 家 後 嚴 榻 1 J. 峙 至 俯 减 之 財 就 麗 蟠 今 官 妙 膳羞 乃 柄 靚 屬 助 古 利 i首 建 而 相 捐 邊 有 普 無 仰 南 其 楓 龍 天 盗 金 明 日 天 左 率 室 視 橋 北 塔院 幣 幸 起,官寺 右 常 臣 遷 象 無 天 鬼 寺 舟 僅 指 睊 辭 老 所 日 亦 紹 不 神 車 禾 睊 修 脱 所 遂 介 賜 過 栖 而 所 廪 銖 之先,瓦 然 金 於 共 知 從 民 余言日 四 不 升 舉首 壁 兵 名 著 廬 膽 出 捨 將 濟 積 蕭 火 經 前 仰 於 所甚 吏被 寸累 出出 蹙額 然, : 0 0 始之歲月。 天下。太 夕 至嘉 盂 明 巋 而官 愛, 扶 然獨 錫 介 願 爲 如 屢 煨燼 胄 疾 逃人家。 祐 杖 有 軍蹂踐 如 出 顛 視 紀 平. 以 中 無 一靈響 執 率 補 其 而 始始 恙 死 也。」余嘗 興 唐 左 爾 敗 士: 或 人 寺 契,交手 殆 至 改 楓 張 尤 棟 紹 初 門 無 賜普 橋 大 有 節 繼、 宇 爲 興 僧 夫 寺 慨 數 則 怪 殊 逃 \_\_ 兀 然樂 毁 明 度 張 焉 者 相 倒 天 勝 新 年 若 禪 使 車 祜 寺 長 付 衣 下 距 輸 殺 而 頹 院 孫 嘗 口 多 無 吐 無 州 之意 塔之 支 老 檐 4 承 即 故 難 哺 而 石 西 法 而 + 委 祐 其 縣 鼆 色。 南 雄 志 役 處 食 世 遷 地 重 杰偉麗 六七 一面 者 按 官 最 建 作 履 而 此 瓢 起 佛 財 浮 詩 ^ 大 寺 里,枕 吴 何 吾 會 瓦 之徒 迎 匱 有 啚 記 更 道 郡 民 其 中 之 力 水 Ł 游 也? 三年 徒 觀 惟 則 人 啚 陸院 成 漕 屈 恐 無 當 0 滋 吟 經 天 河, 後 居 尺 輸 卧 起 峻 誦 mi

九

卷

志寺

《姑蘇志》參校。 夫以子弟而事父母,其於奉佛,固無間然矣!故著余之所欲言者爲記,使歸刻 隙。吾欲以柔道理之,量其力之所堪任,而與之爲均,無急之以期,無使吏迫之。 晨擁百吏,坐一堂之上,赫然如神明之臨,又阻聲威以怛之,而後吏得以投其 故一方道俗,皆向慕之,凡所欲爲,無不如志,故成就 爲 觀 急。 下休戚 遷老積精營作,練學苦空,敝衣糲食,不以一毫私其身,日以飾 紹興十六年七月日,晋陵孫覿記。《吴郡志》。汲古、守山兩本皆有誤字。 又飭其徒二三輩,持鉢叩門,或持簿乞民間,日有獲焉,惟資以治寺。 一共爲 一體,人人歡然欣戴,如駒犢嬰兒之慕,以盡夫爲民父母之道。 如此。今吾鄉縣之長人者, 蠱 以《吴都文粹 壞、起頹仆

明王稱登《寒山寺旭公造藏經閣疏》

詩裏寒山黄葉,前朝稱古寺,橋邊漁火丹楓,千載記名藍。 如 斯 南國叢林,

風 宜 有 雨漂摇之患?老僧正旭,法號曉山。 西來法寶。 寺無經而崇奉,何以副人天瞻禮之誠?經無閣而 花下開籠,曾放支郎之鶴,林中結社,常 貯藏 ,安能免

吝,寧無布 緑字琅函祈永護,億萬幾千百佛妙典,從赤烏傳至,金書 Ш 栽 寺裏老支郎 惠遠之蓮。既捐資而造大乘,必募緣而建巍閣。畫龍於棟,畫海於梁,豈一縷 鍰之可就 ,定應寶 地給孤,造塔非難,當有聚 ! 刻雲爲楹,刻山爲柱,必衆財衆力而後成。達官長者之往 地修來福,海客胡商之貿易,銅山金埒,都是龍華會上人。 ,起閣藏經募十方。 待得閣成僧展誦,烏啼月落一 沙阿育。五千四十八卷靈文,自白 玉笈願長新。偈曰: 天霜。《法因集》, 來,錦 馬馱來, 揮 金不

國朝俞樾《新修寒山寺記》

≘ 王

一百穀全集》之一。

中丞 遠,一 止 三吴。 |喟然曰:「浮生如寄,宦迹如蓬,吾前詩其爲之兆乎?」爰於三月下旬,莅 「宦味與禪悦、喧寂有殊致。夜半聞鐘聲,如在寒山寺。」詩境清越,寓意深 **筱石中丞之撫中州也、於節署得八景焉。其八曰「蕭寺鐘聲」。中丞賦詩** 時賓從皆吟賞不置。其時在乙巳之冬,及明年正月,遂拜移節江蘇之命。 下車伊始,興教勸學,整軍經武,日不暇給,未遑一問寒山之勝也。

倡 舉 其 此 辨 左 在 天 有 用 以 補 九 折 乎 能 者 右 咫 校 文字之契,故與余相習 洋 書 屋 存 Mi 自 僅 則 尺 錢 稍 恝 官 閱 古 南 而 方 營伍 數字 然乎? 閷 行 斯 洂 重 各 荒 伯 73 Ŧ 1 刻 則 構 捐 葛 經始 焉 者 與衆往 税 百 廉訪 唐六 崩 堂 俸 凡 ! 駕 = 乃 寺中舊 廉 與 榛 堂 於 赞成其 與僚屬 有 楹 郊坰,問 觀察、 如《寒山 中惟 之 觀 董 光 責 西,尚 0 理 緒 碑 焉 由 人 是 燕葵兔麥 三十二年 太 堂 共謀 0 其 事。 咸 役者 寺 其 因繪圖具説 守 有 吾 而 大 植 地,日: 記》,亦 隙地, 修葺 進, 夏 爰 至 門, 權 於 者遠在 長 1 是。 東西 九 而 門 知元 日 ,自方伯 洲 已。 月 乃 漫 庳 元 鳩 一之屋 述 不 構 以 漶過半。 楓 月. 和 大梁,緬 I 文待 重 文 橋 和 隘 中 兩 縣 各 屋 待 以 、吴縣 展 也。」問: 0 寶 丞之命 月 是 詔所  $\equiv$ 下,不謀而 詔 拓 登其 君 而 所書 懷 中 其 告成。 鎮 H 三大令, 書張 兹 丞 東屋 門閭 大殿, 鐘樓。鑄 ,求記於余。考寒 Ш **游,形** 嘆 唐 「寒 也。 宏敞 張 懿 日 ()使臨 同辭 中 Ш : 繼 榱 孫詩,今已 咸 之歌 余 丞 賓 寺 桷 詩 銅 醵 名 自 往 大路 馬 爲鐘 粗 資 舊 咏。 勝 年 捐 朋之所 在? 存 以伙 之 刻 視 廉 懸 : 殘 地,荒蕪 Ш 今臨 石 學 俸 由 達觀 之。 以爲 美 寺 寺 之其上, # 缺 燕 門 : 哉 其 中 息 而 州 都 屬余 於 也。 斯 進, 地, 至 口 其 近 唇 之 M

童,無 午二 吴久, 於後 其 邦 於梁天監時。舊名妙利普明塔院,以寒山子曾居此寺,故即以爲名。吴中寺院, 能 朕 成 兆 窺 之名迹,而 下千百 四」。 ,并勒名 之不虚 見中丞之意,或視六如居士舊記,所見者較大乎?光緒三十二年,歲次丙 凡日 輒紀本 不能誦是詩者。 品 本文墨 而 了,喜觴咏之有寄,猶非中丞雅意也。 於鐘、故不及焉。 末,述年月,以 動遠人之欣慕哉?然則中丞之修葺此寺,其用意深矣!若惟 寒山寺 之士,咸造廬來見,見則往往言及寒山寺。 乃寒山寺竟蕪穢不治,使人發勝 以懿孫一詩,其名獨膾炙於中國,抑且傳誦於東瀛。余寓 爲斯記。至方伯以下各出錢若干,用漢碑之例,具刻 余所書張懿孫詩,遠不及衡山舊刻,而此記則尚 余老矣,不獲從諸君子後,共落 地不常之嘆。 且言其國三尺之 何以 是 存此 感

按: 志 居 1 不能詳,亦非始於天監時,皆考之未審。 集 唐子畏未嘗撰記,今寺中所存殘刻,乃《寒山寺化鐘疏》也,亦見《六如 \* 曲 園先生得之耳食,未摩挲其碑而讀其文也。此寺經始歲月,舊

募修寒山寺啓

賦詩, 之勝 公者 宏 懋 此 平 有 境 幽 迹 諮 興替 也。 上方之護力,龍象經構,霞舉雲興。將攬勝者,吟落月於霜鐘 邪 越 之异, 輒 ? 而 吴中 叮 我同 又力 有 舊 人境齊美。 + 抑 遐 乃著此名。 靈岩、支硎 一供寒、拾遺象於方 近郭名刹 年,名迹久墟,鮮 洎 想,雖 僚,慮材量功, 無所藉。 境之勝, 或 朝咸豐庚申之變,南烽 而 海 諸峰蒼翠,相 ,不連丘陵以自高,惟寒山寺最古。去城 外游客,訪 張懿孫《夜 當時領郡者 敝者復 是 必 謀衆 不諐於素。 有謀所以起 丈,翼以 新,固 以 古津逮, 泊》一篇 集 互森然,若 自 如韋、白諸賢,嘗 水陸院,嚴 有 事 有若信善 煙, 時耶 無妨 靡不 ,尤膾炙在吟 納 I ? 蕩爲荒 流連於 之屏 ,亦無匱 顧 贵 電視 君子、 恢関 是 烟,精 障。在 邦 以 深 楓 П 慧業 繁雄 舊規 休沐旬暇, ,蔚爲 江漁火中 財,庶幾 古今四 唐元 藍 匪 文 , 營繕者衆, 而 西十里,據 遺構, 陊 靈宇。 人 和 輕 '懷道者,緬宗風 萃南 此義耳 間 功 方來者 升 嘆爲 自 有 眺 可 剥 舉 宋以來,代 清 或 栖槃之逸 楓 殆 寒 5, 之檀 遠 願 而 盡 Ш 橋 未 暇 鳴 與 取 棹 子 烟 施 仙 邦 及 寇 尋

資小引,示存古意焉!宣統庚戌之秋,張人駿、程德全同啓。 於 、妙刹 咸於是導厥淵原。孰謂高明眺望之美,爲政不在兹乎?爰敍大凡,聊

程德全《重修寒山寺碑記》

詩日 吴山 禮 世者,千 爲 亦 我 漫 而 山之詩,知道法明於天下後世,讀世宗上論,知治法行於天下後世: 皆古佛 世 Ш 遁 生色。 宗憲 池不 歌 天下起衰振廢之心,砭愚訂頑之旨,與崇德報功之典,常相因也。而樺冠敝 世無悶,非遇聖人在位,末由闡其微,而大發其光。寒山子書壁之詩傳於 ,以警世之愚頑。苟非天亶聰明,孰有能合中西儒釋,而一以貫之者乎? 子 有餘年矣!當時國清僧衆,莫測端倪,即天台刺史,亦惟驚神异、知敬 蘇之有寺也,始見於張懿孫《楓橋夜泊》一詩。是詩也,神韵天成,足爲 可 皇帝之序寒山詩也,曰:「真乃古佛,直心直語。」嗚呼!盡之矣!讀 期 辨識。 然咏其地,非感其人、重其德也。 辨此音。」又曰:「楊修見幼婦,一覽便知妙。」寒山該一乘宗旨,作 蓋唐、宋以降,吴、越之間,無復能作豐干饒舌者矣!寒山之 明初重修,姚少師曾爲之《記》,今

宗教,雖各有异,而要其終始,總不出「各各努力」之一言。嗚呼!時至今日,豈 用矣 直心直語也。今世政治家訾宗教,宗教家亦訾政治。 念先皇之稱古佛,而棖觸於砭愚訂頑之苦心,如聞夜半鐘聲,悠然不絶。願與海 詩,分明如畫。又得國朝王文簡公「孤篷聽雨」,一再咏嘆之,約略盡矣!德全獨 [一五],將於是乎始。時至今日,豈非臣下努力時哉?至於寺之風景,則唐賢一 力,人皆可用。體古佛之心,奉先皇之論,以上慰今嗣皇夙夜求治之至意者 以從天下士大夫之後,則天下之衰廢或皆可振也。事各努力,事皆可成,人各努 敢不以起衰振廢爲心。是役也,繼前賢之緒業,感東鄰之嚮風,而尤驚心動魄於 非臣下努力時哉?德全於政治、宗教之相維繫,愧未能達其蕴。而備員斯土,不 「各各努力」之言。蓋努力以從吴中士大夫之後,則吴中之衰廢或可振也。 !離宗教,則政治爲無本矣!寒山子云:「報汝諸人,各各努力。」夫政治、 不知廢政治,則宗教 努力

内外有志之士,同起聽之也。

涇。 亭延秋月,樓對春山,霜鐘應門,蘭舟牽岸。凡夫層軒杰閣、曲榭迴廊,因寺爲 鳩 故家,既刊梨勒石,而歸諸寺。更以保存古迹,守土之責,重修靈刹,詢謀僉同, 郭之名勝也。橋有寺,以唐釋寒山子得名。兵燹以來,鞠爲茂草。至光緒丙午, 橋納運河水,東趨閶門,還入城濠,爲程可七里。故楓橋者,實石湖之尾閭,而負 記之矣!鍾琦尚何言哉?特有所貢疑者數事:《府志》載寺起梁天監間,所謂 園,罔不畢具。其規模之宏遠,能使游觀者視聽一新,意尤有在,中丞已立石以 稍稍謀興復,工未半輒止。宣統庚戌,雲陽中丞莅吴,始訪得寒山詩集、畫象於 出 妙利普明塔院」是也。 〔工庇材,不容稍緩。越明年辛亥□月,全寺落成。於是殿宇莊嚴,水木明瑟, 横塘,東入胥門運河,北至閶門運河,日彩雲港。其自横塘直入運河者,日洞 由彩雲港北折出洞涇之西,日白蓮涇。又西出江村橋,日楓橋灣。復自楓 吴郡西南諸水,皆出具區支流,而石湖尤著。湖東滙越來溪與木瀆合,北流 語本《吴郡圖經》,而《圖經》不言其經始。 里人向有「先

卷一

志寺

言,則 寺後 吴邪 儲 猶 故 郇 指 紀 夜 江 得 記 或 禹 事 = 宿 村 年 公王 玉 , 》程 ? 「今丞相」。 城」之謡 以神仙 寒山 謂 安 遥 以巡視漕 張 」。吴中 遥相 額 知 師 禹 珪 詩 寺 題 非 孟 玉 之説 進 地 膾 合二 對。 寒 | 楓 \* ,似涉荒渺。 一者,王 一之寺 炙 封 枕 Ш 河 律 解之。 則 岐 漕河,唐時 人口久矣!「江 橋 名耶 始於 江 待 耶 或 詩》詩 屢經兹地,但見孤村流水映帶茅庵而 ,莫古於赤 珪 橋 ? 公。 詔 之字。 若韋 唐元 ? ≪志 鍾 此 寺之有碑,自宋王郇公、續記 云 書,特補 琦 其封郇 據《吴門表隱》,寺 》謂 應 和  $\mathbb{E}$ 昔讀唐 《宋史》 中。 物 不 烏 之江 邇來寺 名江。 楓 刺 ,俗殆誤 公。當 蘇 此 E 一村橋 人詩,即 注傳 與閭 之遺 州 字, 好尤瀟 在 閑嘗 古 孫吴爲 不言封 迹,而 一六年。 邱 在 輒 在 訪 悠然遐想其 太守所撰《寒 楓 不 有銅佛,座陰篆 貞 灑 之土 得 橋 吴越 元初, 何以原 郇公事 張 朱樂圃 其 西 人, 南。 説 繼 因 去元 留 碑 0 > 已,殊 有 ^ 不詳 遺 俞 是作「江 據《長》 題 Ш 續 知 不 前 迹 和 氏 内翰 寺 記 + 子 《雜 尚 郇公之名。 説 》適成 不稱其盛名 逮 詩集傳 及 前 遠 編 書。 村 耶 字,後題「赤 由 臨 纂 則 \*, ? ×, 安 詞 而 於其 元 者 謂 橋 曹 業不 明 從 知 何 豐 本就 姚 非 出 以 《宋詩 一合,然 内 次 1 先 少師 本 起 翰 楓 年 年 作 糧 有 於 既

説沿 被 今雲陽 mi 命 貴 襲之訛, 撫 陽 晋 中 制 一會將 丞 軍創始經營,鍾琦亟贊其議,範鐘樹石,關廳事,葺僧舍,而基 繼 且 長 舉鍾 去吴,則尤有不能已於言者。用 增高 琦 ,舊觀悉復。 兩度來游始終其事之前緣、記諸寺壁,以 鍾琦 又親 董其 爲稱 役 例 述斯 得 寺形 有言。 勝之迹,以 及 備 寺 他 成 日 礎 編 厘 而 以 輯 訂 鍾 立。 舊 琦

那福保《重修寒山寺記

\*

志

者

之

助云

爾。

大,琳 遺 問津,一 天 唐 邪?雖然, 詩 一時一 祠 ,而動高 釋氏 而 宫梵 枯 其 若 僧 人其 無 宇 甚 耳,一 爲 古 Ш 慕 以 故無名,而 地 景行 來葛、陸、范、馬、周、 億萬 乎其 之名遂 瓶 之志者,以其有功業道德 計,即 名者,名之不 鉢 歷 ,雲水生涯,故非 無名之名,其得流傳於後世者,則有因緣在。寒 吾 千餘 吴 郡 年 可 城 而 程、張、朱 己 内 不 也, 外 朽,非佛家 古刹 求名者。 如是夫! 存也。寒 諸 無慮 名賢,其 所謂「 乃 數 而 大 百,而 Ш 况 僧 大 子 踪 ± 而 緣 何功何德, 迹 大 訪 有 所 夫 寺 者 古 至 之 者 邪 一,後 因 ? 名 必 寺 就 夫 之人 重 而 而 名顧 天 於 寒 Ш 有 膽 奕 下 子特 山 詩 與 之 謁 祀 寺

道之弗衰。 明之於遠公,昌黎之於文暢、大顛,坡公之於參寥、佛印、辨才,俱往 德中人,而 Ш 野趣,幾爲吴下精藍之冠。 新,繚以長廊 偶偕宛平陸方伯暨在官諸君子議葺寒山寺,不數月而工竣。 金繩寶地,焕然 公以傳,是又一 空, 昔莊周、列禦寇皆宗之。 吾儒以其深通元理也, 亦往往樂與之爲方外交。 識藴乎其中。 化,窮達一 士 「之遺象,撰碑紀事,愾乎有感其人、重其德、明其宗教之意,豈非余所謂· 相埒者 必尋叩寺門,瞻仰蓮座,即 「寒山,寒山!」嗚呼!釋氏無名之名,不轉勝於世俗之所謂名者乎? ,何哉?嗚呼 致。其書雖支離惝恍,絕不言功業道德,而有大慧力超乎其外,善知 爲陶、韓諸公之所爲者邪?寒山子之名,藉以益顯。自今以往 此數公者,豈佞佛者哉?誠有取乎爾也。而彼數僧之名,亦賴此數 ,間以精舍,而鐘樓巋然高聳,爲一寺標幟。林木扶疏,以禪房 其徒之精於禪學者,輒俯視人間世一切之事,澹然若浮雲之於太 因緣也。今中丞雲陽程公來撫三吴,政通人和,百廢俱舉。公暇 ! 余知之矣! 天下學術之賾,殊途而 起衰復古,厥功偉哉: 羈臣遠客,夜泊楓橋,聽蒲牢,望漁火,必 !不特此也,梓寒山之詩集,刻 同歸。 佛氏宜 還贈答,稱 非特吴 又 功業 推篷 mi 道 寒

而 因緣靡盡,薪火相傳,余又安能測其所至邪?時在宣統三年辛亥夏四月。

## 卷一志寺校記

〔一〕 志寺 鄭氏勾去題後小序。

〔二〕 明趙凡夫别業也 「夫」下,鄭氏補「之」字。

〔三〕 其 鄭氏勾去此字。

[四] 得名以此 鄭氏改作「以此名」。

〔五〕 山之得名在後 鄭氏改作「匪以山故」,并勾去下句。

本朝 初稿本作「清」,與《百城烟水》、江蘇古籍出版社 校點本)同。

三十二年 賦詩,「其時在乙巳(光緒三十一年)之冬。及明年正月,遂拜移節江蘇之命」。則作「三十二年」爲 刻本作「二十二年」,初稿本作「三十二年」。考俞樾《新修寒山寺記》、陳夔龍撫中州

是。據改。

隸總督陳 今直隸至僚屬 ]由河南移撫江蘇,謀與僚屬」。 初稿本作「今直隸制軍貴陽陳公由中州移節撫吴,謀於僚屬」。 鄭氏改作「今直

九 堂之西構鐘樓鑄鐘懸之其上以存古迹 詳下志碑篇 按 俞樾《新修寒山寺記》文即載本篇。 鄭氏改作「堂之西構樓,置鐘 《志碑》篇僅録碑記題名。 懸其上 · 日 鐘 樓 云。

卷一 志寺

巡撫至新之 公偕布政使宛平陸公□□又拓之」。并作眉批:「撫部雲陽程公、藩使宛平陸公。「偕」字應省。」 初稿本作「巡撫雲陽程公偕宛平陸方伯,又拓而新之」。鄭氏改作「巡撫雲陽程

〔一二〕 金繩寶地 鄭氏改作「兹寺」,并勾去下十二字。

楓橋寺記 按: 清顧沅纂《吴郡文編》(抄本)卷九十八作「寒山寺佛塔記」。

歲次丙午 初稿本此下有「德清俞樾撰,孫陸雲書」。上有葉昌熾眉批:「書人見《志碑》篇,此

處當省。」刻本省此九字。

〔一五〕 求治 初稿本、刻本均無。據碑文補。

## 志象门

龍象所栖,屢著靈響,宋孫覿《記》所云也。 論 法 相。 今可甄録者,惟新刻二象。 寺中舊有銅鑄、窑變二軀,相傳已久, 庚申劫後,無尺椽寸甓之存,何

雖 付剎塵,猶可摭遺聞 而補之。 嗟乎!劫火燔空,我佛金身,難言不壞,惟

文字爲可久耳!《志象》第三。

張 星鑒《游楓溪記》: 寒山寺,由大殿至後樓,樓有古佛,佛以銅鑄,連座高二尺 一余,座勒「赤烏十三年,郡主孫權供奉」。相傳爲毀商紂炮烙銅所鑄,然亦無

確據。《仰蕭樓集》。

褚 《記》,并索予詩: 逢椿《寒山寺古銅佛詩并序》: 寺有古佛閣,銅佛一驅,高二尺許,座有「赤鳥 之微動容。」《行素齋詩集》。 緣銘字小篆工。 霸業今已終。 吁嗟世尊亦塵蒙,但聞月黑鳴霜鐘。 三年,郡主孫權供奉」十一字。 赤烏年鑄鎸當中,造象作福紫髯翁。 「寒山寺前秋草空,蕭蕭落木多江楓。 道光壬寅九月,里人 鐘聲似悔 云銷炮烙猶 摹象勒石。 寺有古佛寶相豐,座 西來誤,我佛聞 商 韋光黻 銅,孫吴 作

年,建國 按〔三〕" 吴主權以魏太和三年稱帝,是年爲黄龍元年。 已久,何以猶有「郡主」之號?毫社之銅,又何以至吴下?此殆閭 歷嘉禾至赤烏十三

巷 」郢書贋説,不足辨也。 然其象, 則已古矣!

周 布衣永年字修齊《方塔禪院變窑僧伽》詩: 云 「相傳舊供寒山寺。」《海虞詩苑》。 「迢迢夜半鐘,恍與寒山遇。」自注

吴 佛。傳聞窑變觀音凡有三,海虞方塔寺中乃其一。 光《窑變觀音在方塔寺西方殿中》詩: 「世間奇事真百出,窑 姁姰肖真形, 皜皜存本質。 不變神專變

春千杵 後素 膜 時 依 裹 瓶 。」《素修堂集》。 寧。 拜 幻 以 稀 功,五 人,齊稱大慈大悲救 化 础  $\pm$ 水燔 坯 况千手臂足使令,低眉 作諸象 十三參相,華妙莊嚴道子筆。 始 色巧塗抹。 成,水 以柴,難者祭紅 ,滿窑瓷器忽然失。 按: 濾千羅 竹橋先生此詩,亦咏寒山舊象,牽連録之。 紫或若 苦救難 料 火飲 還 垂 凝 别 映。 觀 血 目 我 旊 疑 ,黄或若傅蜜。 世音菩薩。 憶昔客游景德鎮,製瓷燒器識精劣。 弗 不信佛惟信神,神聰明 窑成窑壞亦數存,窑 人弄粉如 聽。 願 爲 菩薩菩薩 弄 普灑甘露水,滴盡楊枝 丸 翠 大 或若 小方 知有靈, 户 聚 鶴 員 Ī 觀縷爲 手旋 直 ,黑或若 衆生 而 余述。 脱。 壹 I 點漆。 繪 切 但 有 呼 見 石

右古佛象。

姚 宗典詩行人寒山、拾得象已剥落矣,忽有 課鐘沈寶 山 、拾得重來》詩: 月臺。意 在毫端 漫指滄桑認去來,楓江依舊笑容開。 離語默,風生帚 下絶塵埃。只看 人自天台來,塑畫如生,爲 石罅 晨齋 鉢 人還在,肯信昆 捧香 雲蓋,夜 赋喜寒

潘 曾沂《書拾得子象後示蔣生》 蔣生年十七,導之爲正士。 口誦 孔孟言,亦頗

出

劫

灰

!《百城

烟

水》。

心 知 A 聞 有 佛 初心 理。 拾 得子。 今歲秋八月,夜夢走村裏。道遇 那 可企。 此 夢 生未解,潘 授 以行 願 品 子聞之喜。 ,信解從 一兹始。 長髯叟,問生往何止。 謂言 拾 《功甫 得 者 小 集》。 即即 是 普 賢 叟指: 爾 古刹中, 普 賢用

羅 聘 和 無 君 顔 喜 臣 少 聖 繪 合,歡 合 煩 寒 上 下 山 聖 惱 一,爲 情歡 喜 世 拾 寒山 得 庭 間 分 中 煩 象 、拾得變相 愈 惱 題 父 嚴 子 變 詞 聯 歡 呵, 顔。 0 《寒山、 手足 也。 呵 爲 多歡 人 呵 拾 花之寺僧羅 煩 ! 得二聖降乩 惱 荆 考寒山、拾得爲普賢、文殊化身。 終 樹茂,夫妻能喜琴瑟 無濟,大道還 聘書記 一》詩 生 歡 呵,呵,呵, 賢。 喜間 主 叫 0 賓 或 我若 何 能 今稱 在 歡 堪 歡

鄭 記》, 文 尚 调 皓 Ш 雄 洛 仙 焯 光 迹 以 城 繪 深 緒 廣 寒 寒 游 庚 山、拾 在 愛寺,觀 山 戲三昧 辰 唐代已有 子 九月 象 得 題 得 爲 朱瑶畫文 既 詞 文殊、普賢化身。 望,楓 其畫 且園指墨逸趣,藏之吴中故家有 「登岳采 象,爲 **〈殊、普** 橋 舟 中 世所 五芝,涉 賢,題詩 寫。 瞻 然則 奉 鶴 澗 贊嘆。 坡公詩中所 居士 將 此 圕 鄭文焯指 草。 乃高 證之唐問 散 年 密 稱 髮蕩元緇,終年 鄭 Ė 朱 頭 邱 中 戲墨。」昔 今寒 書 瑶 允《天台 叔 唐 Ш 問 晚 寺落成 所 輩 或 蘇 一,得法 寫 |清寺 文 不 忠 華 寒

因 取 以鈎橅人石 ,爲識其顛末云。宣統庚戌之歲冬至日,雲陽程德全題。

二六

象互見《志碑》篇。

右寒、拾象

陳文莊《天台憶》寒山、拾得古象:寒山一手印記,一手拊膝,微笑,赤足。 一手□珠,一手閱卷,亦赤足,大笑。 又《台雁憶 》有仙竈下寒、拾二小象: 拾得

花亭光菩薩手製大士、善才、寒、拾四象。 右國清寺寒、拾象。 按:天台爲寒、拾祖庭。 觀姚宗典《寒、拾重來》詩,則

《無夢園

集》。

楓橋寺象亦從初地來也。 附録於此

黄 庭堅《題落星寺》詩: 寒山、拾得畫最 妙。」按: 書 隆爲宋時僧,其所藏畫笥,至近亦唐人筆,此寒、拾 圖妙絶一作「絶筆」無人知。」自注: 「僧隆畫甚富,而

釋 明綱《寒山、拾得》軸:「赤脚蓬頭小道,身穿納搭破襖。 亂髼鬆,挂弊不知醜。虚空落地來,轉掃轉展有。看你個呆子,何時得歇手?」 烟塵盡掃。」明綱。 下有白文「明綱」、「宗朗」二印。 「終日笑咍咍,長年赤脚走。 嘻嘻擁篲前行,不覺 頭髮

之最古者。

《山谷詩集》。

照也。 僧。癸丑冬,卒于毗陵馬鞍山寺。遺言欲返祔於祖,始知爲公子,以其喪歸葬 寅、大吏捕魏耕、詞連祁氏。客有出奇解之者,理孫得寧家,而公子戍寧古塔。 夢癯僧入室生。乙酉,忠敏公殉難。江上師起,偕其兄理孫毀家助國。俄而 癸丑二月廿七日,天華净範頓首題。下有白文「淨範」、朱文「瓊則」兩印。 呪林大師名 齋《廡下語》中。余懼後之人有舉其名而不知者,故爲書厓略於此。庚辰長夏, 題名之故,未嘗不感慨零涕,悲其遭之不幸也。是幅得之山陰市中,蓋其自寫 耶?直以智盡力窮,計無復之耳!癸丑至今,一百五十年,觀其詩與畫,思其 之。 夫世臣與國休戚,不幸丁陽九厄,削髮行遁,其心豈樂浮屠之虚誕爲之 大義,必爲有用之學。配朱氏,忠定公元燮之孫女,能詩畫,一門唱和,聞者艷 之梅里。祁氏世代膴仕,藏書甲於越,寓山花木冠一郡。公子少任俠,讀書知 亡何,賂鎮守將軍,得縱歸里。既有物色之者,避之吴,依退庵翁於堯峰,遂爲 師潰,或謂:「公子當鍵户謝客。」公子不爲怵,江湖亡命來者無勿納。 明綱,故山陰祁忠敏公第二子,當日所稱六公子也。公子名班孫,字奕喜,母 上有天華南師贊,亦靈岩道侣。公子事詳見杲齋、農祥兩先生集、徐俟

海鹽俞浩志。右題字三段,皆見《穰梨館過眼録》。

右附一切寒、拾象

#### 卷一志象校記

志象 鄭氏勾去題後小序。

蔚光,皆宜著明時代,以昭翔實。」

又,初稿本内夾一紅箋,上有鄭氏墨書:「志例,宜紀時代,如釋逸慈及張星鑒、褚逢椿、周布衣、吴

初稿本内夾一紅箋,上有鄭氏墨書:「考造象之興,南朝始於齊梁,北朝盛于元魏,見之古

按

初稿本上有眉批:「鄭説可加入。」字迹與卷首程德全序相似,或爲一人所書。

今著録。此孫權造象爲吴人附會可知。」

前。 象,示不忘本也。 姚宗典詩 叔問注。」按: 葉昌熾原文作「潘遵沂」。鄭氏箋條作「潘遵祁,字西圃」。皆非是。當作「潘曾 初稿本内夾一箋條:「明姚少師《記》云: 希遷禪師募建殿室於方丈,設寒、拾、豐干 同治《蘇州府志》。」「潘遵祁以下并宜加「國朝」字樣。」「此條二行增入姚宗典詩之

沂,字功甫」。

鐘》第四。 月夕霜晨,猶有餘韵,廬陵膠柱,詰難蜂起,裒而録之,亦聲聞之乘也。《志 拓本,皆如此。惜此寺笋簾久虚 唐鐘鍊冶超精,雲雷奇古,波磔飛動,捫之有稜。余所見寶室寺、景龍觀鐘 ,明重鑄一鐘,又銷爲鋒鐻。然自張繼題詩,

明嘉靖間,僧本寂鑄鐘建樓。 鐘年月可考者始此 鐘遇倭變,銷爲炮。《百城烟水》。按: 唐鐘未詳何時毀。

寺

明唐寅《姑蘇寒山寺化鐘疏》

無言 普明[三]。殿宇粗備,銅鐘未成[三]。月落烏啼,負張繼楓橋之句,雷霆鼓擊,愧李 魔王之戰鬥,上振天宫,緩衆生之悲酸,下聞地獄。所以 ,本寂禪師悟真筌而古德贊頌。實名法器,厥號大音。本寺額號寒山,建始 木鐸徇于道路,周官所以警其頑愚;銅鐘司其晨昏,釋氏所以覺夫靈性。解 提婆尊者現神通而 外道

二九

卷一

壯 白化城之銘。今將鼓洪爐以液精金,範土泥而鑄大樂。舉兹盛事,用叩高 山門,惟祈樂施。啓千門之曉,潜蟄皆興,夙萬户之昏,魚龍盡息。 莊嚴佛土, 賢。增

利益 房,擬鑄銅鐘告四方。 人天。 慧日增明,福田不薄。 試看脱胎成器後,一聲敲下滿天霜 以兹疏告,仰冀垂明。 偈 日 : 姑蘇城外古禪

國朝褚逢椿《寒山寺古銅佛》詩: 「鐘聲似悔 西來誤。」詩互見上《志象》篇。 原注:

俗傳寒山寺鐘聲,似云『懊惱來』。」《行素齋詩集》。

袁翼字穀廉《八秋詩和 江 楓 漁 火認茅庵。」自注: 王窗山 「寒山寺鐘,至今夜半乃撞,知唐人非誕語。」《邃懷 明府韵 • 秋 鐘》一首末二句: 「百八聲清方夜半,

堂詩集後編》。

按 半夜鐘聲,前賢詩論之綦詳,彙録於後。

王直方《詩話》云:歐公言: 句。 夜鐘聲後。」豈唐人多用此語也。傑非遞相沿襲,恐必有説耳。温庭筠詩多纘 「定知别往宫中伴,遥聽緱山半夜鐘。」而白樂天亦云:「新秋松影下,半 說者云: 句則佳也,其如三更不是撞鐘時。」余觀于鵠《送宮人入道》詩 「唐人有『姑蘇城下寒山寺,半夜鐘聲到客船』之

# 在白樂天詩後。

石林詩話》云:此唐張繼題姑蘇城西楓橋寺詩也。歐公嘗病其半夜非打鐘時, 蓋未嘗至吴中。今吴中寺,實夜半打鐘。繼詩三十餘篇,余家有之,往往多佳

句。按:此條見今本《石林詩話》卷中。

《詩眼》云:歐公以「夜半鐘聲到客船」爲語病。《南史》載齊武帝景陽樓有「三更 忠偶不考耳 不知唐人所謂半夜鐘者、景陽三更鐘邪?今之定夜鐘耶?然於義皆無害、文 人,如于鵠、白樂天、温庭筠,尤多言之。 今佛宮一夜鳴鈴,俗謂之「定夜鐘」。 五更鐘」。邱仲孚讀書,以中宵鐘爲限。阮景仲爲吴興守,禁半夜鐘。至唐詩

《學林新編》今湖海樓本《學林》無「新編」二字,此條見卷八。」云:世疑半夜非聲鐘時。某案 《南史·文學傳》:「邱仲孚,吴興烏程人,少好學,讀書常以中宵鐘鳴爲限。」 乃吴中舊事也。以上四則并見宋胡仔《苕溪漁隱叢話》卷二十三。 然則「半夜鐘」固有之矣。邱仲孚吴興人,而庭筠言「姑蘇城外寺」,則半夜鐘

按「四」、此詩爲張繼作,自唐以來無异詞,王觀國獨誤爲温庭筠詩,豈因

庭筠亦有「松窗半夜鐘」句耶?蘇、湖兩地,邱仲孚吴興人,亦與吴中事

復齋浸録》云:《遁齋閑覽》記歐陽文忠公《詩話》,譏唐人「夜半鐘聲到客船」 山鐘。 張繼詩不爲誤,歐公不察。而半夜鐘,亦不止於姑蘇有,如陳正敏説也。又陳 鐘聲到客船。」此歐公所譏也。 泊》詩,全篇云:「月落烏啼霜滿天,江楓漁火對愁眠。姑蘇城外寒山寺,夜半 聞鐘聲,因問寺僧,皆云:『分夜鐘,曷足怪乎?』尋聞他寺皆然,始知夜半鐘 之句,云半夜非鳴鐘時,疑詩人偶聞此耳!且云:「渠嘗過蘇州宿一寺,夜半 羽《梓州與温、商夜别》詩、「隔水悠揚午夜鐘。」乃知唐人多如此。 惟 「昔聞玄度宅,門向會稽峰。君住東湖下,清風繼舊踪。秋深臨水月,夜半隔 !姑蘇有之。」此皆《閑覽》所載也。 世故多離別,良宵詎可逢?」且維所居在會稽,鐘聲亦鳴於半夜,遂 然唐詩人皇甫冉有《秋夜宿嚴維宅》詩,云: 余考唐詩,知歐公所記,乃張繼《楓橋 《漁隱叢話 夜

按

右《復齋漫録》一則,見今本吴曾《能改齋漫録》卷三。《四庫提要》但稱

Ξ

傳本不同,苕溪必有所據。 論,第所引與予不同云云。 曾字虎臣,不言其號復齋也。然元人《愛日齋叢鈔》所引亦如此。疑當時所 。《能改齋》本,末有王直方《蘭臺詩話》,亦嘗辨 直方《詩話》即苕溪所録之第一則,故删此十八

唐 張繼《宿楓橋》詩云:「月落烏啼霜滿天,江村漁火對愁眠。姑蘇城外寒山寺, 鳴於半夜。」予以其説爲未盡。姑蘇寺鐘〔五〕,惟承天寺至夜半則鳴,其他皆五 半夜鐘 

字。

其書名《蘭臺詩話》亦可補元任所未及。

更鐘也。《中吳紀聞》。

按 吴中半夜鐘,其來久矣!又于鵠《送宫人入道》詩:「定知别後宫中伴,遥 吴興守,詩云:「半夜鐘聲後。」白樂天亦云:「新秋松影下,半夜聽鐘聲。」 仲孚,吳興人,好學,讀書常以中宵鐘鳴爲恨。」「恨」,他書皆作「限」字。阮景仲爲 今吴中僧寺,實半夜鳴鐘,或謂之「定夜鐘」,不足以病繼也。《南史》:「邱 七里。歐陽文忠公云:「句雖佳,其奈三更非撞鐘時。」歐公蓋未嘗至吴中。 唐張繼《楓橋》詩云: 「姑蘇城外寒山寺,半夜鐘聲到客船。」在閶門外

三四

聽緱山半夜鐘。」温庭筠詩亦云:「悠悠旅榜頻回首,無復松窗半夜鐘。」何

獨於繼而疑之?《吴郡志‧考證》門。

《南史》:「邱仲孚喜讀書,常以中宵鐘鳴爲限。」乃知半夜鐘聲,不獨見唐人詩 句。 吴聿《觀林詩話》。

石林詩話》:「姑蘇城外寒山寺,夜半鐘聲到客船。」歐陽公嘗病其夜半非打鐘 鐘,不害詩之佳也。如子瞻「應記儂家舊姓西」,夷光姓施,豈非誤用乎?終不 時。蓋公未嘗至吴中。今吴中山寺,實以夜半打鐘。然亦何必深辨,即不打

失爲好。馬位《秋窗隨筆》。按:位字石亭,西安人。《隨筆》刻人《昭代叢書》。

先生《記》。 按: 今新鐘爲陳筱石制帥撫吴時所鑄,藩臬以下皆勒名其上。詳見俞曲園

#### **を一志鐘校記**

一〕 志鐘 鄭氏勾去題後小序。

普明 鄭氏眉批:「「普明」二字,集本無,除去。」旁有葉昌熾批注:「碑本有,見下《志碑》篇。」

「普明」二字,然空二格。

〔三〕 殿宇粗備銅鐘未成 碑本無此八字。

五 按 姑蘇寺鐘 初稿本按語無「蘇湖兩地」及以下各句,且文字有所不同。鄭氏將按語勾去。 《中吴紀聞·半夜鐘》(上海古籍出版社《宋元筆記叢書》本)無「寺」字。

寒山寺志卷二

賜進士出身翰林院侍講國史館提調會典館幫總纂甘肅學政臣葉昌熾

志碑[]

仲、唐子畏兩碣爲最古。捫苔蘚而讀之,剥蝕過半。其餘三四斷碑,僅記檀 故者,并新舊諸碑序次之,識其存佚,間附考證,以詔後來。 施姓氏,無可甄録。歐陽公《集古録》,不遺近刻。今援其例,擇稍有資於掌 張繼留題内翰書」,讀程公闢詩,知此寺舊有宋石。今所存者,惟前明文徵 《志碑》第五。

宋王邮公書張繼詩石刻供

郇公居吴下〔三〕,親筆張繼一絶於石,而『楓』字遂正。」 此 張繼留題内翰書」下,注云:「今禹偁王内翰丁太夫人憂,任其親寫是詩,故 張繼詩第一石也。《吴郡圖經續記》: 「楓橋、舊或誤爲『封橋』。 《吴郡志》程 今丞相王 師孟詩

不題名。」

^ 遺迹。 去。 據。 其自 孟《楓 其二二字。 名。」又疑 内 公,當是其 九 元之并世,亦不應稱「今」。續檢《宋詩紀事》選師孟 石,而『楓』字遂正。」 閱者每以宋宰執中無王郇公爲疑。及檢《吴郡志》 采程 年作相,而母憂正 翰 圖 今惟 注 而 丁太夫人憂,任其毛刻有此二字,不可解,疑是「在吴」之誤。 橋寺》詩云: 經續記》論楓橋之名,謂"「今丞相王郇公頃居吴門,親筆張繼一絶於 則云: 師 此 應是厲太鴻以其不可解而删之。 石 存文待韶大行草寫此詩碑,在三門内 孟 王元之未爲丞相,且無封號,恐非朱伯原所指寫詩者。 初封,而史傳逸之也。 詩,實與《圖 與東壁 「今禹玉王内翰丁太夫人憂,親寫是詩,故不題名。」「憂」下,無「任 唐解元書《募鐘疏》碑對峙,惜石已裂損,地 「邇來寺好尤瀟灑,張繼留 在爲翰林學士時。 .經續記》相合,所謂「王丞相」者,即禹 禹玉爲王 然則寒山寺中,舊當有 得此,方知毛刻《吴郡志 珪之字。 題内翰書。」自注: 西南隅 此詩,即從《吴郡志》采入, 按《宋史》珪本傳,以 壁間 此 親寫是詩,故 若爲 石 刻 玉 更湫隘囂塵, 0 》之舛誤 况師 王 不知 「今禹 Ŧ. 丞 内翰、郇 相 何時失 孟 補此 不足 熙寧 不與 不 偁 題 王 師

更數 十年後,安知不又爲王書之湮没 乎?《鷗陂漁話》「 寒 Ш 寺王郇公書張繼 詩 刻

王 封。」《 郇公非但見於《圖經續記》,憶《蘇沈良方》亦稱王郇公有治小便不通方,但以 史 銀青光禄 年月也。 月,復拜 赦 銜,尚稱『太 封 文恭」下 有「之」字,近刻删去。 參政之前 則。 書加 無 岐國 明文,猶待搜考。 圖 恩時。見《長編》三百四十一。《詔令》六十二載加恩制,略云:『錫 公。 學士 經續記》成於元豐七年,正珪封郇公時也。 注「郇、岐」二字,是禹玉之初封 既 故故 大夫、守尚書左僕射兼門下侍郎郇國公王珪,爲 而勞季言寓書告余日: 原 又考宋朝《大韶令集》五十七,元豐五 在 以 郡開 内翰」稱之。」又胡心耘示以 几 上集第八卷,李清臣所撰《王太師珪神道碑》。 年 國公」,其封 十月。張詩書石 近見王 明清《揮麈 郇國 「考《長編》三百五十五,元豐八年三月庚 ,當在六年十一月甲寅文武官 常在嘉祐。 郇公,已有明證 後録》三、舉熙寧以 杜大圭《名臣碑傳琬 年四月癸酉,王 程詩當作於熙寧三年 其丁 矣!然猶未詳其 母憂,在嘉 金紫光禄大夫,進 後宰 輔 珪 今節録其文 琰 爾 并 左相制 之集 祐 封 以 或 成 以 年七 得封 王未 或 南 之 郊 王

史》本傳與《東都事略》皆不紀,致後世不知,未免疏漏。殆以虚封爲無關輕重 國,具有的確年月可據。且岐國之封,身受祇及兩月,而郇國則閱二年。《宋 即位,恩加金紫光禄大夫,改岐國公。元豐八年五月己酉薨。 仁宗、英宗加徽號,按《本紀》,事在六年閏六月。爲仁宗册寶使。禮成,封郇國公。上 Ŧī. 而略之歟?得此考證,不特可補史文之闕,并足爲《圖經續記》注脚也。 「王郇公封國年月」一則。 年四月,復三省官,爲尚書右僕射兼門下侍郎。上日,御史中丞率百官班賀 元豐三年,朝廷用階官寄禄,超授銀青光禄大夫兼門下侍郎,監修國史。 是禹玉之封郇 同上

按 古、守山兩刻,但未及糾正耳。 仍稱爲「内翰」,又冠以「今」字也?竊謂宋時傳訛已久,并不自文穆始,汲 詳。郇公作此詩,在未參政前,誠如調生先生之説。 事,有《移任長洲》詩五首,見《小畜集》,《郡志》亦采入《藝文》。 王郇公與王元之,一字禹玉,一名禹偁,本易滋訛。 然文穆追書其事,何以 此邦人士,耳熟能 元之曾知 長洲縣

孫覿《楓橋寺記》供

明	
明唐寅《姑蘇寒山寺化鐘疏》無年月。十行。行二十四至二十九字不等。行書。校補者案	紹興十六年七月。文據《吴郡志》録入《志寺》篇。
110	

萬户	而鑄	啼,				字
萬户之昏,	鑄大樂	負張繼	]			字以 一表示,下同。
魚	皋	耀楓	筌而			示,下
龍盡	兹/事	橋	古海			同。
	事	句:	怎			
嚴	用	雷雷	古德☑頌。			
佛土	高	廷皷	Z Z	悲畯		
·魚龍盡□□嚴佛土,利□人天。慧日增明	]高□增壯山門□□□施。		/ 名法器	]悲酸下  地  所以提婆  者		
人	壯山	李立	器。	地地		
天。	門門		, 厥號□□□	所	銅鐘	
慧日		H		以坦	司甘	
增品	施施			延婆[		
明, 垣	冷	判	額	/ 者		
田田	千明	鼓		現神□	氏所	
,福田不薄。	啓千門之曉	爐	建	神	以風	
以以	曉,		始		見夫	
以兹疏告,仰	,潜蟄皆興。	楓橋之句;雷霆皷□□李白□□□□□今將鼓□爐□□□□金	△額□□□建始普明。		〈鐘司其□□□□氏所以覺夫靈性。	
告,	皆衄	範土			解	
仰背	公园	土泥	☑落阜			

]告四方。試看脱□成器□,一聲□ □□進士唐寅書□□

垂明。偈曰:

✓蘇城外古禪

四〇

按 援翁蘇齋《化度寺碑》、范氏書樓《殘石圖》之例,釋其文如右〔四〕。 《六如居士集》有此疏全文,據以録入《志鐘》篇。今碑斷裂,所存殘字, 集本「殿 0

宇粗備,銅鐘未成」八字,今碑無。「建始」下,集本空,碑補「並	有多元为"有力"。这世界和"多之"的"一个"来一点,这是
「普明」二字	17.17
	宇粗備,銅鐘未成」八字,今碑無。「建始」下,集本空,碑補「普明」二字

文

此張繼詩第二石也。今泐存不及十字。 

徴明

寒、拾遺踪 章美題額四大字 翰林學士姚希孟題。 一字一行,横列。年月題款,左右小字,分行如門額式。皆正書。 崇禎癸酉冬,章美書。 住持明五立。

争寺基帖殘石 無年月。共三段。第一段,五行,草書。第二、三段,皆七行,行書。行字不等。前題

名,八分書。

張

寺基俗占已非法,况既受贖價而復不退出,是豪民也。 寺中僧何不鳴于官耶?

閱文太史書字,漫爲書之。

濟南黄山居士「張延登印」、「壬辰進士」印篆文。

寒 Ш 寺

少宗

伯錢

畏! 首 地 飯命之不暇,寺僧善爲彼懺悔之也。 屬三寶□□鬼神護訶。 今寺僧能恢復故地,不獨佛土清净,亦□爲豪氏下缺孽矣!彼如 有侵占者,身墮地獄,殃及子孫。 聚沙居士錢 果報昭然,可怖 議益· 有 知,當稽 書 可

宫詹姚

論 寺宇民居,自當隔列,非獨肅寺規,亦所以嚴□範也。 心嚮道。 穢觸三寶,有韋馱伽藍訶譴。若稍知禮。 凡□□□□□□爲金湯,何得有黄 下缺。按:「黄乾」下,諦視似 乾 」闢門啓實,不 寒山古刹,邇來僧 存緇白 「初者」二字。 之 并精 無

按: 寺間田,虞芮之争,其來已久。 額、在崇禎癸酉、其時住持爲明五、則刻石以鎮 帖》例之,當題爲《争寺基帖》。 即捐館、是此帖尚在鼎革以前、非即廣承事。廣承力守此寺、見《百城烟水》。 此石首尾斷裂,不詳何刻。審其文義,爲豪民占地 據張黄山一帖,文湛持相國實爲禪林護法。 錢蒙叟、姚孟長皆書明時官秩、孟 山門者,明五 而 作。 爲 以魯公《 近之。 長 章 未 坐位 見明 蓋 美 題 此

# 其前有文肅書,而今佚矣!

國朝世宗憲皇帝御製《寒山子詩序》

雍正十一年癸丑五月朔日。宣統庚戌,江蘇巡撫程德全勒石,建御碑亭於山

門内。

前明之後、本朝臣民之上。今謹援其例,昭代諸碑録,宸翰爲首,并恭録御製 雲漢天章,龍蟠螭負。臣謹案《欽定四庫全書提要》列朝御製,仍以時序列於

序於卷端。

梁同書書《陰騭文》殘石 殘字十七行。跋,前二行、後四行。行字皆不等。行書。 文自「人之財

産」起上缺。未録。

乾隆五十有九年歲次甲寅冬十月二十六日,頻羅庵主梁同書書,時年七十

又一

勸善,當不□拙劣也。 寫此篇時,病行格少仄,不能展布,勉强應之。今錦峰世兄業已上石,意在 壬申九月三日,山舟又書。 王應春刻。

章光黻《古銅佛象記》佚

卷二

志碑

四四四

道光壬寅九月,里人摹象勒石,韋君綉作《記》。見褚仙根詩序。詩次《志象》篇。

署蘇州府知府平翰《禁占寺産碑》

庚申之劫,碑、象皆毀於兵燹。

咸豐 四年閏七月二十日。 正書。 文録下《志産》篇。

羅聘畫寒山、拾得象

無年月。跋,正書。見《志象》篇。

鄭文焯畫寒山子象

被《新修寒山寺記》「五」 光緒庚辰,九月既望。 光緒三十二年歲次丙年。孫陛雲書。文見《志寺》篇。 跋,行書。 見《志象》篇。 右兩象并新刻,彙列於此。

俞

俞 越重書張繼詩石刻詩三行,行十字。跋三行,行十八字。草書。有陰側。 詩見前。

丞於寺中新葺數楹,屬余補書刻石。 寒山寺舊有文待詔所書唐張繼《楓橋夜泊》詩,歲久漫漶。 光緒丙年,筱石中 俞樾[六]

碑陰〔七〕。八行,行二十字,行書。

之《中吴紀聞》作「江村漁火」,宋人舊籍可寶也。此詩,宋王郇公曾寫 無存,待韶殘碑不可捫。幸有《中吴紀聞》在,千金一字是江村。」 姑從今本,然「江村」古本不可没也。因作一詩附刻,以告觀者: 今不可見。明文待韶所書,亦漫漶,「江」下一字不可辨。筱石中丞屬余補書, 唐張繼《楓橋夜泊》詩,膾炙人口,惟次句「江楓漁火」四字,頗有可疑。宋龔明 「郇公舊墨久 以 刻石,

碑側一面。五行,行三十二字,真書。

俞樾

矣!光緒丙年,余移撫三吴,偶過此寺,嘆其荒廢,小爲修治,因刻張詩并刻 作「江村漁火」,宋人舊籍,足可依據。曲園太史作詩以證明之,今而後此詩定 張懿孫此詩,傳世頗有异同。題中「楓橋」,舊誤作「封橋」,《吴郡圖經續記》已 曲 據王郇公所書訂正。詩中「漁火」,或誤作「漁父」,雍正間輯《全唐詩》所據本 如 園詩,以質世之讀此詩者。 ,此,然注云:「或作火。」則亦不以作「父」者爲定本也。《中吴紀聞》載此詩 貴陽陳夔龍〇〇

在二 志碑

四六

張繼詩第三石。今與文待詔原碑同陷寺壁。

江蘇 ill. 撫 程德全書《寒山子诗》 詩三十六首,分四石刻。 每石三十行,三行爲一首。末一石,

附跋十二行,行十七八九字不等,均行書。詩未録。

今既謀諸邦士大夫,重修寒山寺落成,復得其詩集舊本,選録如干首,礱諸寺 漁洋山人嘗稱其五言有唐調,不名一格,蓋所謂「詩雜仙心,超以象外」者也。 沙門道南爲之記,始有傳本。明吴、計兩家復校刻,并爲一卷。别本世所希見。 句於寒岩竹木石壁間,因令國清寺僧道翹纂集成帙,凡三百餘首。宋淳熙中, 右《寒山子詩》,唐《藝文志》入釋家類,作七卷。 世傳台州刺史闾邱允得其題

其大旨多諷時勵俗之作,以幽隱歌笑出之,豈辟世而非遺世者,乃托言

程 德全《重修寒山寺記》[九]石本未見。文録《志寺》篇。 「豐干饒舌」邪?爰識數語,以質後之攬者。 宣統庚戌九月,雲陽程德全記。

江 蘇布政 文録《志寺》篇。 使陸鍾琦《重修寒山寺記》 宣統 三年歲次辛亥六月廿八日刊石。 分兩石刻,每石三十行,行自十四至十七字不等,正書。

鄒福保《重修寒山寺記》三十二行,行二十二字,正書。文録《志寺》篇。

宣統三年辛亥夏

四月。

寶山印康祚號印川《偕調生寒山寺柘碑題壁》詩: 往來詞客幾留踪。衆前拈起椎兒示,白日來敲夜半鐘。」 橋夜泊踪。聊與寒山生個事,一雙碑響替霜鐘。」再題云: 著有《蜕翁詩録》、《吹網録》、《鷗陂漁話》,又輯《蜕翁所見詩録》。 按: 「故人供 調生先生名廷琯,出吾宗東山支, 《鷗天閣集》,并見《蜕翁所 「碑下趺跏倚短筇, 具勸扶筇,來訪楓

### 卷二志碑校記

見詩録》。

- 本大致 志碑 爲最古,自難鐭舟求劍。 相同。 初稿本題後小序作「前賢碑目皆斷自宋元爲止。今寺中無古刻,以 鄭氏勾去小序。 按歐陽文忠在宋初,而《集古》所録下及五季,亦未嘗遺近刻也」。 明文徵仲、唐子 下與 畏 兩 刻 碣
- =居吴下 《吴郡圖經續記》(烏程蔣氏景宋本)卷中作「頃居吴門」。
- 字,尚剩上半「兰」,當是「前」字殘文。 初稿本、刻本均爲「鄉貢」殘字。《吴郡文編》卷九十八作「前鄉貢」。諦視殘碑,「鄉」上確有
- 〔四〕 援翁蘇齋至釋其文 鄭氏勾去,改「録」字。

卷二 志碑

四八

五 陸鍾琦等十人捐銀。 新修寒山 寺記 按:碑記爲四石、每石二十五行、行十字、楷書。後列陳夔龍、陳啓秦、朱寶康、 末有刻工落款:「唐仁齋雙鈎刻石。」石嵌迴廊壁間

〔六〕 俞樾 按:下有「乙丑重陽,汪定執敬觀」。

七 碑陰 按、末有「汪定執敬觀」、「漢貞閣主人唐仁齋鎸字」。

張懿孫至陳夔龍 鄭氏勾出本節,并眉批: 「至無 味。」

九 列捐資題名八十四主。 不等,楷書,長洲周梅谷刻。 重修寒山寺記 按: 碑植鐘樓内,道州何維樸書,宣統三年月日。 「大清宣統三年,歲次辛亥,孟夏上浣勒石」。 碑陰、張人駿、程德全《募修寒山寺啓》、楷書、文録卷一《志寺》篇。後 篆額,正文十八行,行四十字

# 志僧[]]

詩云云「高僧不易逢」。 星落落。至前明桑海之交,故老遺黎,緇衣遁禪林中,始有可傳焉!文子悱 吴中山水殊勝,浮杯飛錫,時有古德往來。 支、帛道場,條衣不替。 燈,若明若滅,豈金閶近市,湫隘囂塵,不足以安禪悦乎?宋、元僧史,晨 《志僧》第六。 惟寒山

宋有遷老、温老,梵行皆未詳。法遷詳於孫覿《寺記》,又見《示遷老》三詩。舊志

肩齊。白浪噴鷁首,黄塵送馬蹄。憧憧南北路,一榻有高栖。」《吴都文粹》并《吴 又載仲益《與温老》,詩云:「閶闔層城外,寒山古道西。若人具眼隻,與 佛拍

郡志》合纂。

《南蹌跧上人之平江》詩:「詩囊和月横挑去,穩泛楓橋夜半船。」「上人」, 按:南宋俞桂字晞郗,錢唐人。《漁溪詩稿》有《楓橋寺》詩一首。録下《志詩》篇。又有

疑亦寒山法侶也。

明初,有道性庵。平顯《松雨軒集》按: 接三生舊,終謀半日閑。明年理歸楫,持以叩禪關。」據《松雨軒集》纂。 庵住寒山寺》詩云:「蘭若黄金地,楓橋碧水灣。春風上方路,秋色太湖山。既 顯字仲微,錢唐人。洪武初,官廣西藤縣令。有《道性

天與名廣承、吴江計氏、持誦不輟、古朴有德。順治初、汛官戍此、幾爲署。師苦 繼性庵而起者,有慧公。袁永之《送慧公之京》詩:「寒律窮陰紀,晨征戒遠游 與白雲同。溪水看清净,寒山對苦空。何時聽説法,爲我暢元風?」據《胥臺集》纂。 愁。」又《送慧公住持寒山寺》云:「古寺人天外,精廬杳藹中。 君依蓮社去,心 浮雲望飛錫,細雨送孤舟。朔雁遥天外,霜楓古渡頭。歸應沾一命,休憶故園

守殿 隅,觀 察壽 公護之,始得復。 今寺中所遺,皆其力也。 **一**百 城 烟 水》。

性能 性 號法 能 華」。 勸 華 其捨宅爲寺,募四十八 寓 工未畢而 寒 Ш · 寺。適逢鼎革,四處焚劫,松陵徐瑞宇素奉三寶,皈依禪宿 殁。 《百城烟水》參金文通《法華 願,仍捐橐千餘金,營構殿堂寮廡,名其庵 一禪院 碑 \* 按: 法華庵,在寒山寺隔岸聽

橋之西。

性

能圓寂

,新構精廬尚

未落成,是終於寒山

寺也。

在昔,學詩於葉星期,與黄九烟、殳山 以 切,終不去寄迹《兔園》一册,以糊其口。今子之殁也,子之徒罄簡子所遺之瓶 不 休片語,下筆如有神也。其敷座而談教乘,勦襲注疏,絶無心得,依樣胡盧者, 文,曰:「某年月日,方外友葉變,以清醴一尊、苦茗一 才輩 可 不若子之長城五言、隻語彈丸膾炙人口也。以子之才,亦既充 而稱 如 日 貫休、齊己、皎然輩?以子之瀟 也?子蕭 嗚呼!在昔子何爲而死耶?今之衲其衣而髠其頂,妄踞 師 ,胸無墨瀋,信口囈語,拾禪家一二剩吻以自誇者,曾不若子之惠 然 一瓢,托迹古寺,不欲效乞食輩日 「夫諸公相唱和,年未五十而殁。 灑 胸襟,寓情物 奔走 外,何 甌,告於在昔開 | | | | | 遽 中,即 之以 不 口 南座 星期祭之 學,何遽 如 飢 參廖 以 士之 驅 號 迫

《在昔詩僧苦行録》,吾宗星期先生祭文一首,宗風戒律,略見一斑。至其酬答 鉢 詩什,見下《志詩》篇。 方外詩人之冠。 子之從予游,且十年矣!子之學詩,發憤直欲凌古人。與予或月一見,子詩必 以 而 拊 即死 爲 ,祇餘三十八文、舊衲質券數紙,此外并無粒粟寸布值半銖寸錢之物。此其 以 ;膺而揮泪耶?子之同學聞子之殁也,無不頓足長歔,僉謂詩道賴 小進"或經年一見,子詩必一大進。吾嘗謂子使天假以年,竟可獨立爲古今 今者長夜何時旦耶?行將搜子遺稿,亟梓之行世,此亦詩教盛衰之所繫, 何如人?其懷何如懷耶?方外之徒,原無所論於壽命之延促。然世之可 慰子之寂靈,一以慰同學之永懷也。 而不死者,千百其群,可以未死而即奄然長謝者,子何獨罹其酷也? 將毋天之忌子,年未五十而竟死耶?此真風雅之缺陷,能不 嗚呼!靈其知之。」《己畦 集》。 以 干城,

梵公,亦未詳何許人。徐臞庵《丁巳秋飲梵公寒山寓齋》:「一杖來吴苑,秋光迥 看 丹楓?」又《過寒山示梵公》:「山夫已病嘉生死,世事年來不可言。消遣 清言聆惠遠,高隱遇梁鴻。 世路寒山外,人烟夕照中。何時移 釣艇,江

自携詩滿袖,寂寥誰置酒盈尊?高僧松樹催詩句,處士梅花入夢魂。 愁絶聽

五二

鐘橋畔客,滿船風雨易黄昏。」《百城烟水》。

按: 雲來往,偶然駐錫,在宗門中爲流寓,非如在昔之爲住山僧也。 游客,邂逅相逢,更非梵公之比,故不列此寺,别詳下《志游》篇。 又按:鴻慶居士所稱「沼公」、「悟上人」之類,一住虎邱,一住能仁寺,同爲 寓齋,又有「一杖來吴苑」之句,以梁鴻廡下爲况,則梵公之於此寺,不過閑 《百城烟水》「寒山寺」録此兩詩,次在昔詩後。 觀臞庵詩,既稱寒山爲

## 卷二志僧校記

(一) 志僧 鄭氏勾去題后小序。

#### 志産

元以後, 府經劫火, 嘆鐘梵之銷沈, 等樵蘇之不爨。 今有田如干畝, 後圃廣 寒山古刹」、「封橋常住」,見於金粟箋印。但以歲久籍亡,履畝無考。

場 灌 袁 ·蔬笋,可供清衆,皆賢有司之助也。所願法幢高座,謹持木叉,庶幾

量鼓善緣,無虚檀度。《志産》第七。

明 其 末,有豪民黄 事,并 有 黄 Ш 、乾□者,侵占寺基。 居士張延登暨錢宗伯、姚學士三帖。詳《志碑》篇 住持某僧搘拄法門,請於文肅公,書石證明

或 地 朝 ,造屋招租,爲 咸 豐 四年,内 閣 寒山寺香火。 中書趙文麟、前廣東鹽運使司運同周曾毓等,捐置寺旁隙

署理蘇州府知府平翰給示碑

買 + 運 有 圓 禁」等情。并 一寺旁 盗 物 可 賣 故 都 周 爲 隙 + 曾 給 伊 以 地,起造房屋 六 毓 示 徒 及 圖。寺久 勒 據闕呈印契 被被 僧擴壽亦頗謹守。兹因擴壽已故,住持僧人非老 或 石 子 人 永 監典籍銜文生高誠赴府禀稱: 覬 禁事。 、失修,經住持僧果圓募捐修葺。 奈寺無恒産,職等募捐,置 覦 ,招租收息,作爲寒山寺香火薪水之資,契經投稅。 恃 三紙到府。據此,查寒山寺向無寺産,該寺香 强謀占情事,爲將印 據 內閣中書加四級趙文麟、趙文龍、前廣東鹽運 契三紙 「竊 楓 黏呈,乞賜給示,勒 鎮 有古寒山寺, 即 幼,誠 火、住持薪 恐將 在 吴治 使司 來或 僧果 石 永

五三

五四

將前項房屋妥爲經理,永遠遵守,毋許盜賣廢 住 水無資。經該 示 持僧 ,勒石嚴禁。 人薪水之需,洵屬善舉,殊堪嘉 紳士等募捐,置買寺旁隙地,建造房屋,招租收息,以 爲此示,仰該寺住持僧衆及軍民、地保人等知悉: 尚。 除 將 弛。 呈到 如 有 印 地 契三紙附 棍 匪 徒 卷 覬 自 抵該寺香火 観、恃强謀 外,合行給 今 以後,務

計開:

占者

許

即指名禀候拿

究。

地保徇隱,察

出并提,重

處

不貨。

其各凛遵毋違,

特

一契得高

賡裕,

價紋銀柒拾柒兩。

布字貳伯叁號。

契得吴鐵 華 秋岩、蓉塘,價紋銀壹伯拾 貮 兩。 布字貳伯肆

契得 陳 周 氏 同 子 亦梁,價紋銀 貳伯陸 拾 兩。 布字貳伯伍號。 俱元年分投税。

四址:南,□□寺□□。北,官街。東,□屋。西,許屋。

豐肆 年 以 閨 上 一隙地 柒 月二十日示二〕。 起造 樓房貳進,計貳拾捌間,招租收息,立有寒山寺香産界址。咸

宣 統 三年,長洲縣吴姓兩孀張氏、黄氏,因義田涉訟。署縣事趙夢泰屢鞫不

服 後令張鎔萬集兩造開導,訟既息,勸酌捐田畝,各以二十五畝充寺産

陸鍾琦《寒山寺吴姓捐田始末記》

記者。 廢。 僧 訪 之所寄,而未策久長耶?抑亦顯晦之有定也?於寒山寺吴姓捐田一 輸 集 不 徒 款 大 百 古 車 相 田 (夫所提倡,登臨覽眺,極文酒之盛。 下,至欲盡捐其田 於 畝 既 項 伊 流 近數十年,經行之室、禪誦之堂,零落殆盡。 凡一事之顯晦,往往 公,鳩工 寺, 始, 連, 義 無所依賴,而龍象尊嚴亦恐無以持永久。適長 寺自唐張繼《楓橋夜泊》一咏,膾炙人口,遂占吴中名勝之一,乃屢 田 即以保存古迹爲念,而於寒、拾遺踪,尤亟亟焉謀興復。 以息訟。案未結而他調,繼任 輒以精藍勝迹委弃於頹垣廢址間爲憾。歲庚戌,雲陽程公來撫是邦, 涉 庀材,不數月而樓殿廊無規模粗備。 訟。前署縣趙令夢泰以屢鞫不服,深嫉其所爲,欲有以振 以爲快。張令以始末見告,余曰: 有不期然而然、非可强而致者。觀夫名山古刹,偶經賢 張令思援前斷 乃閱時未幾,仍歸闃寂,其爲一時 海内外文士凡至吴中者,靡不 惟是歲月遷貿,不稍置寺産, 洲吴姓張氏、黄氏 以 解紛,而 「是大不可 兩 造 爰命鍾 事,尤 負氣争執 勵之,令 兩孀,因 琦籌 更興 有足 )興會

五六

品 時鴻爪長作因緣,此又鍾琦所企願者也。田二十六則,田單二十六紙,所有 寺僧其善保守焉!以無負兩賢令維護之盛心。更望此邦士紳有以管理之,庶一 以二十五畝充寺産,都五十畝。斯寺甫修,適有是舉,殆事之顯晦有定者耶? 使張氏出資,黄氏歸産,訟遂息。案既定,從而勸令兩造,自行酌捐田畝,各願 導,彼此始感悔。 輩治事,務得其平。」張令深韙之。歸而重集兩造,專案開庭,自申交子,反覆開 藉以平其争而爲好訟者之鑒則可。 畝、號分、坐落、四至暨捐者姓氏,鎸列於左。 ,以争義田,故纏訟越稔,是誠薄俗之宜懲勸者。 惟此田已入奏案,張令爲之假定田價,責其親長料理購置, 若聽彼出於一朝之忿,必貽他日之悔。吾 是爲記。宣統三年歲次辛亥閏 責令稍輸其田以助斯寺,

按:此記,陸文節公赴太原時,馳書見示,未見拓本。科則坐落,既未附後, 不數日而國變作,今鎸石與否亦未知。

〔二〕 示 今碑本「示」下有「發寒山寺勒石」六字。〔一〕 □□寺 碑本「寺」上存「山」字,當是「寒山寺」。

志 游[]]

與把臂入林乎?《志游》第八。 猶足令人憑吊,據懷舊之蓄念,談禪林之逸軌。 平、臨硎諸峰。春秋佳日,篾舫笋輿,靚川淑野。今雖屢經浩劫,斷甃荒烟, 寒山負城面市,棹扁舟出閶門七里,即望見蘭若。 彼君子兮,噬肯來游,其相 其地近接虎阜,遠瞰天

宋范文穆《吴郡志》「寒山寺」下,有孫覿《示遷老》詩三首,亦見《吴都文粹》。仲 余。」又似以僧房爲旅舍,或在去官後乎?《贈沼老》云:「虎邱沼老,豫章詩 有《贈沼老》云:「與余相遇楓橋方丈。」又有《悟上人索詩》云:「來楓 益守郡,正在遷老興寺之日。考《鴻慶居士集》,仲益寒山寺詩,不僅此三首, 橋訪

僧也。 堪 訪 遇。詎復管中窺,看沐南山霧。」」又《悟上人》一首云: 漁磯,曳杖叩僧户。忽逢 極老人』之句。 不落江西派,肯學邯鄲步?冥搜自天得,妙中有神助。夤緣半日留 似 ·]酬對,已入維摩不二門。」」 ,堪笑窮郊作許悲。]自注: 余索詩、賦 聞孤 與余相遇於楓橋方丈,誦所作《徐獻之侍郎生日》詩,有『東湖孺子,南 月口,能説落星心。」『老去都將筆硯焚,相逢相問只寒温。 兩絶句: 余愛其工,賦小詩寄贈: 『撚鰤 丹霞侣,自誦碧雲句。 吟鬚皺 韓吏部詩云: 兩眉,鏤冰琢雪等兒嬉。 『落景下層城,遥烟 『有窮者孟郊。」郊《聞鷄》詩云: 噌吰應黄鐘,清絶追《白紵 「能仁寺悟上人 起孤戍。 解啼 一,邂 孤 更無一語 來楓 近一 繫舟著 月 如鷄 笑 橋

明竺塢文氏,風流文采,照映江左。玉蘭堂、青瑶嶼皆在城西,一門裙屐,時往來 《寒山 松。迂徑原 於寒山寺。 春 尋古寺幽,相與話前修。 · 寺訪僧不遇》詩:「寺古殘陽冷,經聲雜晚鐘。 難到,高僧不易逢。都將方外意,付與一枝筇。」又其先父和 今雖履綦銷歇,而考其家集,猶有游踪可記。文肅 名豈寒山得,詩曾張繼留。 引 流縈白草,留 樓鐘虚夕照,橋影急 父子 悱先生,有 雪點青 州 詩

河流。尚怪石龍柱,拿雲勢未休。」據文嘉《和州詩》、文元發《蘭雪齋詩》纂。

難同。 一洋山人《夜雨題寒山寺、寄西樵、禮吉》二首:「日暮東塘正落潮,孤篷泊處雨 瀟瀟。 夜已曛黑,風雨雜遝,攝衣著屐,列炬登岸,徑上寺門,題詩二絶而去,時以爲 十年舊約江南夢,獨聽寒山半夜鐘。」先生至蘇,舟泊楓橋,過寒山寺, 疏鐘夜火寒山寺,記過吴楓第幾橋?」「楓葉蕭條水驛空,離居千里悵

狂。據《精華録箋注》、戴延年《秋鐙叢話》合纂。

或 [初殳丹生號山夫,寓寒山寺,與松陵徐崧臞庵、葉燮星期往來唱和。 殳、徐詩,見 者、悉如山夫言、但松鶴堂已易主矣!已斐仲來過予、予始識之、訊松鶴堂、 即别去。今癸酉冬,予復過寒山,上人在昔留予度歲。予因訊及所謂松鶴堂 堂。登其堂者,斐仲飲食之無厭。先生盍訪之乎?』予時適事北行,不能留, 書,爲予言: 『里中有殷子斐仲能詩,所交皆一時賢者。築堂於所居,曰松鶴 咏之盛。文曰:「余三十年前,過楓橋之寒山寺,時故人殳子山夫憩寺中讀 百城烟水》。星期有《松鶴堂記》,爲殷斐仲作。按:斐仲名麗、《百城烟水》采其《楓橋》詩 徐崧有《斐仲招飲寒山》詩,即其人也。亦吴閶之勝流也。録其文,可以見當時觴

烟水》。 事之物,孰爲可留而長存者?其亦思爲其所以存者可矣!」《己畦集》參《百城 即張繼寒山之詩乎?松鶴之名可長存於天地間矣!余因不勝太息於人世之 寺肇於梁,至於今不知幾經興廢。天下佛刹之流傳,或有或無,天下人安能盡 猶然尚存,則以斐仲向日好賢之雅,而『松鶴』之名尚在人口也。予以爲寒山 年姚、李諸公亦相繼物故,人與堂俱爲陳迹,等於飄風斷草。 鶴堂詩文,裝潢成方軸,而山夫所題在其中。予又嘆息山夫化爲异物,逾二十 出一卷示予,皆四及里中高賢與知名士,如李灌溪、姚文初諸前輩所贈題松 知而道之?惟寒山則人無不知而能道之者,則以唐人張繼『月落烏啼』一詩, 又悉如在昔言,予爲太息久之。斐仲貧不可支,而愛賢樂友朋,意氣猶在 人人童而習之。寺有興廢,詩無興廢,故因詩以知寒山。今松鶴堂之詩文,其 然松鶴堂之名, 一己

王 昶《袁又愷漁隱小圃記》" 楓橋之水從梁溪來,過橋分支西南流,别爲 村山齋。 又有橋,名江村,其南則袁子又愷漁隱 岡齡師沈文慤公,工小詩,畫仿文待詔,往往招集勝流名士,作文字 小圃在焉。圃之先爲王岡齡居,名江 西塘。

夫 飲 拓 過 而 具 吴者 新 見所刻《西塘酬唱集》中。 之, 名 拿 漁 舟 造訪 隱 小圃。於是春 填 咽 於江 又愷之兄,岡齡女夫也。故是圃歸袁氏,又愷 村橋 秋佳 日,復 南北,尊 命儔嘯,侣 酒 飛騰,詩卷參 無 虚 日。 互, 而 更非 遠方 出 賢 龄 士大 所

能

逮

矣。

《春融

堂

集》。

錢 大 嘈 法 幾 曲 去手。 其 雜 樓 昕 螺之鐘 即 又 五 硯 先 謀 得 則 子 世所治: 硯 藏 谷 其 蓋嘗裴回徙 磬,招之若相答也。 樓記 書之所 虚 永之先生物 樓 先生廉吏石硯, 几 \* 面 惟 洞達,迥出 爲 袁子又愷向居金閶亭畔,題其讀書之室曰「三硯齋」。三硯 倚焉,而 兹樓宜、名其樓日「五 介 也。丁巳歲 隱 先 并前 前 埃壒。 生物,一爲 不能 俯 青 所 澄 去也。 靈岩、天平之紫翠,望之如可 藏 碧,旁植 浦王侍 而五。是夏,又愷 謝湖 《潜研堂 一硯」。暇 郎 花竹。 草堂硯,則尚 以所 主集》。 日 藏清 挹 坐樓 風土之清嘉,屏絲管之 移 容 中,甲乙校讎 歸 之先生物; 居 楓 1: 橋 硯 摘 舊居 贈 也,支硎 又 八愷。未 一,丹黄 爲 甫 卸 列

陸 鼎《漁 江 之西 隱 塘 11. 有 圃 甫 雅 集 日 「漁隱」,爲讀書之所,其地 圖 序》 漁隱主人爲六俊諸孫,耽吟好客,能世其家。 則 唐詩人張繼泊 船 處 也。 居 其 楓

圃,竹 盡碧,無不翛然意遠,想見玉山清閟之勝,而仿佛其人。 足以致之?《梅葉閣文鈔》。 以巨册連書之。 四方名士,常相過從。歲丁巳秋,叢桂盛開,主人張筵飲客者三日,人各有詩, 樹幽森 ,廊榭繚曲,一樓當西山之缺,晴翠飛落几席間。登斯樓者 屬余爲圖,以冠其首。亭林觴咏,東南罕覯,非主人之賢,烏 於是吴之詩流,以及 「衣裾

朱綬《翠薇花館詞序》: 癸酉秋,余識戈君寶士,因詣君江楓漁火之鄉。 門,雙橋 止堂集》。 石、松竹之屬。 余每過,君必延致余所素相識而居與君近者。 如是者,一歲必 三四,必有豐肴嘉醴,極燕衎之樂。又必爲慢詞令曲,以申寫其中之志趣。《知 夾於左右。登其堂,蕭蕭寥寥,曠然以清,齋有古圖史。庭蒔 雜花、 清流繞 苔

戈載《徵招詞·題朱立齋楓江草堂圖》: 鐘聲一杵寒山近,空簾片雲飛起。竹徑 北 掃蒼苔,有林泉清致,琴書塵静洗。 窗 開 能幾賞音人?鷗盟冷,霜楓 展緗帙,古香盈几,屋角春星,門前秋水, 更添愁思。 隔岸結比鄰,賭花間

吟事。

《修簫》曾共擬,倘商略彩箋銀字。

好携酒、晚唱滄波、把釣竿還理。

原

注:「立齋詞名《楓江漁唱》。」《翠薇花館詞集》。

農先生,家於葑門冷香溪,後遷滸墅。今磐卿卜宅楓江,與僕結鄰而居,名 其室以志先澤。」詞未録。 按:順卿又有《喜遷鶯》詞《題惠磐卿冷香别館圖》,序云:「磐卿之高祖半

將志凝字澹懷,有《木蘭花慢》詞一闋云:「對江楓漁火,畫橋曲,舊蕭齋。 波唱起,有點點霜楓,星星漁火,都是賦愁地。」皆爲戈順卿作也。《翠薇花館詞 我鷗邊泊宅,女墳湖渌平揩。」又王嘉禄井叔《摸魚子》詞,前半闋有云:「烟 剩 客淮浦。博得天涯小住,香爐茗碗詩牌。 石詞名,翠薇花影,裙屐談諧。推排,鬢絲换盡,更囊琴身世橘逾淮。 酒闌清夢,烟霞芰製,風雪芒鞋。 鄰街,玉驄鈿舄,甚蕉梧凉雨此荒階。 朋儕俊賞都乖。閑賦手,澀吟懷。 原注: 時君 記白

按: 城烟水》。 袁壽階,爲漁隱小圃。顧千里思適齋,距其地亦不遠。最後有戈小蓮父子、 《姑蘇志》:江村橋,在楓 皆因張繼詩得名也。 **、橋西南。又有聽鐘橋,在寒山寺隔岸。見《百** 王岡齡江村山齋,尚在乾、嘉盛時。 其後歸

小蓮名宙 襄,著有《半樹齋集》。其子即順卿先生,名載,工填詞。 陸東蘿、損之、朱立齋、紫貴。 惠磐

六四

導師

卿

楓

江壇站,極一

時之盛。

惜其時寒山宗風零替,如游蓮社,無遠公以爲

又按: 舟行雜 《東蘿遺稿》卷三有《自楓江泛舟至西山道中》二首、《自楓江至當湖 咏》二首,起二句云:「一棹過江城,鄉音已漸更。」又《辭家》二首

張緯餘《游楓溪記》: 主,今亦置之蔓草荒烟之間而已。 段若膺諸先生咏觴是樓。 望天平、靈岩諸勝。「是樓也,爲袁君又愷所建。 寒山寺。寺近市,甚囂塵,至則如入山 河之至思適齋,讀其祖千里先生零星筆札,因飯於河之所。 回首 此 地去五硯樓不遠。」乃過寺濱,又折而 楓 江江上橋,覉人於此漸魂銷。]是先生所居,去寒山寺亦 " 壬子八月二十四日,余自秣陵還吴門,道 袁君尚有竹柏 余生也晚,無能指其所在。]乃與河之游虎 林中。 樓,殁未及三十 由大殿至後樓,徘 東南,有樓特起, 吾祖千里府君,嘗與錢辛楣、 年,是樓已三易其 經 午後,與河 徊良久。 四 楓 橋,訪顧 面 不 遠可證 洞 達,可 之游 河之 君

邱而别。

《仰蕭樓文集》。

〔一〕 志游 鄭氏勾去題後小序。

志事「

叢書始於陸魯望,言不名一體也。 故實、余既以類編次、削贖將竟、其有無可附麗者、彙而書之。雖咫見瑣聞、 寥寥短簡,亦足以資談助也。 《志事》第九。 雜記起於葛稚川,言不名一事也。 Ш

明 音》。 榜」,吴文之號與成,庶吉士。 之 仁和倪謙有《題國子吴檢討先些四景》詩,其二: 塋域,未詳屬於誰氏。但據標題,必與寒山寺爲鄰。今録其詩曰: 孝由庶吉士出爲推官,孫尚儉高蹈不仕,曾孫安國亦以進士 佳傳》,萬曆庚辰 考《郡志·人物傳》,吴尚書一 進士、襄陽知縣。 吴瀚號受之,副都御史。 鵬,四世皆有傳。 又考《選舉表》「正德十六年,楊維 日《楓橋月落》,日《寒寺鯨 尚書以 無歷官檢討者。 改知 編修起家,子子 縣。 又《 楓 楓 吴 聰 橋

水

殘火,估舶争開 通橋, 隔闔闾 斜月將沈斗轉杓。 城,夜半蒲牢吼地鳴。 趁早潮。幾度吟詩憶張繼,鐘鳴山寺夜迢迢。」右《楓橋 兩岸秋聲隨籟發,半篷寒影帶波搖 度嶺微分山寺曉,穿林偏帶野泉清。 漁舟乍起 月落 影。「招 高

提遥

复徹

三千界,次第頻連百八聲。獨有思親情倍感,烏啼月落夢魂驚。」右《寒寺鯨

低

吹

據《倪文僖詩集》纂。

寒山臨 桃花 靈岩 册 畫 霜 墮 太湖、石湖、實有十二景。 印、 烏 烟 \* 雨。 場,三姑蘇臺,其四即 舊 共 流負郭,招提近市,雖無岩壑之勝,以張懿孫一詩,前賢攬古,得與支硎、 「聽鸝 垂篇什。歸安陸 藏 荒涼古寺烟迷蕪,張繼詩篇今有無?」下鈐「潤 漁火青熒泊棹時,客星寂寞聞鐘 天府 館主 以以 藏 四字爲標題,如 書畫 ·存齋觀察心源藏文衡山《姑蘇十景册》: 印」、「芝農家藏」諸朱記。 爲楓 今録其《 橋。 「洞庭春色」、「滄 楓橋》詩 又有支硎、 處。 云:「金 水明 天池、虎邱、靈岩、天平、堯峰、 浪清 人静 又文 閶 西來帶寒渚,策 州 夏」之類,其 五. 戴 江 峰 植 城 党戴培 亦有《姑蘇 孤 依 虎 然落 之鑒藏 九 Ш 策丹楓 爲「江 橋, 十景 月啼 書

村

漁火」,不題詞,後署「五峰文伯仁寫」。

據《穰黎館過眼録》、《石渠隨筆》合纂

寒山寺僧某,有一力甚勤,然不得於少主,逐之。 於 主所知!但取一房老小,不失爲人。否者,亦聽若耳!」後十五年,其人率妻 矣!爾第入,質明相遣。」其人伏地請死。將旦,贈以斤金,曰:「亟去,毋爲 楗 有 發有聲。僧曰:「爾恐我耶?爾爲此不法之事,倘聞於不相得之主,爾無命 物 寒山僧舍、詫謂:「力不如者、此老僧也。」張大復《梅花草堂筆談》。 來謝,自言有百金裝矣!時世長在僧座,見其人,聞其事。袁石公嘗閱書畫 蠕 ·蠕,偵之則人也。 迫而察之,乃所逐者。僧默無言,謹其楗而卧。 夜半, 夜風雨,僧從電光中見屋脊上 少

聖 祖 獻 里 之,密購 撫 擁塞 蔬果。秋七月,復赴揚聽審。回蘇時,比户焚香遮道,自楓橋至葑門二十餘 江南。時兩 南巡,問"「張伯行居官何如?」又問"「江南還有如此好官否?」即令巡 不可行。吴翌鳳《遜志堂雜鈔乙集》。 疏稿,捏款揭參。 江總督噶禮大張威福,公劾督臣營私壞法,請正國典。 上命俱解任聽審。公審畢回蘇,寓楓橋,士民雲集 總督聞

江徐釚,字電發,號虹亭,晚號楓 討、乞歸。著有《南州草堂集》、《鞠莊詞》。考《虹亭集 江漁父。康熙中,由薦舉博學鴻詞召試,授檢 自序》云: 「先君子築

宿 又 西 於地,故昌亭詩爲少。」據此,則南 風書屋。」錫 爲 忽老矣!詩文稿仍繫以『南 **小遠,當** ,皖江 Ę 赴皖《滸墅夜泊》云: 松風 池 來 都 吴淞之西、澈浦之東。太倉王奉常題其額,日南 「我 ,堂之中藏書數千卷。 年貰酒對愁傾。 書屋」者、蓋在吴城西、其僑寄之地也。 是别離聲。」辭家之作,亦多興起於「月落烏啼」一什。其寓 是舊漁父,飄然東海東。」又《題雪 與寒山 .詩十之三,齊、魯游詩又多於皖[四]。 山錢礎日《序》云: 寺鐘梵相聞。 繞街 「片帆 月黑鐘初斷,三匝烏啼夢未成。夜半 ·州草堂」者,不忘先君子之志也。徐釚 先君子 纔過 及晚年倦游 《南州 州老屋爲其先業,童時游釣 ,既即世,堂亦圮三一。 寒山寺,暮雨瀟 草堂集》 灘釣 歸,有《漁村詩和 徐子 《昌亭集》中有 叟圖 不 瀟畏 讀書姑蘇,其登臨贈答 名一 \* 州草堂。壘 「我 遠征。 種气三,昌亭草 余遂漂泊 亦 I 之所。 楓 金昌雜 部 估客吹燈依岸 石爲 江 鄰舟彈獲索, 齋 書於城 曹子清韵 舊漁父,雪 几 去楓 山,疏 詩 所謂 方,今忽 八首。 十之 橋殆 西 「城 限 松

灘可許得平分?」 蓴鱸之思,不在垂虹,而在楓溪矣!既自號楓江漁父,又繪

物,今歸 逢异[六],兄弟相依出處難。 楓 江 漁火圖》[五]。松陵翁雒有詩《同徐丈雪廬作》云:「圖爲徐虹亭檢討故 其族孫山民待韶。『白髮蕭蕭篛笠寒,半生春夢記叢殘。 薇省頭銜簪筆冷,松陵烟水釣船寬。 知 如 交常感遭 何 一闋

^

漁家傲》,贏得鷄林貴素紈?」」據《南州草堂集》、《小蓬海遺詩》合纂。

虹亭集》又有《 申、俞 開 亭 法 明 又《祝江 華庵。 堂去,常愛清流笑語同。 句云: 在,應記開元鶴髮翁。」自注:「指公於五 村 居 無 相 、殊、家 楓 其東南爲積善律院。 「風 近,亦爲寒山 庵指公八十壽》:「挂 向江郭流 介白爲方外交。」今聽鐘 之鄰刹矣。 澌急,寒逐郊原細草生。」賦 蓮 座 而 |經聲依佛日,石床花 却條衣丈室中,貪煨芋火老 江 據《南州草堂集》纂 楓 庵獨 橋畔 迷其處所 十年前,與 小 刹 雪中風景,自是近城蘭若。 爲 從 雨散春 或 周 張繼詩得名,又與虹 安期、 初 江楓。 徐姓捨宅所 風。 翁 劫 仲謙、吴茂 逢龍漢分 不隨時輩 建之

楓橋》一 首 結句云: 「灾傷連數郡,米價幾時平?」自注: 橋 邊有米市。」

吴

꽢

鳳《

懷

舊續集》:

馬

元勳字成章,號雲曹,吴江

布

衣,有《蕉

雨軒詩鈔》。

卷二

志事

寒 Ш 水。大爲 事 銜 諸 前 倉 肥 Ш 内 又 Ŧi. 海道 首 白 地石 吴竹 接 斗 出 其私。」 不 故老云: 遠, 仍需 其 達於 洋 茆、 在 約 橋 有 姑 未 第 口 之坊民 又云: 許 二千錢,出洋 :《素修堂集》有《出洋米》一首 劉 四百 通,兩 滸 蘇 爲 四首云: 「自昌 河, 浦 城 殷 墅。」今雖 錢?」可見當 復有之,牙行、 鑒。 外,唐人詩已累累 猶逾 比 「連朝 湖江 門 聞 「湖 附録 至 ,何况水多坊亦 上海出 院 石 時 價昂過一倍,市 楓 米艘 北 於此 至六七千。 移 橋 江 勢易, + 一時洋 更多。」此詩雖 自長江泛舟而 西 **西户、**販 敬 里 下米船,楓 估 米 見之。千餘 告采 闠 轉 檣 慢 海 無。出洋一日十餘 商、游 風 般之地 中 非 雲集,唱籌 云"「出洋米,出洋米,衆人趨利 口 者。 悉推 昔,而 却 橋市 下 不爲 從 食、 據《懷 歲來,爲吴下一 實 鄰 何 想日 漏 各省 楓 地保、汛兵、 處出?徐六 縣買,不是太 私 邪許 以 舊續集》、《素 溪 1喧闐。 海 橋 偏 而作 舶 邊 灾 之聲宵 石,一 又 迭告, 爲 如 水 修堂 然參考《 大禪 皆麇 津 涇 何吾 月 次。 倉 日 吏、營弁各各 詩 П 出 海 不 即 聚 院。 稱 厄難 邑難 洋 絶。 蓋 於此 F 苦 第 己 道 庚 海 數百 平减 RI 塞 申 如 光 舳 0 一,前 吟》 流 年 艫 聞 太 福

間

,寺僧之老者、弱者、住持者、過客者共一百四十餘人,忽一

日

盡

死。寺中

既

練蛇 所。 滅 僅 蕈下有 縣 忽然 枚,紫色鮮艷,其大徑尺,因擷以調羹澆湯。但覺其香味鮮美异常,未及親嘗, 僧今日 嗅 令使導至後園采蕈處。則復見有蕈二枚,其大如扇,鮮艷無匹。 無人,鄉保爲之報縣,縣令前來相驗。適一竈下養死而復蘇,縣令問: 而 **草**乃 其 頭 大小數百尾,有長至數丈者,有頭大如巨碗者。蓋 寒山寺由此 暈倒地,不省人事。今甫醒,而始知諸僧食麵死矣。 食何物?」對曰:「食麵。」縣令復詳詢煮麵之人與澆麵之湯,竈下養 香味,故幸而 兩大穴。縣令復集夫役,持鍬鐝,循其穴而發掘之。丈餘以下,見有赤 「今日值方丈和尚生日,特設素麵,以供諸僧。 蛇 之毒氣所嘘,以自蔽其穴者。 亦廢。薛福成《庸盦筆記》。 復蘇。縣令乃命儲火種,發鳥槍,一舉焚之。蛇之種類盡 諸僧既皆食之,故無一生。 我適見後園 兩穴口,爲衆蛇 不知是何故也。」 命役摘蕈, 中有蕈二 竈下養 出入之

陳 筱 東 唐許文慎公之妹,清才望族,馳譽思芬,亦有和章四首。 或 石 之枝 制 府 ,梵葉補南公之槧。又得陸文節公函告,賦詩四絶。其德配許夫人, 在畿疆〔七〕,聞寒山 [寺落成,喜蓮社之重新,溯楓溪而憶昔。 并付郵筒,如睹玉 櫻花移

七

者。 月 碣 爪 扶 事 霜 在 賜 萍 ? 心 寄 我 手 ? 踪 之 幾 玉 如 余撫 集。 重 苔 鉢 0 頭 霜 植 摩 行 過 海 來定 挲 踪 橋 蘚 余有 蘇 光 逢 倘 封 T 何 頭 時, 玉 人 説詩幸有 刊 一、清 何當 碑 未 有 人 長歌。」「張 鉢聲聲 怕問 真石 領得清凉 春 特 未 櫻 風 請 共 仲 滅 花 人耳 寒 ,長留丈室之芬。 、載瓜 曾宴 磨。」自注 識 俞 徹 曲 Ш 祇 曲 濤 如如 寺 袁 趣, 皮艇,重聽寒山 袁 句 飲花 零 聲遠 叟,壁上 恐 先生 推 聽 Ш 落 敲 楓 道虹 紅紅 下。」許夫人禧身詩云: 僧 書碑 橋 兩字 江 張繼 鬢亦蒼。」 葉漫 留 夜 楓 腰 筱帥詩 題字不磨。二十 紀 訛 半 瑟 詩 踏 鐘 瑟 Ш 事 有『 江 蘚蒼? 夜半鐘 '。」「舊地 0 秋 已報秋 自 江 村』『漁父』費摩挲。 自 云 注 楓』作『江村』、『漁火』作 注 1 ! : い。」「漁 字 新 「寺中櫻 别 里 佳 開 津 沽 鶯 選 口 門 姑 句 火 頭 佛 花 首 蘇 流 江 海 夕 花, 光寺 感舊 傳 蘇 場 照 膦 楓 臺憶 烏烏 濃 廣 暮 每 乃 曲 游,五 (場,金 易 色 H 啼 客 舊 袁 訛 濃 昔 船 本 藏 月 己 雪雪 游 闐 殘 白 落 逝 純 隨 年 『漁父』 杖 幾 春 門外 須 客 碑 泥 皇 處 夢 寄 斷 鴻 藜 領 經 何 所

陸

文節

公

馳

書僚佐

廣徵

聯

額

,將赴太

原,哀寺中楹

帖

見示。

自

雲

陽

中

丞

以

妍

抽

秘

异曲

同

I

。 异日有續輯叢話繼長樂梁氏之後者,

自

在

網

羅

之列。此

罘思 青峰 錫。 能 名公潤色,神化丹青。 餘 爲 志 頭 妍。頃更獻佛徵文,郵筒索句。彼己公茅屋杜陵,且賦新詩,豈釋慧頭陀簡栖, 金間 ,難下青蓮之筆。既承雅命,敢竭鄙懷。 一辭述作?惟自顧元、白俗輕,齊、梁風靡。慈恩塔上,恐遺章八之譏,崔灝樓 年來,劫火屢經,祇園漸剥。 囿於體裁,未能甄録。録樊山方伯書一通,亦文節之志也。書云: 何日,客願聞半夜之鐘,見佛幾時,心已在水精之域。 幸護憲暨諸公、見機獨早,護法有心,布施金錢,自新寶相。支硎 了,鸝穿結構。 化人之宇,歷千春而不傾,四照之花,開萬品而莫識。 而作屏,震澤浚潴,雜天河而俱灑。珠網圓於夕露,丹雘麗於朝霞。鴿下 城 外古刹。嘉名肇錫,緣拾得之高風,盛美必彰,有懿孫之絶唱。近千 削牘題詩、繼漁火江楓之後、動墨横錦、門飛霜落月之 鳩摩闃寂,象教陵夷。 一俟公暇成篇,即當繕寫呈上。 遂有异域胡僧,潜謀卓 增祥再啓。 旁峙,帶 「寒山寺 五月十 近 得 泊

唐 棱 繼詩流 辛亥之夏,工既畢,雲陽中丞以專車迎外賓於滬瀆以落成之。冠裳 上傳海舶,東鄰三尺童子能誦之。 白須直君之手栽櫻花於寺,以永嘉

日。」

七三

t DL

未能 於後 領 高 洲 介 月 斯 函 筱 事 會 盛 冠 云 + 一, 五. 蓋 與 : 姓 雅 會 Ŧī. 踐兹息壞 日 太 日 名見示,庶無責言。」太守 貴撫暨 聚於 洲 守 且 昨 聚 傳 於 獲預 於 一各位 示 寒 堂。 亦 Ú 函 堂 盛筵, 司道時 稿 寺名迹中 既旨 庶 諄屬 誠盛 知 醉 且 峴 事也。 相 酒 首沈碑 多 著録 把 飽德,餘 歡 多留 晤 未 俄 聯 ; 山 余謂 暢 及 領 尊 重鴻 芬 領 復 事格羅 俎 門 教言 在 0 留 而 雪, 齒 异 帶 或 邦 日 不獨 思首 難作 交 庶不僅作尋常游 感篆難忘。 乃承 纂修蘇 此 視, 以 我 雅 書來 邦 簡 府志 書 意 傳 遂 本 則 殷 請 爲 者 拳 總 輟 俱 留 今録 故 專 書, 領事駐 宴觀 必 名 事 請 將 車 也。 Ш 俄 也。 遠 開 濡 寺。 札 筆 俄 領 列 迓 滬 中 領事 各 里 而 事 紀 诼 或 派 Ti

寒 居。 111 寒 丈 設 唱 111 寒 尋 子 道 一,梵 游 者 拾、 天 夾 冠 台 豐 無徵 樺 寒岩,與拾得、 Ŧ 布 象,不敢忘 惟 冠, 顧沅《吴郡 著 木 履 豐干 本 被被 也 文編 0 藍 爲 縷 其 友 引 終隱 衣 事 掣 姚 既 廣孝《記 不 而 風 載 去。 掣 於 顛 僧 希 笑 》云「八」:「 遷 史, 歌 禪 余 自 師 若 藏 募 來 鈔 唐 建 元 本 殿宇 此 ^ 和 縛 逃 中, 虚 於 茆 方

集 》亦 無此文。 寒山子生於隋末,少師 不 應 不 知 何以云在「元和 中? 未 知

寺》篇仍删不載, 少 湘 師 舟何據?或當時寺中,尚有斷碑可考。然亦俗語不實,流爲丹青,緇流 以爲重耳。 非敢漏略,疑則蓋闕,猶初志也。 余囊纂《郡志》,寒山已列廢寺,但於注中附録其語。 今《志 援

## 卷二志事校記

- [一] 志事 鄭氏勾去題後小序。
- [二] 圮 《南州草堂集·自序》(菊園藏板本)作「圮廢」。
- 四 《南州草堂集》不名一種 昌亭草至多於皖 錢《序》作「爲昌亭草者十之一,爲皖江草者十二三,爲齊魯游草者十四五 ^ 南州草堂集》錢《序》作「南州草堂詩不一種」。

夫

- 皖江之詩多於昌亭,齊魯之詩又多於皖江,何哉?游益 廣,詩益 富也」。 此處僅引意 而
- 五 《江楓 作《題〈楓江漁火圖〉同徐丈雪廬作》,此或承其誤。 漁火圖》 按: 當作《江楓漁父圖》。 徐電 發有《江楓漁父小像題》。 然翁 維《小 蓬海 遺 詩
- 云 异 小蓬海遺稿》(上海涵芬樓影印《别下齋叢書》本)作「易」。
- 七 批 府 陳筱石 晋疆 語 此 制府在畿疆 當直書一 車將駕,樂觀 時 之事,實不須追紀其官。」 厥成。昌熾遂不暇 初稿本無此後四節。内夾一箋條,上有葉昌熾識語:「輟簡,方伯適奉 更藏其陋 ,擬增入此篇之下、回憶之上,再酌。一旁有鄭氏 中印開

卷二 志事

 $\sum_{i}$ 

《吴郡文編》

板,内無姚《記》。考顧沅輯《吴郡文編》卷九十八載姚廣孝《寒山寺重興記》,據改。 原作《吴門表隱》。按:《表隱》,清顧震濤纂,道光十四年(一八三四)小辟疆園梓

七六

賜進士出身翰林院侍講國史館提調會典館幫總纂甘肅學政臣葉昌熾

## 志詩门

唐賢首唱,作者如林、録張繼詩於篇首、先經起義之例也。 之例也。 中有事在傳,其詩即以傳其事,隨文綴録,難可離析,又計敏夫《唐詩紀事》 至於泛咏皋壤,流連景光,别爲一篇,畢登簡末,庶後之覽者有感 宋以後詩,若其

於斯文。《志詩》第十。

宋程師孟《游楓橋偶成》:晚泊橋邊寺,迎風坐一軒。好山平隔岸,流水漫過門。 朱舫朝天路,青林近郭村。主人頭似雪,怪我到多番。《吴郡志》。 題據《吴都文粹》

胡埕:朝辭海涌千人石,暮宿楓橋半夜鐘。明日館娃宮裏去,洞庭呼起一 補〔二〕。 一帆風。

《吴郡志》。

卷三 志詩

按 胡 珵 , 郡 志》無傳。 《吴都文粹》作「胡理」,又 録其《滄浪詠》一 首

郭 附 師 子 Ш 雲漠漠, 越 來 溪 水悠悠。 鐘 到 客船未曉, 月 和 漁 火俱愁。 呎尺横

塘 古塔 連綿 芳草長 洲 老翛然自在,時時來繫扁 舟。 《吴郡 志》。

按 知 昆 Ш 盧 熊《 縣 蘇 官 州 至 府志》郭附字 一朝奉 大夫致 明仲 仕。 幅 嘉祐八年進士。 巾 策 杖,窮 Ш 林 詩 熙 **寧中** 酒之適。 以 大 東 理 南高 寺 丞權

皆 樂 與 、之游 卒 年八十四

范 成 大《楓 橋》: 《長洲 縣 志》引「楓」上 有 「經」字。 朱門白壁 枕灣流, 桃李無言滿屋

浮 固 路旁堠 送 人南 北管離 愁。 <sup>《</sup>范 石湖詩 集》。

墻

又 《間 門初 泛二十 四 韵 并 序 × 新 修 小 舫, 因 病 禳 祓 屯滯,遂至北城 地邐 到 楓

橋 路 而 還。

并 晴 黄 好 蔫 在 出 撚 撑 馳 Ŋ 烟 英。 舫 新 路 後 夢境 平生載 裝 纈 觸 儿女, 林疏露屋 H 酒行。 艫 舊詩情。 前 朱閣靜臨 摧 酌弟 藏 水 兄。 身久病, 滿 醅香 推 城 篷眩,天寬倚 契闊歲 新 桃 麯嫩 場論 頻 茗味 今昔, 更。昨夜 柁 驚。 小 楓 春 橋管送迎。 燈 輕。 轉彎添 光曉 紅 貑 縴 今朝 分霜 挽 11 罨岸 腰樵 稻 把

盟。 魚寒 網 楓 動、木末酒旗明。竟日窑烟直、中流塔影 猶作 邊桁 昨成 陳 ,牽罾柳際 歸 雁遠更聞 卧,於今負耦 湖。岫 聲。 雲縈石住 耕。 急艣潮痕出 生涯 田田 都 塌 一,疏鐘 水穴堤鳴。過渡 颯 横。 ,心曲漫崢嶸。 暝 色生。 數帆殘照滿 鄰翁欣 牛歸速,穿籬犬吠 猿鶴休多怨,菰蒓 問 笛暮 訊,逋客愧 江 平。 寒

尚 可 羹。 藥囊 吾厭苦,扶憊 Ē 班 荆 同上。

陸游《宿楓 去 一尚 Ŧ 重。 橋》: 陸《劍 七年不到 南集 楓 橋寺,客枕依然半夜鐘。 風月未須輕感慨,巴山

此

薛季宣《吴江 洲 浪 語 志》引作 「暮」。 放 船至 波 中出。高城多隱映,遠岫攙羅列。少小泛吴江,始識仙凡别。 楓 橋灣》: 短篷負長虹,破廢挂 可用月。 風 馬 座 中 生,天幕《長

释英《重到 依漁艇、林低出戍樓。 楓 橋》: 晚泊楓橋市,冥搜憶舊游。 堪嗟名與利,白了幾人頭?《白雲集》。 月明天不夜,江冷水先秋。 岸曲

作,當從《靜居集》錄出,其題祇「泊楓橋」三字,亦與英《集》不同。 按: 釋英字實存,宋末錢唐詩僧,著有《白雲集》。 此詩《長 洲 縣 志 》題 按 張 JU 羽

庫提要》稱《贈趙孟若》七律一首,亦兩集重出,斷爲《靜居集》誤收。觀此篇 『憶舊游』句,作「重到」爲是。白雲詩傳本甚鮮,豈《靜居》一集,猶蘇過之於

《龍洲》耶? \*

明張元凱《楓橋與送者別》: 元 顧仲瑛《泊間 里,闔閭城頭尚堪指。游子尊前泪濕衣,離心已逐片帆飛。 送鐘聲攪客眠。 門 《玉山草堂集 楓葉蘆花暗畫船,銀箏斷絶十三絃。 楓橋秋水緑無涯,楓葉滿樹紅於花。萬里之行纔十 西風只在寒山寺,長 酒酣忘却身爲客,

高啓《泊楓橋》: 落又鐘聲。 畫橋三百映江城,詩裏楓橋獨有名。 幾度經過憶張繼,烏啼月

意欲元同送者歸。

《長洲縣志

又《楓橋送丁鳳》: 初沈日,風吹欲 上潮。 紅葉寺前橋,停君晚去橈。 離魂來此處,還似灞陵銷 醉應忘世難,歸不計程遙。 山隱

又《歸吳至楓 身應謬得,鄉音到耳是真歸。 橋 \* 原注: 舊有塔,今廢。遙看城郭尚疑非,不見青山舊塔微。官秩 夕陽寺掩啼鳥在,秋水橋空乳鴨飛。 寄語里閻 加

休復羨,錦衣今已作荷衣。

又《將赴金陵,始出誾門夜泊》二首: 思家起頭夜,遠鐘孤棹宿楓橋。 烏啼霜月夜寥寥,回首離城尚未遙。 烟月籠沙客未眠,歌聲燈火酒家前。 正是 如

何纔出閶門宿,已似秦淮夜泊船?

又《東歸至楓橋》:故人當日送登畿,此地停舟醉落暉。 青眼看人歸。 慚愧臨河舊攀柳,尚留

又《闆門舟中逢白範》: 十載長嗟故舊分,半歸黄土半青雲。扁舟此日楓橋畔, 褐秋風忽見君。以上七首皆據《高青邱集》。

謝晋《楓橋歌送吴秀才之金陵》: 君不見楓橋水,奔流直下太湖來。環繞闔閭城 還誦昔人詩。 沾虎阜山頭 春,橋下帆檣停似蟻。復有大道接金陵,送客每來橋上行。山寺鐘鳴知 漁村月落見燈明。今朝却餞吴公子,解我金貂酤緑醑。帆挂長洲 西地,其間風土何佳哉!層樓叠榭侵雲起,望處人家半臨水。 雨。 見説長干花似綺,君歸更莫思鄉里。 暮烟秋雨益凄其,别緒離情無限期。 昔時應是今時景,今人 水邊歌舞 苑 外 烟、衣 夜半, 不勝

卷三

志詩

更。犬逐漁燈吠,鐘催客棹行。 從兹去鄉土,寧得是吴氓

又《移家將之金陵宿楓橋》: 山寺烟初暝,江村月又生。

辭家無十里,不寐到三

又《過楓橋留別城西諸友》:煩君遠餞意偏饒,念我離群乍寂寥。祖帳雨催詩欲 烏啼時節過楓橋。 就,郵亭風勁酒頻澆。舟移射瀆黄昏近,路轉江村碧樹遙。記取今宵分手處, 上三首謝孔昭《蘭庭集》。

徐源《翌日携酒錢太傅於楓橋,辱留題於蘭臺清鑒之舟次韵》:按: 神覺倍前。 橋 之前有《郡守林思紹邀陪太傅屠朝宗餞於石湖》一首,太傅即朝宗。 [共幾年?黄敕到門須就國,玄纁沐手敢辭天?官高勛爵還加舊,老去精 到日坐朝先問道,五雲宮闕鳳池邊。《瓜涇 寒山鐘盡便開船,來往 集》。 《瓜涇集 此 楓

沈周《和嘉本初夜泊楓橋》:風流張繼憶當年,一夜留題百世傳。橋帶人家斜倚 却因新韵偶聯篇。 寺,月籠沙水淡生烟。火知漁子仍村外,舟載詩僧又客邊。我愧不能同此宿, 念沈 石田 稿》,據王迺昭鈔本。

皇甫污《題沈周八景圖》 莫言估客樂,鐘聲將夢到天涯。 《楓橋》一 首。 《皇甫司勳集》。 橋橫古渡帶平沙,楓落寒山日影斜。 舟女

文元發《歸過楓橋》: 輕雲駁日江村暮,西風短棹寒山路。 去時柳 色緑含烟,歸

來 楓 老 紅 栖 樹。 《蘭雪齋詩 選

文肇祉《泊 道 一春深 柳 楓 陌尚 橋用 大父 聞 鶯。 韵 輕抛 **\***: 辭 故 親遠别動離情,滿幅風帆帶雨行。水長關河無阻 國三千里,細數遐征 第 程。 此 夜維 舟不成寐,

寒山 依 舊 1起鐘 聲。 《文録事詩

郭 諫 寺 臣《晚 炊 烟 起,江 過 楓 村宿 橋》: 鳥喧。 落日 楓橋路,船窗暮雨昏。 臨 風思往事,獨坐暗銷魂。 秋蘋擁沙觜,霜葉墜籬根。 《鯤溟先生集》。 Ш

國 朝 遙 朱彝 聞 歌 尊《 吹聲,暗 楓 橋 夜 人 楓橋 泊》: 去。 初 月開平林, 《曝書亭集》。 繁星羅遠戍。驚禽沙上鳴,漁子 夜深語。

徐松《楓 憐 庵 僧 鐘 橋 累 鼓 獨 閑 和 步有感》: 經聲。 情。 天 邊雲冷斜陽淡,雪後 石 橋 高 .帶驛樓平,擾擾南征與北征。 江 深急水清。 放曠一身何 賈客帆檣連樹影, 所繫?劇

又《歲暮 潤, 空中陰暗 阻 雨 楓 壓 江 屋低。 懷 友 人 》: 田 .家薄暮牛纔放,竹院侵晨鳥亂啼。 乍 寒乍暖客招提,一 夜懷人笠澤西。窗外雲昏滋礎 幾 度相尋多不遇,

頭 烟 水 兩 凄凄。

董 靈 預 楓 橋 夜泊》: 落 日 尊酒,風塵此 地 看。 嘯歌 今夜月,燈 火萬家 珠

樹 何 年古?楓林幾處丹? 故鄉憑夢繞,峰影碧巑 岏

殷麗《丹陽賀魯経訪予楓 天。今日橋邊尋我去,麥秋寒泛一 江 不 值 ,恨然有作》: 溪 烟。 餘 生買藥因 去年江上逢君别,柳絮飛殘二月 投市,旅泊携詩偶放

共醉狂 吟應 不惜,歸來探取杖頭錢。 上四四 「首《百城烟水》。

沈文怒《

楓橋夜泊》二首:

野宿隨寒雁

,辭家第一宵。星星漁火亂,知是泊

楓

析響已深更,鄰舟 人語歇。 不忍便安眠 貪看 故山 月。 《歸 愚詩鈔

吴蔚光《楓橋 舟夜 \* 暝色緑爲烟,染我

東塘路。

斜

月浸

迴波

光 明 欲 飛 艣 聲 細 如 語。 滅燭聞 春 鐘 清夢落 何所 ?《素修堂集》。 ,繁星挂疏樹。

李 繩《楓 霜 月若 橋夜 爲 情。 泊 寺鐘 字勉百〔三〕,長洲舉 漁火楓 橋泊, 已 人,有《葑田》、《剡 是思家 第 東》諸 程 集。 又復 匆匆賦遠征,烏啼

吴琦《月 湖 船。 夜石湖 秋月清如此,吾心自冷然。 至 楓 橋 **\***: 字 赤玉,杭 州仁和 荻花縈客棹,漁火亂江烟。 人,諸生,有《圭 齋稿》。 上方山 此夕楓橋泊,吟 下 路, 泛石

燈中酒眠。上二首,王西莊《江浙十二家詩選》。

馬元 娘 動《楓 曲 風檣估客程。 橋》: 秋氣入凄清,江楓 灾傷連數郡,米價幾時平?自注: 橋邊有米市 照眼明。 寒霜侵月色,殘夢落鐘聲。 水閣吴

王 昭 Ŧī. 紛紛亂 嗣《楓 湖 船。 紅紫。一杵霜鐘度水來,磔磔驚鴻拍波起。此夜城 江夜 何人共話孤篷下,消遣鄉愁暮 治》字誕敷,號篔谷,長洲諸生,有《蔭茅居詩稿》:· 一雨天?上二首,吴枚庵《懷舊續集》。 古寺江村 西抱影 無十里,楓 眠,烟波蕭 瑟 葉

陳杰《夜泊 俞 ,殘夜水村虚。禦冷圍爐火,安眠枕篋書。寒山鐘乍動,風景憶當 須集》。 楓橋》字漢賢、長洲人、有《虹橋詩鈔》: 繫纜楓江畔,蒼茫月上餘。 微霜冬樹 初。 吴枚庵

褚逢椿《楓江看山》:吴山有媚骨,非春亦如笑。 來正殘雪,佳景供遠眺。平陂斷岸間,時時見垂釣。畫意冷詩心,會心契微妙。 ·藉釀和平,取神不求肖。 悦性理塵襟,且當事長嘯。 暫得亦快然,旨言王逸 想像桃李時,更復足詩料。

又《楓江即目》: 沿堤一半是衰楊,漁網人家秋水光。禾黍田疇閑倚棹,亂山斜

少

仁久聞暮鐘,空林下斜照。

志

八六

日似横塘。上二首、《行素齋詩集》。

王元文《由 鐘昏暮動,曾到幾家船?《北溪詩集》。 橋路,西風 石 湖 颯沓旋。須臾霽景見,倍覺夕陽鮮。 抵 楓 橋 即 事》: 字睪曾、吴江人。此詩見《北溪旅稿 米市希高價,商人畏有年。寺 第一 種《往來集》。 驟 雨 楓

袁翼《楓橋夜 鐘。熱客幾時拋褦襶?空門無地養疏慵。烏啼月落句仍在,拾得寒山僧不逢。 △泊》: 字穀廉,寶山人,歷官江 西知縣。 分明記得楓橋上,十一年前 聽 晚

隔岸叉魚星火閃,濕雲如霧寺門封。《邃懷堂集》。

附詩餘

陳維松《浣溪紗 微 雨 過楓 橋。 ·雨中由橋至齊門》: 薺菜緑平齊女墓,黎花雪壓伍胥潮,柳枝和恨一條條。 料峭春寒恰未銷、鵓鴣啼急水迢迢、半船

又《齊天樂·楓橋夜泊,用湘瑟詞〈楓溪〉原韵》: 度。微昏簾幕,乍冥帆檣,夾岸多于津樹。 船娘吴語,爲蘸水挖烟,脆來如 楓橋漁火星星處,鐘聲客舫

如眉月棱半吐,想當年,曾鬥館娃嬌嫵。夜

不管人愁,棹歌杳藹掠波去。

市 聽鶯,春衣撲蝶,夢到將圓頻誤。 鳴珂舊路,問冶葉倡條,可能如故? 撩亂

心情,茶烟銷半縷。上兩屬《陳檢討集》。

右楓橋四十二首附詞二闋。

唐韋應物《游寒山寺》:「游」,一本作「宿」。心絶去來緣,迹住人間世。獨尋秋草徑,

夜 宿寒山寺。 今日郡齋閑,思問楞嚴字。 《韋蘇州集》。

張祜[四]: 橋。 《姑蘇志》「却憶」作「却算」,「重游」作「游程」,「因」作「今」。 長洲苑外草蕭蕭,却憶重游歲月遙。唯有别時因不忘,暮烟疏雨過楓

宋張師中: 遠 有人,學佛 岫 對栖虎。 吴門多精藍,此寺名尤古。拒城七里餘,冠蓋日旁午。 洞 禪語。 岩扉横野橋,塔影落前浦。 迹忙心已閑,道樂行彌苦。 霜樓鳴曉鐘,夕 不爲喧所遷,意以靜爲主。 舸軋雙艣。 斜徑通採香, 方丈中 何

程 師孟: 書。 原注: 門對雲山畫不如,師今一念六年居。 今禹偁王内翰丁太夫人憂,任其親寫是詩,故不題名 邇來寺好尤瀟灑,張繼留題内翰

必

深

Ш

林,峰巒繞軒户!按"「岩扉」、《姑蘇志》作「寺扉」。

孫 覿《過楓 橋寺示遷老》三首: 《吴郡志》「楓橋寺」下附詩,惟張繼《晚泊》一 首, 覿《與温老》一

不全載 月落 題 橋邊寺 其 餘 但 有 ,欹枕猶 姓 名而 已,此 聞 據《宋 半 夜 詩鈔 》補 白首 翠木蒼藤 重來一 夢中,青山 兩家,門依古柳 不改舊時 抱 溪 斜

萬 里 歸 來 悲 故 物 銅銅 、駝埋 一没草 齊腰

城 流 水 參差是,不見元 都 舊 日 花 一年瘴 海卧 炎宵,夢隔青楓 水

朱子儋承 寺》詩云:「白首 夜半鐘。」亦可謂鼓 爵《 存餘 堂詩 重 話》 動前 來一 夢中,青山 人之意云爾。 張繼《楓橋夜泊》詩,世多傳誦。近讀孫仲 不改舊時容。烏啼月落橋邊寺,欹枕猶 益《 過 楓 聞

作, 按: 絶。 詩 中前二 三絶句 絶一 又 而 觀《文粹》於程師孟《游楓橋》七絶之下,承上題「前人」二字, 遞 《吴郡 以程 也。 首、 首 移爲張 《吴都文粹》不 志》「楓 共 五言 五言一首; 孝祥 題爲《與温老》 一首遞移爲 橋寺」張繼詩後 作。 孝祥詩《吴郡志》本祇 又次爲孫覿 知 孫 四 如 首。 覿 何 誤 作,《姑蘇志》沿其誤。 ,接録張師中五言古一首; 又以 析 匹 張 首 最 師 中詩 前 後 Ŧi. 絶遞移爲 言一首《 首, 爲 并覿 二,以後半首 今增入 之五 與温老》, 胡埕 律 胡 次爲 詩 作 首、 爲 上即 後 遂 胡 程 程 即 有 師 誤析張 師 絶

師中詩之下半首,題爲程師孟。可見其訛實自鄭虎臣始, 非毛、 錢兩本校讎之失也。

又 楓」作「青風」,「故物」作「古物」,皆范爲長。 按 前 一首「欹 枕猶聞半 夜鐘」「猶聞」、《 姑蘇志》作「遙 聞」,末一 首

張孝祥: 多。 「窣堵波」、《吴都文粹》作「宰渚波」、殊誤〔五〕。唐張祜以下七首、據《吴郡志》。 四 年忽忽兩經過,古岸依然窣堵波。 借我 繩床銷午暑,亂蟬鳴處竹陰

字晞郗,南宋末錢唐人。

俞 桂《楓 到 楓 橋宿,石岸旁邊繫小船。《漁 橋 寺》: 溪詩 湖水相連月照天,雁聲嘹唳攪人眠。 稿》。 昔年曾

元 湯仲友: 墻 矮 入漁 歌。 出城才七里,地僻罕曾過。孤塔臨官道,三門背運河。 醉裏看題壁,如今張繼多。 《姑蘇志》。 鐘 鳴驚鳥宿,

按: 盧熊《志》: 此詩,王文恪與張繼詩皆附「楓 湯仲友字端夫,先名益,學詩於周弼。 橋」下,繹其 詞意,實游寒山寺而作也。 浪 迹湖 海,晚 復歸吴,自

號

西樓。

有《

北游詩

集》。

明高啓《賦 起,塔 中燈照遠 得 寒山 2僧歸。 寺送 别》: 漁村寂寂孤烟近,官路蕭蕭衆葉稀。 楓橋 西望碧山微,寺對寒江獨掩扉。船裏鐘催 須記 姑蘇 城外泊, 行客

常時節送君違。《青邱詩集》。

王 門。 衡 《泊 獨 舟 將殘雪色,遙 楓 橋過寒山 寺 對 遠 \* Ш 燈含 言。 帆影亂,鐘雜市聲昏。 又 聽烏啼急 江城 送客喧 杳杳竹深處,蕭蕭僧倚 0 乾 隆《蘇 州 府 志

唐寅《寒山 殘 角韵 悲,客 寺》: 船 《姑蘇八咏》之第六首。 夜半鐘 聲度。 樹 色高 金 閶 低混 門外 有 楓 無 橋 路, Ш 光遠 萬家月 近 成模糊。 色 迷 烟霧。 霜 譙 華 滿 閣 更

怯冷,江

城

欲

曙

聞啼鳥。

《六如居士集》。

王 近 释登《寒山 僧 難定,泉慳 寺詩 花 \* 不紅。 古寺 西路邊,青山滿目 燭 憐 門外路 塵 土 中。 暗 江 石龍從作雨,江鵲尚 楓。 《金昌 集》。 鳴 風。 市

朝 黑音 受 黑音 丹生《 閑 殘碑苔剥落,古殿 同雕庵過寒 山 寺》 鴿 飛還。 萬家寺叢裏,一徑人寒山。 羈 客同游此 徘 徊 夕 照間 木葉蕭蕭靜,江雲

國

徐 松《斐仲 招飲寒山,時吉生 一將往 維揚》: 渌水 紅 塵江 上路,采菱沽 酒傍 寒山。

盤桓且緩揚州鶴、松月松風好共閑。

釋 逸慈 夕 陽 中。 = 首 《斷塔遺基》。 當 年 突兀 矗 寒空,郡 杰閣巍然瞰 志 猶傳節度功。 語虚 ,飛花片片惜春餘 今日遺基 何處覓? 閑庭老樹參天 斷 垣 衰草

,喜趁清陰讀梵書。《龍函新綠》。 蕭索西風樹影疏,江邊古寺有栖烏, 夜闌

啞 啞驚殘夢,誰繪霜天落月圖?《古木啼鳥》。及丹生以下五首《百城烟水》。

陸 鼎《寒山寺》: 火感詩人。 **絶無逆旅知歸客**,安問寒岩舊應真。 寺樓直 與衆山鄰, 魚米東南此 要津。 自鐘 獨惜牙郎趨利市,不聞漁 聲響清夜,幾人同夢

不同塵?《梅葉閣詩鈔》。

姚 配《夜 詩 寺蕭條未掩 版 還隨 過寒山寺》二首: 劫火銷。 關。 落葉滿廊僧不見,空餘漁火對寒山。 只有疏鐘添客恨,瀟瀟暮雨 字協文、號雲湄、元和人、有《雪鴻軒詩鈔》。杖黎踏破蘚痕斑、古 過 楓 橋。 吴翌鳳《懷舊又續 流 傳生 句自唐朝, 集》。

蔣 棨渭《寒山寺》字遇溪,吴縣人: 《萬壑雲樓集》。 曲徑松花積,雲房黛色連。 聲鐘欲午,清響落

寒泉。

褚 逢椿《 意,黄葉打 過 楓 窗 江 憩寒山 如 R 聲。 寺》: 近市人家水繞城,無端踪迹作江行。黑雲壓屋有雪 古佛已荒空去劫,寒鐘未起待殘更。欲尋張繼停舟處,

寒山 寺二十四首。

片蒼

Ш

暮

色横

《行素齋詩集》。

卷三

志詩

國 朝徐松《同 山夫訪在昔》: 閑行懷古迹,乍冷正初冬。 門掩橋邊寺,樓空夜半

鐘。 盛衰知有數,喧寂覓無踪。一笑同寒拾,天台是别 峰

黄周星《寒山次答在昔》: 細,梅影移窗愛月明。 惠遠匡廬饒酒興,己公茅屋有詩名。青山筇笠應同志, 一曲陽春未易賡,蒲團趺 坐自三更。 松濤入枕 知風

五岳何年訪向平?

王庭《過寒山贈在昔》 始信禪房盡日閑。 爲憶鐘聲尋古寺,得因遺象識寒山。 楓江橋畔人 如織,

徐汝嶧《壬戌冬留別在昔》: 又: 帳,松風謖謖起茶爐。 西風吹夢到林邱,薄醉吟寒信夜游。 多君贈我詩千首,怪汝留人酒百壺。别後踟躇游賞地, 龍函閣下日招呼,聯榻經旬興不孤。江月溶溶窺紙 深巷犬聲人寂寂,一溪明月宿 漁 舟

馬壽穀《前題》: 榻聽清談。 龍翻高閣雲千卷,桂落寒江月一函。 勞勞薊北又江南,勝地幽人許共探。 此夕鐘聲醒客夢,與君松下 且喜傳杯哦好句,還期聯

應思霅水問狂夫。

結茅庵。

莊際盛《前題》: 倚 杖説 虚空。 杯浮竹葉搖寒月,笛弄梅花落 一灣流水小橋東、盡日幽栖古寺中。 晚 風。 自有《傳鐙》明實際,不須 兩載與君 酬唱近,睽 離能

右贈在昔七首。

不憶支公?徐崧以下七首《百城烟水》。

宋王安石《擬寒山拾得》二十首:牛若不穿鼻,豈肯推人磨?馬若不絡頭,隨宜 而 起卧。 乾地終不涴,平地終不墮。 擾擾受輪迴,祇緣疑這個

此。 我曾爲牛馬,見草豆歡喜。又曾爲女人,歡喜見男子。我若真是我,祇合長 若好惡不定,應知爲物使。 堂堂大丈夫,莫認物爲己。 如

積。 凡夫當夢時,眼見種種色。此非作故有,亦非求故獲。不知今是夢,道我能畜 貪求復守護,嘗怕水火賊。自覺方自悟,本空無所得。 死 生如覺夢,此 理

甚明白。

曲。 風吹瓦墮屋,正打破我頭。瓦亦自破碎,豈但我血流!我終不嗔渠,此瓦 衆生造衆惡,亦有 一機抽。渠不知此機,故自認愆尤。 此但可哀憐,勸令 不 自

真正修。豈可自迷悶,與渠作冤仇!

卷三

夢是空 一,覺後 應 無 記。 若言夢非空 應 有 真 實 0 燔燒 陽 自 招 沈 溺 陰 自

九四

致。 令汝嘗驚魘,豈 知 安 穩 睡 1

裏 破 忍餓 人有這個 作馬 便搭鞍,作牛便推 這個 没 量 大。 磨。 坐 也坐不定,走也跳 若 問 無眼 人,這 個 不 是甚 過。 麼? 鋸 也解 便 遭 不 斷 伊 錘 纏 繞 也 鬼 打 不

裏。 我 讀 萬 獨 悟 卷書,識盡天下理。智者 自 根本, 不 從 他 處起。 渠自知,愚者誰信爾? 奇哉閑道 跳 出 句

湯 幸 身 無 誰 知 事 受 時 種種種 熱惱, 却 妄 思 不 解 量 思凉 張 三袴 ! 口 「窄,李 四 帽檐長。 失脚落 地 獄 將 身投 鑊

有 即 有 有三 即 有 JL 四五 有 亦 何妨 事。 如 火能燒手, 要 須 方 便

若

未

解傳薪

何

須

學鑽燧

昨 H 張  $\equiv$ 嫌 他 不 守 己 歸 來 自 悔 1責,分 别 亦非 理。 今日 見張 三,分别 心 復

傀 起 儡 若 祇 除 機 此 惡習, 種 種 没 佛 根 法 栽 無 多子 被 我 0 入棚中,昨 日 親 看 來。 方 知棚 外人 場

呆。終日受伊謾,更被索錢財。

生 坦 蕩蕩,所見實奇 哉。 問渠前世事,答我燒炭來。 炭成能然火,火 過却 成

灰。灰成即是土,隨意立根栽。

衆 生若 有 我,我何能 度脱?衆生若無我,已死應不活。衆生不了此,便聽佛與

奪。我無我不二,四天王獻鉢。

莫嫌張 掃。 惡既是磨滅,好亦難長保。若令好與惡,可積如財寶。 三惡,莫愛李四好。既往念即晚,未來思又早。見之亦何有, 自始而 至今,有幾 数然如 電

許煩惱?

失

(志難: 作福,得勢易造罪。苦即念快樂,樂即生貪愛。無苦亦無樂,無明 亦 無

昧。不屬三界中,亦非三界外。

打 賊 賊 恐怖,看客客喜歡。亦有客是賊,切莫受伊謾。 樂哉貧兒家,無 事 役心

肝。既無賊可打,豈有客須看!

種 貧兒,不能 自營生。若不作客走,即須隨賊行。 復有一 種貧,常時腹彭

卷三 志詩

若

有

亦

不畜,若無亦

不營。

汝 無名高 者 以以 見利貪叨。汝無行實者,以取著名高。行實尚非實,利名豈堅

九六

牢。一朝投土窟,魂魄散迢迢。

裏。 勇有孟 但能 施舍、能無懼 切捨 管 取 而 佛歡 已。若人學佛法,勇亦當如此。 喜 休來講座下,莫入禪門

利瞋 汝 刀山, 濁愛汝 灰河。 汝癡 分别心,即汝淡魔羅。 圓成但一 性,一 切法依

他。

遍了一切法,不如

且頭

陀。

《臨

· 川集》。

元 張雨《擬寒山子一首贈活 活潑 潑。 視身爲浮漚,閱世同水沫。 死 人 窩 玄道先生》: 釣徒非吾友,荷鍤未爲達。 此詩在《補遺》。 有一 作得活 道丈夫,船居 死人,

又《自覺生死忙〔六〕,因書四韵,予豈效寒山子者》:人生浪自苦,古今無一了。

方是死人活。

鷄 命湯火間, 喔 喔猶戒曉。 預 憂復何益,轉使髮白早。 不如噇酒糟 糟邱 無壽

夭。《貞居先生集》二首。

按: 「豈效寒山子」,正其效寒山子也。 貞居詩曠達,固 道家 本色,然非兼得宗門三昧,不能如此大解脱,

不在文字。 又 按: 宋釋英《白雲集》有言詩一首《寄致祐上人》云:「始信文字妙,妙 食蜜忘中邊,無味乃真味。 寒山題木葉,此心頗相似。」此僧教

觀

,亦於台宗門庭爲近。

國 朝 合儒墨,聊假釋疑滯。 迴 躅 何焯《讀柳子〈送文暢上人序〉效寒山體》: 可勤求,覺路非此地。亦不邇聲色,亦不殖貨利。佛出還作禮,何羨靈山 穢累脱去時,步武清凉界。 裴楷論守一,文殊説不二。正許 吾書有秘寶,無俟下臨代。

陳 汝楫《效寒山子體》十四首: 室白,透霜林外一聲鐘。 看看江上過三冬,方丈能將七尺容。香炷旋銷虚 我是人間無事人,山林城市往來頻。 鶨 河 色

會。

臣受孔子戒,者漢也超詣。《義門集》。

空 水黄昏月,又道巡檐是夢中。 明裏,中有梅花萬樹春。 暗裏香生不待風,枝頭消息觀 鼓 打殘 更鷄 已號,霜生屋 瓦 中通。 何寥蕭 淺清池 起來

檢寒灰看,一點星紅尚未銷。 海,一點 桃 花漾水紋。 懸崖 松搭荒 無路 茆竹 有風雲,天上人間自 架扉,滿山 桂子 拾 I此分。 機歸。

也

自

卷三 志詩 輪

海

月從空涌,長嘯數聲烟四飛。

知

就

裏春

如

生來頑傲不成仙,須信威音有

劫前。爛

吃 猪 頭 按 村 酒 倒 騎 雕 虎 過 Ш 顛 得 出 句 人 常 何 天 從 更 鹿 帶 豕 游 泥 百 春 光 年 到 日 處 月

11 梁 常 苔 似 滑 東 便 風 休 暖 去 儘 坐 逐 聽 楊 溪 聲 花 1 不 下 斷 飛 流

笑 蘿 漁 斬 盡 X 歸 風 雲 去 絶 後 却 有 尋 真 舊 路 X 獨 又 往 重 來 來

然 粉 碎 這 脏 兒 大 千 世 界 \_\_\_ 粒 粟 中

字

何

曾說

却

有

虚

空

挂

墨

痕

粒

粟

中

藏

世

界

許

君

百

禮

維

摩

足。

忽

貝

葉

莊

嚴

白

疊毛

繙

間

多

病

是

醫

門

藏

削

瓜

根

瓣

JL

開

巾

應

兜

頂

是

蓮

胎

藤

千

年

古

洞

偶

然

開

桃

自

生

花

水

自

迥

我

陶 家 壁 1 絃 賞 詩 閣 集 續 編

彭

間

鼓

笛

皆

敲

破

好

譜

0

非

偈

非

詩

亦

口

憐

終

身

拍

手

向

風

前

定 觀 Ш 洗 求 絲 笑 題 竹。 發 寒 其 山集》: 中 覆 有 如 所 意 此 以 詩 珠 紫 亦 效寒 陽 明 翁 光 Ш 遍 子。 嘉 地 嘆 燭 好 卷 篇 寒 憐 牘 Ш 憫 詩, 朱 諸 子 有 恰 偶 情 稱 摘 寒 出出 色 Ш 詩 味 讀 云 同 徵 嘐 煞 逐 有 嘐 好 天 詩,人 那 籟 堪 聲 未易 慧 眼

轂 此 與軸 。」紛 彼 淫 我 哇 行 興 置 座 盈 隅 耳 ,六時矢 滋 導 欲 無沐 誰 能 契 ^ 南 真 酌 原 先 生詩 脱 録 足 離 Ŧi. 濁? 千古南 華

仙

不

殊

儘

悠

悠

石

不

愁

歸

襌

徐 材《題碓庵和尚效寒山詩》: 其 遺,後佛 然 斤 機 聞 云: (天機,如印印空。規矩縱横,其揆則一。不然轍迹可循,去之彌遠矣! 竺典 不可即謂之豐,優填國王思幕於佛,募神工,以牛頭旃檀刻 人胡寬營構新豐,門閭巷術如一,徙者争歸其家,至於鷄犬亦各識其處, ,斯得真馬矣!嗟乎!彼天下俊物,便不可以形似求之,况形而上者乎? 之《詩》曰: 「菩薩 再至,象遂出迎,然不可即謂之佛: 「聲聞,不能作佛語。」亦在其所得耳,豈效之而能然乎?雖然,吾 "「惟其有之,是以似之。」得之,斯效之矣!《易》曰" 九方皋之相馬也,若滅若没,若存若亡,得其天 徒效之於形似也。 若於道也,得 佛象,豪髮無 「擬議以

又《碓庵和尚 高 指聲中法苑開。 成 踞碧芙蓉。 其變化。」效之,斯得之矣! 继席靈岩、詩以贈之》 喜看南岳朱陵後,更有參天第一 狂象馴龍俱聽法,溪聲山色盡西來。 原注:字僧鑒,名曉青。 峰。 現在靈山豈易逢,法幢 片雲無意傍琴臺,彈 支許襟期三十年,

九九

志詩

同懷蘭雪意翛然。時聽法語霑沙界,何啻仙音落梵天。

按: 碓庵詩未知有無傳本,録俟齋先生題詞,如讀碓庵詩也。再録三絶句, 知碓庵之即爲曉青也。考《松陵見聞録》:曉青字僧鑒,吴江朱氏子,祝髮

右擬寒山詩三十八首,附録文一首、詩三首。

郡之休休庵,參靈岩宏儲,受戒爲弟子。

## 卷三志詩校記

- 志詩 寒山寺》詩五言,宜補入宋詩前。又唐張祜《楓橋》七言絶句,見《吴郡志》。」 村」。《六一詩話》「姑蘇城外」作「姑蘇臺下」。此應補入張繼之次,低一格。」「《府志》載章應物《宿 首,次韋應物,次張祜。」又有兩紅箋墨書云:「考宋洪文敏選《唐人萬首絶句》「江楓」作「江 初稿本題後小序有异文,鄭氏勾去序文,並作眉批:「《志詩》當首列唐張繼《楓橋夜泊》
- 字勉百 即 題據《吴都文粹 題《游 楓橋偶成》,當辨正。後孫覿三詩下所注,亦不確 《江浙十二家詩選》(乾隆間刻本)卷一作「字綿百,一字勉伯」。 ->補 按:《吴郡志》(汲古閣本、守山閣本)卷三十三「普明禪院」下引程師 孟詩
- 四四 張祜 按: 南宋洪邁編《萬首唐人絶句》(書目文獻出版社横排本)卷三十二録作杜牧《懷吴中

馮秀才》詩,唯有异文:「却憶重游」作「却算游程」,「今」作「因」,「疏雨」作「秋雨」。 北宋朱長文撰

《吴郡圖經續記》卷中「普明禪院」下云:「楓橋之名遠矣,杜枚詩嘗及之。」當即指此 詩

乘,於古宜詳,况此寺原於唐人佳句而傳,得此益切於典要。徒據明季國初諸名流之題記,於寒山 繼詩之次。韋詩明言「寒山」,祜詩明言「楓」,一見《韋蘇州集》,一見《吴郡志》,確爲佳證。 又,鄭文氏眉批:「韋詩見郡志《寺觀》門,張祜詩見郡志《津梁》門「楓橋」注,俱宜移寫《志詩》張 凡撰志

漫無考辨,未盡足徵也。」

五 窣堵波至殊誤 藍記》。 鄭文氏勾去,並作眉批:「《文粹》不足據。「窣堵波」,梵語,謂塔也。見《洛陽伽

云 覺 按: 《貞居先生詩集》(《武林往哲遺著》本)卷一作「日覺」。

## 附寒、拾事迹

《寒山子詩集傳》 唐朝議大夫、使持節台州諸軍事守刺史、上柱國、賜緋魚袋

閭邱胤撰。

唐 興縣西七十里,號爲寒岩。 詳夫寒山子者,不知何許人也。自古老見之,皆謂貧人風狂之士,隱居天台 每於兹地,時還國清寺。寺有拾得,知食堂,尋常

卷三

寒拾事迹

C

言 枯 寒 州 師 治 性 乃 獨 收 風 : 0 樺 狂 舒 悴 笑 貯 Ш 轉重 不 師 餘 容 非哲 皮爲冠 咄 拾 忘 得 或 未 乃 時 殘 而 哉 得 其 取 審 去 噀 者 言 菜 僧 笑 是 或 乃 事 相 彼 之, 日 咄 遂 滓 遇 安可 布裘 否?時縣申 來, 地 氣 哉 於竹筒 : 捉 須 到 當 !三界輪 罵 在 口 臾祛 任 身居 禪師 識 破 理 有何賢 或 見 打 之矣 敝、木屐 合其意。 清 之。 内, 趁 殄。 H 名 几 寺 後 稱 豐干 寒山 ! 乃 少、堪 大,病 乃 庫 寒 迴。」或於村墅 胤 駐 親 履地。 院 謂 Ш 爲 一,言從 若 「當縣界西七十 頃受丹邱 沈 立 往 走 胤 從 師 來,即 思 撫 寺院 使 文 日 仰 幻 有 掌 厨 是故 天台 殊 ? 生 得, 遁 負 田田 0 躬 台 薄 中 兵與 Ш 迹 若 至 或 凹 而 問 官、臨 著 州 日 國清 官 去。 或 大 禪 欲除之,應 火。」 牧牛子 海 : 清 里 遁 笑 暢 宿 島嵐 迹, 良 或長 寺來,特 途之日 乎 果 言 見 内有 道 拾 訖辭 之不識 毒 而 同 久 合 情。 廊 得 類 而 歌 師 須 乃 徐行 到 岩 笑。 去。 此 化 去。 净 普 H 凡 物。 紫 相 識 水。」 必 所啓言, 賢 叫 岩 胤 訪 或 且 乃 頭 狀 之 須 或 # \$ 逆 狀 噪 13 痛 時 不 保 如 E 古老,見有 勘 進 乃 遂 或 陵 如 見。 乃 貧 護 人,或 途 順 廊 貧 唐 命 洞 持 7 召 全 救 子 興縣 唱 該 若 净 胤 日 自 形 疾, 玄 咏 任 欲 13 水 者 樂 望 又 默。 師 其 唯 貌 有 似 見 間 醫

驚訝: 唯於 見寒 樂。」 拾得 歸 阿 歸寒岩。 道 道 H 郡 大笑 翹 翹 問 ,頻往國清寺止宿。寺庫中有 寺 言偈 竹 遂 答 而 Ш 遂置净 至厨 人,見在 衆 木 子 去,其穴自合,莫可追之。其拾 禪師 114 何故尊官禮 胤 并纂 石 喚乃云: 13 乃 壁 中電前 豐 高 衣 在日 此寺先有豐干禪師 重 書詩,并村 聲喝 集成卷。 厨 干 問 對、香藥等,持送供養。 禪師 ,有何行業?」僧 中。」僧引 僧 ,見二人向火大笑。 日: 二貧士?」時二人乃把手走出寺。 「豐干饒舌,饒舌 日: 院 「賊!賊!」退入岩穴,乃云: 墅人家廳 胤 在 此 胤 經藏 栖心佛理,幸逢道人,乃爲贊 二人肯止此寺否?」乃令覓訪,喚歸寺安置。 至豐 後,即今無人住得。每有 院 行者,名曰拾得。」胤乃特往 壁 干禪師院,乃開房,唯 日 在 E ! : 得迹沈無所。 何處? 爾陀 所書文句三 胤 一豐干 時二人更不返寺,使乃就岩送 便禮拜,二人 不識 并拾得、 在日 禮我 ,惟攻舂米供養,夜乃唱歌自 白 乃令僧道翹等具往 寒山 餘 「報汝諸人,各各努力。」 何爲?」僧徒 連聲喝 乃令逐之,急走 日 首 見虎 虎,時來此吼。寒 子 ,及拾得於土地堂壁 見在 迹。 禮 胤,自相 拜。 乃問 何 奔集 處? 到 僧 把手 日 而 或 E 」時僧 「清寺, 源 寶 胤 Ш 即 相 111 而

迹

菩薩 遁迹,示 同貧士。獨居寒山,自樂其志。 貌悴形枯,布裘敝止。 出言成

章,諦實至理 呵 撫指。或走或立 凡人不測,謂風狂 ,喃喃獨語。所食 子。 厨中,殘飯菜滓。吟偈悲哀,僧 時來天台,人國清寺。 徐步 俗 長 品性。 廊 呵

清,圖寫儀軌。 Ш 之士。 南無普賢,拾得定是。 永劫供養,長爲弟子。 聊申贊嘆,願超生死。 昔居寒山,時來兹地。 《寒山子詩集》。 稽首文殊,寒

《仙傳拾遺》:

都

不動搖

,時人自耻。作用自在,凡愚難值。

即

出一言,頓祛

塵累。

是故

國

亦名寒岩,因自號寒山 寒山子者,不知其名氏。大曆中,隱居天台翠屏山。其山深邃,當暑有雪, 子。 好爲詩,每得一篇一句,輒 題於樹間石上。有好 事者

徐 ·靈府序而集之,分爲三卷,行於人間。《太平廣記》。

録之,凡三百餘首。多述山林幽隱之興,或譏諷

時態,能警勵流俗。

桐

柏徵

隨

而

君

唐 仙 四 人,與閭 [庫提要》引此文,而下申之曰: 邱 允事异,無從深考。 《仙傳拾遺》云云,則寒山子又爲中

宋慧明首座《五鐙會元》:

問"「莫是文殊麼?」曰"「豈可有二文殊?」師作禮未起,忽然不見。趙州代日 甚麽?」師曰:「禮文殊。」山曰:「你不是我同流。」師尋獨入五臺,逢一老人便 游五臺,便是我同流。若不共我去游五臺,不是我同流。」山曰:「你去游五臺作 我道甚麼?」寒山、拾得俱作禮而退。師欲游五臺,問寒山、拾得曰:「汝共我去 影像,猿猴探水月。」曰:「此是不照燭也。更請道看。」師曰:「萬德不將來,教 天台山豐干禪師,因寒山問:「古鏡未磨時,如何照燭?」師曰:「冰壺無

文殊!文殊!」

日: 关, 蒼天! 」山 少鹽醋!」因趙州游天台,路次相逢。山見牛迹,問州曰: 茄 牛去?」山曰: 串,日:「是甚麼?」僧曰:「這風顛漢。」山向傍僧曰: 「不識。」山指牛迹曰:「此是五百羅漢游山。」州曰: 天台山寒山子,因衆僧炙茄次,將茄串向一僧背上打一下。僧回首,山呈起 曰"「這廝兒,宛有大人之作。」 「蒼天,蒼天!」州呵呵大笑。 Ш 曰:「作甚麼?」州曰:「蒼 「你道這僧,費却我多 「上座還識牛麼?」州 「既是羅漢、爲甚麼却

天台山拾得子,一日掃地,寺主問:「汝名拾得,因豐干拾得汝歸。 汝畢竟

卷三

寒拾事迹

〇六

姓 與 想 捶 爾 那 助 胸 個 哀? 合, 甚 事 H 麼?」拾得放下掃帚,叉手 如 : 何?」 二人作 「蒼 切 法 天 維 無 ,蒼天!」拾 差。」 那 舞,笑哭而 叱之。 得 得 出 曰:「大德且住 日 0 : 而立。 國清寺半月念戒衆集,拾得拍手 作 甚 主再問,拾得拈掃帚,掃 麼?」山 ,無嗔即是戒 **□**: 示不 見道 心净即 東家人死 地 日: 而去。 出家 聚 寒山 我 頭 西 性 作

明瞿汝稷《指月録》:

道 歌 拾 何 日 晤語 乘虎 師師 日 : 照燭 五臺,逢一老人便問: 天台豐干禪師,不知何 爾 日 ? 汝 : 潜 人 去 聽 松門,衆僧驚畏。 游 共 師 萬 者都不解,時謂 我 Ŧi. 日:「冰壺 德 臺 去游 不將來,教我 作 甚 五臺,便是 麼?」師 無影象,猿猴 「莫是文殊麼?」曰: 許 本寺厨中有二苦行 風狂,獨 人。 道甚麼?」寒、拾 日 我 同 居天台國清寺, 禮 流。 與師 探 文殊。」 水月。」曰: 若 相 不 親。 - 共我 Ш 俱禮 「豈可有二文殊?」師作禮未起, ·, 日 日 翦髮齋眉,衣布裘,嘗誦 去游 日 寒山子 拜。 寒山 此是 爾  $\overline{\mathbf{h}}$ 不 、拾得。二人執爨, 臺,不 不照燭 問 是 師 我 欲 是我 「古鏡 游 同流。」師 也。」更請 Fi. 同 臺 未磨,如 流。」山 問寒、 唱道 尋獨 師

賢。」日: 能 問 忽 寒、拾二人見在 寺, 愈。 然 佛 理 問師所在及寒、拾踪迹。僧道 師 . 見。 此 造丘 「此二菩薩 答「隨 趙州因沙彌舉此,州代干云:「文殊,文殊!」後回天台山,示 ,以咒水噴之,立差。胤异之,乞一言。 僧 時二二字。 厨 何在?」師日: 執 役。」胤 初 人師房,惟 翹 閭 對 邱胤出牧丹邱 即 日:「豐 國清寺寒山、拾 見虎 干舊 迹,復 將議 師 院 問 在 日 得也。」胤 翹 巾 經藏後, 車, 到 滅 任 忽 師 後 記 今関 患 在 既 謁 頭 此 師 至 文 痛 無人矣。 作 凡 任 殊、 醫 何行 有 即即 莫 普

業?」翹曰:「惟

事

春穀供僧,閑

則

諷

咏。」乃入厨訪

寒、拾,如

下

章叙之。

逢。山 滓 次 枯 羅 風 食之。 將茄 漢游 瘁 顛漢。」山 布 寒山 見 Ш 襦 4 串 或廊 三州 子 迹,問 向僧背 零落,以 本 向 下 旁僧日: 無 徐行,或 氏 州 上打 族,始豐縣 日 樺皮爲冠,曳 既 是羅 你 下。 望空 還 漢 識 道 一噪罵,寺 這 西有 牛麼?」州 僧 爲甚麼却作牛去?」山 僧 П 大木屐,時來 首,山 一費却 寒、明二岩, 僧 呈 以杖逼逐,拊 我 日 多 起 茄 少鹽醬!」 「不識。」山 國清寺,就拾 以 串 其 ·, 日 於 掌大 日 寒岩中居 : 指 是 笑 牛迹 趙 得 蒼天,蒼 甚麼?」僧 而 州 取衆僧 去。 日 游 止 得名也。 天 台, 天!」州 此 殘 食 路 僧 是 容貌 及 Ti 次 炙 茄 這 菜 印 相

之日: 作。」 而合。閭邱哀慕,令僧道翹尋其 干饒舌。」二人即 阿 大笑。山 「賊 閭 一邱入厨,見山同拾得圍爐語笑。 !賊 日: 「作甚麼?」州曰: !」便縮身入岩石縫中,唯日: 相携出 一松門。 園 邱 「蒼天,蒼天!」山 又致寒岩禮謁 邱致拜,二人連聲 「汝諸人各各努力。」其石 ,送衣服、藥物。 「這廝兒,宛有大人之 咄 叱, 且笑曰: 二人高 縫 忽然 聲喝 豐

餘首。 食滓 於僑 清,故名。 得拍手曰:「聚頭作想那事如何?」維那叱之,拾得曰:「大德且住,無嗔即是 得汝歸。 去,寺主 不見東家 ,以筒盛之,寒 陳 拾得者,不言名氏,因豐 後曹山寂 如 罔 汝 上座塑形 後沙 人死,西家助哀?」二人作舞,哭笑而 測。 畢竟姓個甚 門靈熠攝受,令知食堂香燈。忽一日 寒 禪師爲 山 Ш 前,呼日: 捶 來即與 胸云 麼?」拾得 之注釋,謂之《對寒山子詩》,行於世 、負去。 「蒼天,蒼 「小果。」聲聞靈熠,怒, 干禪師 遺迹、得所書林間葉上及村墅屋壁辭頌、共三百 放下苕帚,叉手而 一日掃 Ш 中經行,至赤城道側,見兒孤啼,拾 天!」拾得 地,寺主 去。 却 立。 問 問: 因罷斥,令厨 ,登座與佛象對 或 寺主 清寺半月念戒衆集, 「汝作 「汝名拾得 一再問。 甚麼?」山 内滌器。每 拈帚掃 因 盤 而 一豐干 日 地 瀘 拾 復 拾 或

藍 戒,心净即出家。我性與爾合,一切法無差。」 神, 日: 「汝食不能護,何能護伽藍?」是夕,神示夢合寺僧曰:「拾得譴我。」 僧厨食爲烏所啄,拾得以杖抶伽

由 .是著异,呼曰賢士。未幾,與寒山隱石岩而逝。道翹纂寒山詩,得偈亦附焉。

按:寒、拾行業,此篇所録皆本《傳鐙》,間采閭邱《詩集傳》。一燈所分,燈 無异照。然章有并析,詞有詳略,字句亦小小不同。佛燈普遍,未敢妄節。

其下陳文莊《天台憶》,凡有複緟,即從芟薙,義各有當,非有所取舍焉。

陳文莊《天台憶》:

親, 余住 名。雖出言如狂,而有意趣。予登寒、明二岩,蒼老絶似雁蕩,是其出游地也。 或問所以,對曰: 聲、松聲、 被 髮布裘,或時唱歌。人問之,第云:「隨我騎虎游松門。」與寒山、拾得三人相 每邂逅,則長吟大笑,人莫測也。 國清寺久,住拾得竈下,談逾夜分,晴眺松岡,雨洗昏濛,夜半不辨濤聲、雨 盟 干禪師,不知何許人,居天台國清寺,或云邑人豐尚書之子。 篁聲、梵聲,如是半月。 「吾拾文殊菩薩舍利歸西天耳!」後人於此建塔。《無夢園集》。 寒山子入滅後,有梵僧杖錫,拾黄金鎖子骨。 寒山,不言氏族,以其寒石山中居止得 形貌寢惡,

寒拾事迹

按 文莊 又有 《台雁憶》一首,記寒、拾古迹,寒岩洞有寒 山舍利塔。

《寒、拾問答》:

我, 他能 榮華,我 息 事隨緣 他。再待幾年,你且看他。」寒 隨 過 今多少 他自 ,何愁道不 彌勒菩薩訣 如何處治 言,周 昔日 人,那 乾 1 却 7 寒山問拾得日: 公有 不待見。 有 了。 個 乎?」拾得云: 人罵老拙,老拙只説好。 我 ,你且聽我 神算。 活 也有力氣,他也無煩懊。 人弱 幾 名利總成空,我 千?這個逞英雄,那個做好漢。 心 孔明大智謀,樊噲救 不 念,偈云: 弱 「世間謗我、欺我、唇我、笑我、輕我、賤我、 Ш ,人貧道不貧。 「只要忍他、讓他、 云 「還有 心 『老拙 無足厭。 有 人打老拙 這樣波羅蜜,便是妙中寶。 穿衲 甚訣 主 難。 可以 心要修行,常在道 襖,淡飯腹 堆金 由他、避他、 韓 ,老拙自 信功勞大,臨 積 躲得?」拾得云: 看 如 看 Ш 中 兩 難 耐他、 睡 鬢 飽。補破 倒 白 買 年 中辨 無常 死 敬他,不要理 涕 只 年 唾 好 若知 限。 一劍。 惡我、 「我曾 容顔 在 遮寒,萬 世 面 子 這 變。 愛 消 騙 看

得

想

回頭

,閻王無轉限。

三寸氣斷了

,拿只那個辦?

也不論是非,也不把家

日

月穿梭織

光陰

如射箭。不久病來侵,低頭暗嗟嘆。自

想年少時,不

把修行

辨。

身轉。 荒 公録示,不知所從出。 刀 截 郊伴。他看世上人,都是精扯淡。 也不争人我,也不做好漢。罵著也不言,問著如啞漢。打著也不理,推著渾 兩斷 也不怕人笑,也不做臉面。兒女哭啼啼,再也不得見。 跳出 紅火坑,做個清凉漢。 雖釋子語難以我法論,亦不似唐以前緇流筆墨。 勸 君 悟 即回 得長生理, 頭,争他修行幹。 日 重在文節遺言,姑録之。 月爲鄰伴。』 好 做 個 争名 個 大丈夫, 此篇陸文節 利 須 把

潘耒《寒岩》詩: 鎮 士合藏身。 長新 。《遂初堂集· 石膚剥盡存真骨,雲頂單栖絶四鄰。 嘯天獅子最嶙峋,開口平吞摸象人。 台蕩游草》。 會得寒山詩外句,無邊烟景 雄拔萬山皆奪氣,孤高 大

沈 子謂: 文整《寒岩》詩: 象、石犀。寒山昔晏坐,三年等俄頃。至今蟠膝處,石上留餘影。虹梁跨彎環,下 到 視 氣深迥。横飛瀑如練,倒挂藤疑綆。晴空蓄風雷,白晝幻昏冥。人生麈土 此 庶一醒。 詩,有唐人道不到 野猿 突兀萬仞岡,一獅踞其頂。 時嘯群,孤鶴忽聞警。試讀寒山詩,清言發深省。原注: 狰獰欲搏人,象犀勢俱屏。 旁有石 胸, 朱夫

按: 稼堂、確士兩先生詩,皆爲天台而作,事在祖庭,故不録《志詩》篇

寒

Ш

處。」

《歸愚集·台山

一游草

附《寒山子詩集》解題及諸家書牘、詩話、序、跋、考證

宋 朱子《與南老帖》原本草書,下陸《帖》同。 提行悉依原刻〔一〕。

當 隱 口。 乾、 往 清 好 每 爲慰。 南 本否?如 耳 同 以 紫菜多品,尤荷厚意。 便幸視 爲 公禪師 此樂爲念也。 Ŧī. 恨。今又聞故人挂錫其間,想見行住坐卧,不離水聲山色之中,尤以不得 月十三日,熹悚息啓上。 二刻 天台之勝,夙所願游。 至,相 方 未 亦 丈。 有、能爲讎校刊刻、令字畫稍大、便於觀覽、亦佳也。寄惠黄精、笋 全作也,但攙行奪市(三),怨不免失故步耳!《寒山 望千里,無由會面,臨書馳情,千萬自愛,不宣。 熹悚息啓上國 新詩見寄,篤摯超精,又非往時所見之比。但稱説之過,不敢 偶得安樂茶,分去廿瓶,并雜碑刻及唐詩三册,漫附 往歲僅 久不聞動静,使至,特唇惠書,獲審此日住山安 .得一過山下,而以方有公事,不能登覽, 子詩》彼 中 有

暇寫 ,俟寫得,轉寄去未晚也。 熹再 啓。 清泉各安佳。兒輩時聞黄婿歸三山已久,時得書也。《出 《寒山詩》刻成,幸早見寄。 有便足時,至臨安趙 師 表》未

節推廳、托其尋便、必無不達、渠黄岩人也。 熹再啓。

陸放翁《與明老帖》:

獨立兮忠貞。」此寒山子所作楚詞也,今亦在集中。妄人竄改附益,至不可讀。放 「有人兮山徑,雲卷兮霞纓。 秉芳兮欲寄,路漫兮難征。心惆悵兮狐疑,蹇

王深寧《困學紀聞》

翁

書。

寄天封明公。

或以刻之山中也。

鶴、黄籍、白丁、青蚨、黄絹、翁注:據本書、「絹」當作「卷」。 黄口、白頭、七札、五行、録 兮欲寄,路漫兮難征。心惆悵兮狐疑,蹇獨立兮忠貞。」 熊席、青鳳裘。 「子」下疑脱「張」字。 寒山子詩,如施家兩兒,事出《列子》。羊公鶴,事出《世説》。如子卜商〔三〕, 而楚辭尤超出筆墨畦徑,曰:「有人兮山陘,雲卷兮霞纓。秉芳 如侏儒方朔,涉獵廣博,非但釋子語也。對偶之工者,青蠅、白

《世説》。如一道一德、言有枝葉、雲梯棘刺、亡羊補牢之類,尤多。 餘姚翁元圻注"何云此引何屺瞻校語"酒爐猛狗,出《韓非子》。枕流,事出 六極、九維,東岱、北邙,衛氏兒、鐘家女,三端、六藝,黄腸、白骨,獼猴心、 又云:

解題考證

DL

羊叔 卷。 説 矣!若全而歸之,適於他國,爲吾之患不輕矣!」遂則之,而還諸魯。 干秦 **吚嘶蹇」,可爲失笑也。放翁曾寄書天封明老,屬爲正之。又云:** 獅 乎大國之間。大國吾事之,小國吾撫之,是求安之道。若賴兵權,滅亡 而窘於貧,羨施氏之有,因從請進趣之方,二子以實告。孟氏之一子,以術 之傅。好兵者以法干楚王,以爲軍正。施氏之鄰孟氏同有二子,所業亦同, 符》篇: 雨,松鳴 之道也。」遂宮而 子 寒山子,隱唐興縣 排 Ė 吼,待鶴、乘魚,亦工。 子有鶴善舞,客試 調》類: **,秦王曰:「當今諸侯力争,所務兵食而已。若用仁義治吾國,是滅** 魯施氏有二子,其一好學,其一好兵。 不假風。」真佳句也。 劉 遵祖 放之。其一子,以法干衛侯,衛侯曰: 驅來,氃氋 少爲殷中軍所知,稱之于庾公,遂名之爲羊公鶴。 寒山岩、於國清寺與隱者拾得往還。 又云: 楚辭則爲人竄爲 元圻案"《唐書·藝文志》"《寒山子詩》七 而 不肯舞,故稱比之。 好學者以術干齊侯,爲公子 五言。第七句云「衆喔 「吾弱國也,而 《漢書·東方朔 「苔滑 《列子·説 一可待 非 111

傳》:

侏儒長三尺,奉一囊粟。臣朔長九尺,亦奉一囊粟。侏儒飽欲死,臣朔

晋、楚遇于鄢陵。潘尪之黨與養由基蹲甲而射之,穿七札焉〔九〕。 後蔡邕題八字,曰:「黄絹幼婦,外孫齏臼。」 淳〔八〕,字子禮,甫弱冠而异才。尚使作《曹娥碑》,操筆而成,無所點定。其 環無已。故《淮南子》名錢曰「青蚨」。 蚨,蟲如蟬。 訛謬。上詔虞玩之等更加檢定,曰:「黄籍,民之大紀,國之治端。自頃巧僞 [五],忽有二客來吊,不哭而退,儀形鮮异,知非常人。 遣看之,但見雙鶴飛 己者,足以不恨。《太平御覽》九百十六《陶侃别傳》曰: 侃丁母憂在墓下 自恨犯上獲罪,當長没海隅,生無可與語,死以青蠅爲吊客,使天下一人知 飢 黄口,不獲二毛。 陽傳》注曰: 日甚,何以厘乎(六)?」注: 杜佑曰:「黄籍者,户口版籍也。」《漢書·鄒 而冲天。 欲死。 《三國志·吴·虞翻傳》注:《虞翻别傳》曰:翻放逐南方〔四〕: 《通鑒‧齊紀》: 高帝建元二年,宋自孝建以來,政綱弛紊,簿籍 `「白徒,言素非軍旅之人,若今言白丁矣!」《搜神記》: 青 殺其母子,塗八十一錢,凡布〔七〕,或用子,先用母,皆飛歸,循 《史記·鄒陽傳》: 白頭如新,傾蓋如故。 《會稽典録》:上虞長度尚弟子邯鄲 《淮南子》: 古之伐國,不殺 《左傳》: 《後漢

噬之。 售。 鳳、 中 丹雀 設 問 應 玉 之 此 奉 各 几 里 傳 酒 人 玉 \* 所 雌 床、 其故? 以 奉 酸 白 讀 雄 而 書,五行 象 里 不 牙簟、 昭 人云: 售也。」《韓非子》記管 王 綴 并 緑 鳳毛爲裘 下。 熊 「公之猛 席 ^ 西 狗, ^ 京 拾 雜 人 遺 ^ 挈器 仲 晏子 記 記 對 \* 齊 \* 而 周 趙 桓公語, 人 飛 昭 且 有 燕 王 酤 酤 時 女弟 與《晏 塗 公 酒 居 者 酒 修 子 狗 昭 酒 或 》同。 獻 陽 迎 酸 而 不 殿

宋,宋 ^ 燕 語 林 也。」 先 戰 窮 歲  $\pm$ ^ 世 或 徵 不 紀 策 亦 説 衛 ^ 入宮 巧 昌遺 戰 何 \* 諸 洗 術 或 罪之有? 王三子,不如衛家一兒。」 馬 公輸 孫 策》: 不 穎 矢。 子 請 飲 識 般 荆 酒 以 通達 既發, 見 爲 日 棘 食 楚 兔 : 肉 刺 ^ 設機 論 而 列子 雨 飛 之端爲 所 顧 者 衛 以 霽日 將 犬,未爲 以 \* 以 枕 爲 母 棘 出,視 以 流 紀昌謀殺飛衛,二人交射 Ŧ 猴。 刺之端 攻宋。 欲 胄 遲 子 劉 之晏 母 洗其耳 也。 回向《列 平 扞之, 猴 墨 子、 陰 成 亡 子 之間,而 所 女傳 武 羊 日 巧 而 子 而 無差焉 以 之右〔一〇〕。 日: 補 漱 聞 牢 棘 石, 公爲 齊鐘離 未 人 刺之母 ! 于 欲 主 雲梯 路。 爲 礪 ^ 春者 欲 晚 韓 猴 其 世 飛 也。 觀之, 非 將 齒 衛之矢 子》 爲 可 以 ^ 攻 1 語 見 必

過也。」 之不 仙 揚 生心 命。 凑。」 注 若 味 至 傳 我 不 端 邑之女,其爲 有人兮 性,有 停。 武武士 飛 可 \* 於 蘇 觸 宋 ^ 越 到 佛 後 : 林 法 知 前 Ш o 王 ^ 覺 鋒 無 漢 如 日 坐 湖 助 楞嚴經》: 子 暫住時,是名現喻 禪 端 獮 書 Ш 所 陶宏景《 喬見 猴。 人極 師《宗鏡録》三引《 佛轉輪, 以 、辯士舌端 • 楹」,第五句「心」字作「獨」字。 以 郅 柏 琴高 桓 獮 惲 醜,行嫁 木黄心 猴之性,捨 富樓那云: 本 長 傳 因 乘之。 草 日 × 獅 : ÿ ⊟ 不售。 昔文 子 致累棺 0 待 吼 ^ 漢 我 大 口 世 王不忍露 鯉 成 宋許 書 緱氏 取 驗 涅槃經》日: 最 呵 外 一。衆生心性,亦 《韓詩外傳》: 尊 即 爲 羅 故日 彦 霍 今衆生之心 知 Ш 漢。」 魚 周《詩 光 頭 我 白骨 中 傳》: 0 黄 有 之王 至 話》載寒山子 大 武 腸 謂 ^ 云 太 期 辨 ,形既可 賜 何現喻 平御覽》 才 如如 君子 果乘白 王不以 木 雖屈 以音 黄腸 復如 頭 猿猴 宜 皆 ? 如 愛, 天下 題 避三端: 是。 向 宋復生,不 楚 鶴 九 聲 之處高 凑 内, 辭 又 百 輪 經 至 易 取 各 首 能 中説,衆 + 教 Ш 故 人 著色聲 神 我 樹 顛 句 具 文 望 ^ 變, 列 發 之 能 作 題 ±

## 《天台山國清禪寺三隱集記》

我 教 壺 輪 行,或厨内執爨。或混處童牧,或時叫噪,望空漫駡。或云: 果。」熠告尊宿等,易令厨内滌器。 後庫僧靈熠令知食堂香燈。 拾,因師 其氏族,時謂 隨 我 之而 麼?」曰:「我去禮文殊。」曰: 去,非我同流。」曰:「我不去。」師曰: 無影象,猿猴探水月。」曰:「此是不照燭也。」更請師道。 迴。」僧以杖逼逐,即撫掌大笑。一日問師:「古鏡不磨,如 時二二字。常唱道,乘虎出入,衆僧驚畏,無誰語。有寒山子、拾得 道什麼?」寒、拾俱作禮。 豐干禪師,唐正觀初居天台國清寺,翦髮齊眉,衣布裘。人或問佛理,止答 去。 至赤城,道側聞兒啼聲,問之,云孤 寒容貌枯悴,布襦零落,以樺皮爲冠,曳大木屐。 風狂子,獨與師 忽登座,與佛象對盤而餐,復於聖僧 相親。 師謂、 「汝不是我同流。」師尋獨人五臺,逢一老翁, 常日齋畢,澄濾殘食菜滓,以筒 寒日: 寒,居止唐興縣 「汝不是我同流。」寒問: 弃於此,乃名拾得。携至寺,付 「汝與我游 西七十里寒岩,以 五臺,即 一咄 日: 何照燭?」曰: 時至寺,或廊 我 哉、咄 门同流。 「萬 「汝去 盛 前 德 呼 之,寒來即 者 哉 是 曰:「小 亦 不將來, 若 ! 三界 五臺作 一庫院, 得名。 下徐 不與 不知 冰

對。 他。 作 天,蒼天!」寒日: 迹 問 破 倚 舍 在 道 4 風 因 什 作虎 寒 牧 我 門 何 去?」寒曰:「蒼天,蒼天!」州 衆僧炙 顛漢。」寒示 拾拈 説 4 麼?」寒日: 處?」拾置帚, 撫 自 「莫是文殊否?」曰: 日:「上座還識 從 戒。」拾笑曰: 掌 歌 吼三聲。潙無對,寒日:「自從靈山 茄 微 咏,叫天曰:「我 别後 拄杖曰: ,以茄 笑曰:「悠悠哉 已三生,作國 傍僧曰:「你道這個師僧,費却多 串打僧背一下。 贵 叉手而 「老兄喚這 「這小廝兒,却有大人之作。」潙 牛麼?此是五百羅漢游 「無瞋即是戒, 不見道東家 「豈有二文殊?」及作禮,忽不見。後回天台而化。 有一 立。 王來,總忘却 ! 聚頭 個作甚麼?」爲 珠,埋在 主 图 人死,西家助哀?」因 呵 僧回首。 心淨即出家。我性 測。 作相這個如 叫 大笑。 陰中,無人別者。」衆僧説戒,拾 也。」拾 寒捶 一别,迄至於今,還相記麼?」潙 寒持串云: 又 胸 寒日: 山。」州 無對。 掃 日 少鹽 何?」僧 地,寺主 Ш 日: 來寺受戒,與拾往 醬。」趙 [與汝合,一切法無差。] 驅 蒼天,蒼天!」 「笑作什麼?」州 寒日: 作舞,笑哭而 「是什麼?」僧 怒 既 一問: 呵云: 州到天台, 是羅漢,爲什 「休、休!不 姓 個 拾 下 出 什 云 。又於莊 問 日: 驅 麼? 松門夾 行 風 4 麼作 用 亦 見 一汝 至 「這 住 問 牛 無 蒼

卷三

解題考證

爲? 否? 寺執 邱 寒 應須净水。」索器, 咒水噀之, 立愈。 名豐干,言自天台來謁,使君告之病。師 烏 招 牛 記 ·拾得打我。」 詰 山、拾 遁迹,菩薩 此 致 出 謁 咎, 「唯 寒山 耗, 乃 爨滌器寒山、拾得 相携出 文殊、普賢。 呼前 事 拾 怨 得 、拾得復是何人?」僧道翹對 負 杖 恨 X 尚 應身,號拾得賢士。初,聞邱胤將牧丹邱 挟 世僧 松門,自此不復入寺。閭邱歸郡,送净衣、香藥到岩。寒高聲喝日 連 春 於 處僧 供僧 旦説夢,一一 之,日: 何 聲 名,牛即 阿 此二菩薩、見之不識、識之不見。若欲見之、不得 厨。」 開 ! 叱 執 佛力雖然大,汝辜於佛恩。」護伽 是也。」 閭邱到任三日,至國清,問"「此寺有豐干 「汝食不能護,安能 閭 則 應 諷 邱 手 無差。 聲 復 咏。」人厨尋訪寒、拾,見於竈前,向 X 師 而 大 房, 過。 笑日 視神像,果有 閭邱异之,乞言示此去安危之兆。 止見虎 日 : 復日:「前 日 : :「豐干舊址在經藏後,今闃 「豐干饒舌,饒舌 護伽藍 「身居四大,病從幻生。若欲除之, 迹,復問: 所損 生不持戒,人 乎?」神附夢於合寺 頭疾,醫莫能愈。 、驚异。牒申郡縣,郡 「在 藍神 ! 此作 彌 僧 面 火拊 陀 厨 而 何 不識 下 畜 取 行 掌 無人 食 心。 相 業?」翹 遇禪 大笑。閭 禮 僧 每 師 矣! 謂 禪 或 日 每 汝 何

手,閭 叱,自 此 頌 知 薪 賊 人 南 及村墅 滅 峰 賊 俟 執 邱 距 於此 手大笑, 閭 !」遂入岩石縫中,且 百 未 人家三百餘 世 寺 嘗 , 東 因 君 至 號岩爲「拾 子。 寒岩、拾得 南 二里 邱 淳 歸郡,遣送 首 熙十六年歲次己 遇 0 拾亦 得」。 亦出寺門二里許 梵儀,持錫 日 有詩數十首,題行壁 : 衣藥,與夫挑鏁子骨等語。 閭 邱俾道翹 報汝諸人,各各努力。」石縫忽合。後有 入岩,挑鏁子 西孟 入滅 尋訪 春十有 遺 今《傳鐙 間 迹,於林間 骨, 九 云。 日, 日 一》所 : 按 住 乃 取 Ш 葉上 録 知寒 舊《 禹 拾得 誤 穴 矣 得 序 Ш 沙 寒所 \*, 舍 不 門志 因 執 利 僧采 書辭 筆 閣 13 南 及 邱 HH

釋可明跋

謹

記

其深 此 敠 日 乎 而 而 語 人,較世里尤當寶玩。 ? 試 大 ? 1 東皋苾 疑「識」之訛。 或直 垂 一迹,不泄密 **芻無隱得舊** 道 其 事,使賢 究己 因。語言三昧,發於淵才雅思。 躬,明心 本,感慨 時屠維赤奮若 鄙 同笑。 性,此其格言。 重 刊 粗言 1,俾爲 軟 陬月上浣,華山除饉男 語 讎 咸 校,因題其 緩 彰 細 披尋, 至 大圭 理。 **〈後,**一 不琢,豈 大有好笑,板 悦 耳目 覽知 可 追琢 明敬 適 妙 口 跋 行 者 體 其 可 Ħ. 由 可 此 百

小,亦未

敢

臆定

大字本 附 詩 首 : 此 篇 ,慧身但 刊以 補東皋本 之缺,非其所作也。 題 日 聖 制 古 文 疑 爲 時 王之

若 人 何 鄉 姓氏,隋季□ 」杰士。 屠龍技癢無所施,東守西征 徒萬里。 天

不 中 Ш 厭 笑 礙 薇 荒 三十年 寒生 渴 寒潭瑩無滓。 淫 羖 來只飲 不 齒。 攊 君 堪 擬 回首 Ш 大 將 中 地 時訪 大 水。 紅 Ш 筏 塵 河 豐 渡迷津,咳 風 移 市 干看 瓢 0 姓 夏擊惱 李。 遨戲 拾公,膜外 滿眼 唾 千岩萬 丝 烟 懷,移家 清 雲 生筆 形骸忘 賢登廟堂,書生 水 間,駕言足躡龜 底。 屢人 爾汝。 銀鈎 深雲裏。 擾擾 灑 一分合 洒 毛 貧 落岩 人 Ш 履。 寰 衣 林 阿 蟻 艦 死 不 慕 縷足 至 飢 羶 一今護 朅 不 哂 風霜, 采 來 守 然 Ш 寒

俚 廖 煩 一。近來 子 千 Ш 鬼。 載 無 二二具 世 人 無 知, 相馬 偶 眼 人,頗 逢 九 知 方皋,但從 者 憐 惟 名字遺青 知 此。 肥 瘦 史。 知 求 與不知於我 形 雲衮霞纓妙語言,謂 似。 詩成 乎 衆 何知 口 浪 ? 雌 黄 與騷章 此 ,往往視之爲 其 所 無异旨 以 得 爲 寒 廖 下

無我 曩 閱 慧身敬 東皋寺《寒 書。 Ш 集》缺 記、 一 跋、 此 詩,據日本仿宋刻《寒山 篇, 適 獲聖制 古 文,命 子詩集 I 刊梓,以 出 全其璧。觀音比丘

Ш

元徐一夔《重刊〈中峰和尚廣録〉序》:

功完。按:本公全書爲《天目中峰和尚廣録》。《擬寒山詩》,其中之一種也。徐大章《始豐稿》。 南山大普慶寺。板毁,有武弁之士曰張子華,謀於智暠、慧澤二師重刊,逾年而 大德延祐之間,中峰本公居天目山,有《擬寒山詩》。《廣録》鏤板于杭州之

白珽《湛淵靜語》:按"白珽字廷玉,元錢唐人。

者,多混僞作,以諧俗爾。 路漫兮難征。心惆悵兮狐疑,蹇獨立兮忠貞。」前輩以爲無异離騷語。今行於世 所存詩文可知。如寒山子詩,其一云:「有人兮山陘,雲卷兮霞纓。秉芳兮欲寄, 呂洞賓、寒山子、皆唐之士人。嘗應舉不利,不群於俗、蓋楚狂、沮溺之流、觀其

明瞿汝稷《寒山詩序》:

之冷泉,足以清五熱之沈濁,皦乎若十日之出榑桑,足以破昏衢之重幽。此寒山 於寒岩,蹢躅於國清,此寒山之可見者也。小言大言,若諷若道。瀏乎若傾雲寶 與群有酬酢於無盡哉!」曰:「以其言之,得復謵於世乎?」曰:「未也。夫栖遲 嚴道行刻《寒山詩》,命那羅延窟學人序之。那羅延窟學人曰:「寒山氏日

解題考證

ĮΠ

言 於 見? 循 欲 牛 和 鐍 起 默 前 無盡 卒 於 掊 慈 其 口 不 夫 而 見鐍於色,衆生之所 聞 不 勤 聞 衆 不 聞 刹 息 口 道行 也,不 必必 可 能 者 生 塵 泊 聞 而 一、倦告試,掊衆生之鐍,使之見,使之聞 聞矣! 之 也。 盡 不 而 不 乎 以 而 -聞,顛 見盡 非 鐍 能 闢 聞 以 聞 之 出。 吾聰 使之見使 不 而 司 不 又 聞 旋 以 冥於三苦, 充 寂 可 者,於寒山妙莊嚴海之一漚 何 也,可 而 其聞 剞 吾 聞 吾之目 聞 劂 ? 殫 以 蕩 則 之聞 欲 利 不大哀 衆 見於見,不 聞 而 知 生 寒吾之耳,皆寒山 回環於永劫。於是寒山 見於 沙 生 趨,奚適 寒 也。 界 也。 而 Ш 耶?夫既 無盡 昔未嘗示迹 不見,必 哀衆生之不盡 審於是,即 見於不 見於 而 也。 不與? 見聞 以 不 以宗於不可 此所 見,聞 見 以以 以其言之,得復謵於世 於始豐,今未嘗謝 也。 吾俱 而 也。 於 以 息其 旋 見盡 有能 躡 於 不 哀之,釋珍 而衆 其見。此 寒 聞 聞,不聞 身蹠 崩奔 見,而 聞 故 Ш 循 耶 生各鐍 而 夫 ,俾休於常 乎 不 ? 寒 游 可 帝於不可 右 於 不 運 見 Ш 於 御 吾 不 其 迹 山 可 之所 無盡 襲弊垢 H 聞 於 而 見矣 見 而 ,而 而 無 人 見 寂。 也。 故 以 而 聞 介 間 不 不 謂 殫 聞 不 見,各 運 也 口 能 又 欲 見 鐍 又 而 0 何 何 聞 沙 身 吾 不 於

H

與群有

酬酢於無盡

可

也。」《瞿

冏

聊集》。

燉《寒山子詩跋》: 按: 燉字惟起,號興公,明季閩人,藏書極

老、南老賢於瀚上人遠矣!識者能不呵呵大笑邪?己亥閏四月徐惟起 乎?」上人茫然不答。 樓題跋》。 重加裝潢 一。鼠 齧其腦,漸至於中。 他 第 H 偶訪瀚上人於平遠臺 鼠 齧處,闊深傷字,爲 余遂丐歸,上人視之如棄 余日: 山房,見案頭 「寒山 可恨 也。載觀卷首朱晦翁、陸 子詩 詩 有《寒山 敝 屣 中 也。 即 偈,師 子詩》一帙,上 Ш 窗 其 無事 放翁 知 寒 手 二札 Ш 人 跋。《紅雨 自 之 不 則 黏補, 禪機 知 明

國朝《欽定四庫全書提要》:

又名《三隱集》,見淳熙十六年沙門道南所作《記》中。《唐書·藝文志》載《寒山 道 台 中 一上所書偈言,並纂集成卷。豐干則僅存房中壁上詩二首。允自爲 | 翹尋寒山平日於竹木石壁上及人家廳壁所書,得三百餘首。又取拾 州刺史閻邱允遇三僧事,踪迹甚怪,蓋莫得而考證也。其詩,相傳即允令寺僧 天台唐 《寒山子詩集》二卷附《豐干拾得詩》一卷。浙江巡撫采進本。案:寒山子,貞觀 興縣僧、居於寒岩、時還往國清寺。豐干、拾得則皆國清寺僧也。 之序。 得 土 宋時 世 地 傳

溢,多足以資勸 語也。」今觀所作,皆信手拈弄,全作禪門偈語,不可復以詩格繩之,而機 琶月下彈。長歌三月響,短舞萬人看」,謂其有唐調。原案:此明江盈科《雪濤評語 詩》入釋家類,作七卷。今本并爲一卷,以拾得、豐干詩别爲一卷附之,則明新 有莊語,有諧語,至云『不煩鄭氏箋,豈待毛公解』,又似儒生語。大抵佛語、菩薩 禎引之。寒山子即唐人,盈科以爲有唐調,蓋偶未考其時代。 吴明春所校刻也。 種焉。 别集類 戒。 王士禎《居易録》云:「寒山詩,詩家每稱其『鸚鵡花間弄,瑟 且專集傳自唐時,行世已久,今仍著之於録,以備釋氏文字 謹附訂於此。 其詩有工語,有率語, 趣横

《欽定四庫全書簡明目録》

集》一 最多,拾得次之,豐干存詩二首而已。 州僧,世頗 《寒山子詩集》一 派 此 其濫 傳其异迹。 觴也。 卷,附《豐干、拾得詩》一卷。 别集類 是集乃台州刺史閭邱允令寺僧道翹所搜輯,寒山 其詩多類偈頌,而時有名理。 寒山子、豐干、拾得皆貞觀 邵子《擊壤 子詩

《欽定天禄琳琅續編》:

詩五十六首、皆國清寺僧、亦有閭邱允録、宋時所稱《三隱集》也。 時還往國清寺。 吴明春有刻本。 《寒山子詩集》一函一册。唐釋寒山子撰。寒山子,天台廣興縣僧,居寒岩, 是本宋諱闕筆,雕手古雅,汲古閣所藏。 書一卷,計詩三百十三首,前有閻邱允序,附豐干詩二首,拾得 是書,明新安

錢曾《讀書敏求記》:

藏目録》中,庶不至泯滅無傳耳! 惜乎傳世絕少,此從宋刻摹寫,考南北《藏》俱未收。余謂應同龐居士并添入《三 矣!允令國清寺僧道翹纂集文句成卷,而爲之序贊,附著《拾得録》於詩之前。 《寒山拾得詩》一卷。豐干語閭邱允「寒山、拾得,文殊、普賢」,真爲饒舌

黃丕烈《士禮居藏書題跋記》:

字紙,殊不耐觀。頃命工重裝,知有失去半葉者共四處,以洋紙補之。復取向所 中寄一本示余,楮墨古雅,甚爲可愛。細視之,乃係外洋板刻,惜通體覆背,俱用 似 與遵王藏本相類,當亦宋刻摹寫者也,惜首尾略有殘闕耳。後五柳主人自都 《寒山拾得詩》一卷,載諸《讀書敏求記》,此從宋刻摹寫。余向收一精鈔本,

解題考證

陸心源《儀顧堂題跋》: 俟與藏書家驗之。 宋刻摹寫之外,尚有他刻流傳於世耶?此刻 題「三隱」,後又云□詩本不相類也(一一)。 外皆不可考矣!故兹所失四半葉,無從補全。而二本板心,彼題「寒山 獨。此拾得詩《雲林最幽 收者,核其文理,始信二本互异。 杭州錢塘門裏車橋南大街郭宅□鋪印行」,則又不知此 嘉慶丁卯春三月二十有五日,復翁黄丕烈識 ·栖》一首,内「日斜挂影低」句,精鈔本「日」字下俱缺 詩之次序有先後,分七言於五言之外,洋板 惜遵王所記,但云「傳世絶 似 係洋 板,然寒 刻之果爲何地本矣! 山詩後有 子詩」,此 少」,豈 條云 知

漢」、「昔年曾到大海游」、「夕陽赫西山」凡五首。 既异,字句亦多 「一人雙□不計春」凡四首。寒山詩缺「沙門不持戒」、「可 市 過。 蓋何當作「胡」心耘博士舊藏 《全唐詩》即從此本出。 寒山詩》□卷,毛氏汲古閣影宋鈔本。光緒五年,以番板五枚,得此 不同。 拾得詩缺「人生浮世 也。 卷末「怡然居憩地日」以下 端陽前 Ŧi. 中」、「平生何 H ,以舊藏廣 非善本也。 貴一 所憂」、「故林又 缺,亦同廣 州 刊 名山」、「我見多」 本及《 全唐 州本,序次 斬新」、 書於吴 詩》校

程德全《寒山子詩集跋》

千數百 作。 之勞。 歟?寒山子生有唐之世,值海内初平,瘡痍未復。青宮貽失德之漸,黔首苦征戍 重 瑰 間。一以 味 凡 逋 建 響。 峭 明 博 朝游丹岳 鄭 故寒山 楓 庚 也,若商 "若秋岩木落,山骨巉然。其音節之高簡也,若聆賷桴土鼓,絃管筝琶,頓絶 水太羹,若嚼梅花、飲冰雪,凉冽澈人肺腑。其幽靚也,若方春之花,磊落而 其 中翰文焯亦以舊繪寒山象爲貺,最後復得《寒山子詩集》於俞階青太史。 雖 戌 年 橋寒山寺之議,甚盛舉也。未幾,趙大令夢泰以羅兩峰繪寒山、拾得象來 詼諧謾罵之辭,寓其牢愁悲憤之慨,發爲詩歌,不名一格,莫可端倪。其 、說理之平實也,若老農老圃,坐話桑麻問事。 其意境之寫遠而泬廖也, 夏孟,予移撫三吴。政事餘暇,稍稍歷覽古迹,以存守土之責。時方有 以房、杜諸賢,曾不能致國家於無敝。傳未數紀,遂螗沸雲擾,天下亂 流 子凜霜冰之履,抱杞人之憂,托迹方外,佯狂傲世,自放於山顛水涯 風逸采,萃集一時,不禁爲之歡忻贊嘆。 ,莫栖蒼梧,咳唾九天,珠玉皆落。 彝夏鼎,沈霾千載,一經暴露,光怪陸離,不敢逼視。其清隽也,若 其滑稽也、若東方曼倩。 釋氏所謂因緣者,殆類此 其譎變

解題考證

然而 蘇 世,乃久之不可必得。今得寒山子之粲花妙舌,苦口婆心,揆以今日 然有合。深慨夫世道夷陵,風會日變,雖學士大夫往往汨没心靈,馳鶩榮利,蕩 祕演之厭世,非其比也。予少歷險阻,中經患難,觀釋氏脱形累、達死生之旨,契 本,舊爲曲 詩凡一卷,都三百八首,附拾得詩四十八首、豐干詩二首。 握 明鏡」 世之學人,若僅沾沾於禪悦字句中,則又相即遠矣!昔六祖智能信 未始非對證良藥。 爲塵世繮 也,若莊周,若列禦寇。要其惟一之指歸,則欲使一世之人人蠲嗜欲、明慧業,不 不住。若寒山子詩,菩提妙偈耶?金山晨鐘耶?願與海 州節署之思賢堂。 不知所返,極其弊害,遂隱中於國家。每思一大智慧人,雷音 偈〔一三〕,立證大乘,了無剩義。朱子宿金山寺,五更聞鐘聲,心中便把 網所牽縛,乃能卓然有所成就。 園先生藏。刻既竣,疏其大恉如此。宣統庚戌十月,雲陽程德全跋於 故屬之僚掾,付諸剞劂,將以接迷津之寶筏,然暗室之明燈 用心良苦,造意深微,彼賈島之逃禪, 内具慧根人共參之。 浙鄞吴宗元氏精校 海 社 潮,唤醒 口説「菩提 會趨向

日本澀江全善森立之《經籍訪古志》

比丘無我慧身《記》一篇,閻邱胤《序》并《贊》,又有朱晦庵《與南老帖》、陸 四寸九分,左右雙邊。胤、貞、玄等字欠末筆,字畫端楷,宋槧之佳者。首有觀 「寒山詩集」,下記「豐干、拾得詩附」。每半板八行,行十四字,界長六寸七分,幅 與明老帖》,皆從真迹摹入。末有淳熙十六年沙門志南《記》及可明《跋》。 寒山子詩集》附《豐干、拾得詩》一卷,宋槧本,姬路河合元昇藏。卷首題 放翁 卷首 音

島田翰刻宋本《寒山詩集序》:節録。

有「慶福院」及「無範」印。

宋本竟無一存者。 高 兩代又視之蔑如,不肯數動棗梓,何怪乎其日就湮滅也。則及今爲之表章,亦吾 於何人之手。雖元有高麗刻本,明有閩刻,而近時亦有金陵刻本,實多訛誤,而 之責也。顧僧詩之流傳於今者,唐有皎然、齊己,宋有九僧、劍南希畫、金華保暹、南 過明新安吴明春刻本,而黄蕘圃所獲精鈔本及外洋刻本者,亦今不知其已歸 麗藏亦未收,其見於《讀書敏求記》者,殆幾乎斷種。清《四庫總目》所著録,則 寒山没千有二百餘年,遺集寥寥希傳,雖以南北釋藏之博,猶未采輯之,而 蓋非必其書之未足傳後也,清淡沖朕,唐人所不好,而 宋、元

錢,紙 與舊 洪、 越文 祖英 所 《序》,九行,行十五字。次晦翁《與南老帖》,次放翁《與明老帖》,并從真迹刻入。 篇 厘 相 以 所有大 干、拾得 潜 幅幅 升降 行 頡 居 兆、天台行肇、沃 適 集 刊 頏 心 簡 獲 質 几 前 覆 》、《參寥 巾 小 (緊薄 詩 寸五 其失傳 聖 無文,而其《吴興晝上人集》、《白蓮集》、《九僧詩》、《鐔津文集》、《雪竇 宋本。而寒山 胤、 字 其字 附」六字。 首 制 數,楷文記之於縫心者,如 光潤 分,八行十 恒、貞、殷、朗、避 古文、命工刊梓、以全其 有 子集》、《石門文字禪 爲 數 寒 州簡長、青城惟鳳、江東宇昭、峨眉懷古、淮南惠崇九人。契嵩、道顯、道潜、惠 尤可 則 Ш 似玉 序詩六行,行十二字,末云: 視 蓋宋氏南渡以 嘆。 之詩,機 猶 墨 四字,魚尾 弁 髦。 色奕 書爲 宋諱、闕末筆。 趣 奕,撲人眉宇,足與秘府《王文成集》、《誠齋集》 故宋、元陋板,其所記字數多不相符者,此古今 姬 横 上方記字數,大名則并二行大書,下分書「豐 路河合元昇暢春堂舊收,刻 降,卷尾記字之體壞亂無存,於是有算一番 溢 》、《北磵 壁。 前度 大幾字、小幾字即 觀音比丘無我慧身敬書。」次閭邱胤 自高,在皎然上、道顯下,是木鐸者 集》、《無文印》諸集,今皆存宋元 左右 「曩 雙邊,半番,界長六寸八分五 閱 東皋寺《寒山 是也。 拓精妙,字大如 至宋季,多易楷 「集》缺 此 本

卷尾有淳 行 使之稍 卷。」蓋 村 邱 三百 百篇,七字七十九,三字二十一,都來六百首,一例書岩石。」今檢是本,寒山詩 《記》。 唐 沾 無範」、「植 胤《序》,其屬道翹所撰次者,已不過三百餘首,云:「唯於竹木石壁書詩,并 墅人家  $\mathbb{H}$ 果 衣 四首,而次之以豐干詩二首及拾得詩四十八首,不符於六百之數。 就 欲濕杏花雨,吹面不寒楊柳風」二句,以爲清麗有餘,絶無蔬笋氣者。朱子 宋時國清南老一刻於淳熙己酉。南老即與朱子友善,晦翁《文集》中引其 而是篇則觀音比丘無我慧身所補刻,又在東皋寺本之後。又有寶祐 其書竹木石壁,故多遺佚歟?抑三僧踪迹極怪,莫得而考證也。其詩, 時有高 大於字畫,便於觀覽。 江 藝文志》七卷,徐靈府所序本則分爲三卷,又別稱《三隱集》,見於志南 熙己酉沙門志南《三隱集記》,又有紹定己丑可明《跋》,捺「慶福院」、 廳壁上所書文句三百餘首,及拾得於土地堂壁上書言偈,并纂集成 東漕司 村書屋」、「霞亭珍藏」、「暢春堂圖書記」五印。 麗覆宋本,蓋據宋東皋寺本所改行上梓,卷尾題云: 本 所 重鎸者,至兹始分七言於五言之外,又以拾 然其所刻,竄改易置最多。 東皋無隱 寒山詩云:「五言五 得 再刻於紹定 「嘉議大夫、 加 然閱 於豐干 閭

元

DП

外,洋 耽 春 據 雕 後 則 子 春 集,乃知 卷 紙 IF. 尾結 刻 刻 質 羅 本。 有「 必 與 鳥 미 宋 本,清《 本 黄 軍 是 以 以 鳴》一首、《 樊汝霖《 依是 版 杭 次序與寶祐 銜 紉 民 幾訂訛奪,而曾不知其改者却誤。 爲元刻 本符,是 其 所 州 · 正 宛 萬 乃 非 獨 錢 几 户 與此 出 似 知 。」洋板豈 唐 塘門裏 矣!近時又有 庫總目》載之,未見。又有 府 於 邱 今之所傳,實原 元 丹 文 達 麗 相 本。而據其裝 胤 邱 藝補》引《 魯 之原 藏。 符, 迥 車 本同,而 花 一锋與 出 橋 而 赤 蓋當時景亮爲 第 於寶祐本 南 彼 、高 即 雲齊 大街 城 别 金 版 麗 如 中 成 於淳熙、寶祐二本,而 陵 有「皇慶 貌 匡靖 此 **\*** 蛾 郭宅 梵夾, 緊縮 刻 乎? 眉 首、《千年石 本 大夫、 蓋 女》一 字字 次序與 之鋟梓 閩 輇 三年二 又 又有正 鋪印 似 建陽 古籍之點校,雖聞 材 都 首在前、《 麗 小 欹仄,若使 行」一條,云:「分七言 愈議 而未 藏。嘗抵 月日」 生 書坊慎獨齋 中 建 上古人 ,謏聞 一元元 本 評 同, 及編入者矣 一行,然遍檢全帙 理、 鵬 和 書次序,全 111 目 、踪》一 鵡 、寛永、正 黄 其 上護軍 學, 越 蕘 宅 無 刻 ,見喜多院 人動筆,亦有 正 圃 西 本 改其 首, 所獲, 或 德」木 朴 即 ! **>** 保、 文 次 不 繋於 景 明則 從 第 相同 首、《 則 延亨 於 亮 不 記 排 高 字 Ŧi. 寒 E 刊 有 鴻改; 妄 麗藏 也。 順 列 數 ·收此 去 Ш 德 吴 次 之 明 丙

宋本,豈非因其紙墨黄紉類高麗繭紙 下千載,舍是無善本焉!」獨怪狩谷掖齋著《掖翁過言》,乃以是書爲高麗覆 經妄手,其訛謬滋甚。予故曰:「鈔本必卷子,必隋、唐。刻本必宋本,必監本。 而誤乎?明治三十八年太歲乙巳夏四月,

島田翰序。

代爲 按: 必 箭鋒相契,正如向子期之注《莊》、張處度之注《列》,但以微言剖析名理,不 Ш 朱 亦久佚,世莫能見。謂之「對」者,當是以詩爲問,而設詞以答之。禪機活潑, 徐靈府序者七卷,今不傳。《唐書 [詩,曹山寂禪師爲之注釋,謂之《對寒山子詩》,行於世。《傳鐙》曹山第一 如詁經之隨文箋釋也。 彝尊校云: 《寒山子詩》,世所行皆一卷,附《豐干、拾得詩》一卷,或分爲三卷。 本寂禪師,不言名智昇,未知其爲一鐙否也?寂公注,南北《藏》不收, 「『唐志》作釋智昇《對寒山子詩》。」今考瞿氏《指月録》載寒 壬子小春,六十四叟緣裻附記。 · 藝文志》著録亦七卷,宋《崇文總目》同。

### 卷三附二校記

依式擡行,即直連書之可也。今特爲之標識鈎乙,以昭一律。」旁有葉昌熾批注:「行住提行。」刻本 提行悉依原刻 鄭氏眉批:「凡刻書與摹帖不同。朱文公《與南老書》,凡帖中原擡寫處,并不當

〔二〕 奪市 初稿本有葉昌熾夾注:「市,疑爲「字」之駁文。」

同初稿本,依帖提行。今改連書。

如 子ト商 《翁注〈困學紀聞〉》(《四部備要》本)卷十八《評詩》「子」下有「張」字。

四 逐 《三國志》(中華書局《二十四史》校點本)卷五十七本傳作「弃」。

五 憂 《太平御覽》(中華書局據上海涵芬樓印宋本複制重印本)作「艱」。

乎 《資治通鑒》(北京古籍出版社校點本)卷一三五《齊紀》作「革」。

七 凡布 《搜神記》(中華書局《中國古典文學基本叢書》校注本)卷十三作「每市物」。 注引《初學

記》、《太平御覽》、《事類賦注》作「用錢去貨」。則「布」或是「市」之駁文

九 穿 《左傳》(中華書局影印《十三經注疏》本)「成公十五年」作「徹」。 初稿本原作「淳」。 葉昌熾改作「涥」,并眉批:「涥,缺筆避廟諱。」刻本依改。 今復正

〔一〇〕 王胄 《四部備要》本作「王眉」。

此題三隱後又云□詩本不相類也 初稿本「三」作「之」,「云」下爲「深」,與《士禮居藏書題跋

注于「相類也」之下。」刻本改「之」爲「三」、「深」字空缺。今填□。 十年滂喜齋刻本)同。葉昌熾眉批:「「之隱」疑「三隱」之誤。「深」字亦有誤。小字分

按: 六祖慧能大鑒禪師,事見《五鐙會元》(《中國佛教典籍選刊》中華書局校點

本)卷一。慧能又作「惠能」。

六祖智能

寒山寺志卷三終 卷三 解題考證

補

編

《寒山寺志》初稿輯存

程德全序

小大無不誦張繼詩者。 深辨也。寺在吴中,不過數百佛宇之一,而名遠聞,尤有聲於异國,渡海以東,無 之唐蓋不然,然其傳則久。余之拓此寺也,壹沿舊説而恢之,蘄存古迹而已,不 寒山寺,寺即今址也。寒山之名,不知所緣起。後人奉寒山子象,符寺之稱。 不可窮詰矣!宋人之爲詩者,則有楓橋寺焉!自元而明而國朝,過楓橋者必曰 唐張繼楓橋夜泊,爲詩寫其幽思,夜鐘之聲,自寺而出。 余重修寒山寺成,長洲葉君昌熾著《寒山寺志》,繆請余爲是正。寒山寺者, 昔人争謝公墩,好古之心使然,今猶昔也。 其寺之確爲何地,遼哉 余於寺工粗

定,凡東西邦之以職來者,大集於寺之樓,極歡而散。

宇宙之通義,凡古之迹當

而已。 苦吾力之不給,惙惙焉隕越是懼,更無從替訂其百一 保存,惟保而能存,故於寒山寺獨張其事,非徒振游觀於既替,修承平觴咏之雅 略 引其專。 葉君之爲此《志》,用力甚勤,高密鄭君文焯又厘定而商益之。 蓋 以爲討寺之故,欲審乎寒山寺源流者,觀斯《志》維宜。 ,惟舉余之所以營兹寺者, 余撫是邦, 雲陽程德

志塔[]]

全叙。

草之中。瞻人天而頂禮,結此界相,梵言「界相」,華言地址。未可以數典而忘祖也。 樂圃《圖經》、石湖《郡志》皆云寒山舊爲妙利普明塔院。兹寺開山,檀度因緣, 招 提名義,皆以塔著。 今雖相輪已頹,遺迹莫考,而後賢吊古,猶得於荒烟衰

宋太平興國初,節度使孫承祐建浮圖七成。《姑蘇志》卷二十九。

《志塔》第三。

按 塔之建不自承祐始,乾隆《府志》據孫覿作「重建」,爲得其實。

楓 橋 寺知 名於 天下,而塔之役最大,更三年而後就。 孫覿《記》。 元季寺塔俱毁。

補

《百城烟水》卷一。

按 其時已入元,塔固巍然無恙。 岸依然窣堵波」,皆咏塔也。 張 師 中詩「塔影落前浦」,范文穆詩「墻上浮圖道旁堠」,張孝祥詩「古 即後來湯仲友詩「孤塔臨官道、三門背運河 至明初,高啓《寒山寺送别》詩: 「船裏鐘 催

劫火〔四〕,後一首則入明後應詔修史自都歸吴之作〔五〕,今昔已殊,故其 詩不合。 云: 行客起,塔中燈照遠僧歸。」是塔猶未毀。 「遙看城郭尚疑非,不見青山舊塔微。」自注: 蓋浮 .圖毀於元末(三),季迪適值板蕩之交,前一 然又有《歸吳至楓橋》詩〔三〕,則 「舊有塔,今廢。」 首時尚承平未 與 前 下 經

又有「官秩加身應謬得」及「錦衣今已作荷衣」之句〔六〕。

釋 逸慈《寒山寺》詩《斷塔遺基》一首詩共三首,尚有《龍函新録》、《古木啼鳥》二首録後。 年突兀矗寒空,《郡志》猶傳節度功。今日遺基何處覓?斷垣衰草夕陽中。《百

#### 校記

城烟水》卷二。

一〕 志塔 鄭氏勾去題後小序。

然又有 鄭氏勾去,改作「及」。

鄭氏勾去,改作「是」。

回 與前詩不合蓋

適值板蕩至尚承平

鄭氏改作「後詩」。

五

後一首

今昔已殊至之句

證也。」

鄭氏改作「前詩尚」。

鄭氏改作「故注塔廢矣!下云「官秩加身應謬得」、「錦衣今已作荷衣」可

補 編

記輯存録自《吴郡文編》(稿本)卷九十八

姚 廣孝《寒山寺重興記》[一] 寺

明

師 宋 半 隱 甚 施 風 夜 運 幽邃 入岩 掣顛 靡 老 與元(一〇),寺凡幾 鐘 佛殿〔四〕、次立丈室、山門及説法之堂、樓禪之所、疱庫温溷、凡合有者畢 以 河 草屬,或代其挽,修持多行甚勤〔九〕。 聲 成 間。唐元 塘〔五〕,其塘北 出 到客船」之句,天下傳誦,于是黄童白叟皆知有 ,來游者無虚日。 ,笑歌自若,來此 閶 有 石 而 門 戒行,札授住持(二三),赤手奮發(二三),化募衆檀 去。 西 和 行 中,有寒山 希遷禪師于此創建伽藍,遂額曰「寒山 不十里(三),即楓橋(三)。 抵京 興廢,碑刻 口,南通武林,爲衝要之所。 縛茆以居。 唐詩 子者,不測人也。冠樺皮冠,著木履〔七〕,被藍 人張懿孫賦《楓橋夜泊》,有「姑蘇城外 澌泯無考[一]。 暑暍 '則設茗飲〔八〕,濟行旅之渴。 橋之南去尋丈地[四],寒山寺在 尋游天台寒岩,與拾得、豐干爲友,終 粤自 舟行履馳〔六〕,蟬聯蟻接 [聖朝 寒山 寺」。 ,刜荆榛、畚瓦礫、先 一寺也。自唐歷 永樂三年,深谷昶 寺當 Ш 挽舟之人, 寒山寺,夜 水之間,不 縷衣 Ŧi. 馬 一代及

靈山 [一六],梵王帝釋秉鑪而前,十八應真列于兩旁。香雲晻曖[一七],金碧焜熀,一會 十月,長洲姚廣孝撰〔二三〕。校補者案:此文記明永樂問寺院興復事,故輯録 之偉績,奚可泯没無聞?其同參友雲海請余記〔三〕,勒石以告夫來者。永樂十一年 規模可覩〔一九〕,都人士之游覽〔三〇〕,豈無知懿孫之題咏者耶?雖然,深谷興復 ,儼然未散。方丈則設寒〔一八〕、拾、豐干之像,不敢忘其所自也。道場一新, 殿内塑釋迦世尊于中门五了迦葉、阿難侍側,文殊、普賢二大士坐左右

# 文震孟《寒山寺重建大雄殿記》

資,而後益以檀施。翼翼莊嚴,有加於舊,尤爲諸刹所希有云。或謂: 兹寺居四 之不替矣!萬曆壬子,建杰閣以奉《大藏》,戊午殿罹火,復鼎新之,皆出自鉢 清幽蕭遠,别爲一境。以是從來名公韵士往往樂之,爲之題咏,爲之記志,而寺 鱗集,非若深谷窮岩,窈冥闃寂,游者易於涉足。顧雖處閭閻囂雜中,一入其門, 愈益有聲。後有曉山旭公,能以雅事作佛事,修竹名花,圖書香茗,媚秀靜好,使 (徘徊不能去。其嗣松陵鑒公、西流吾公等,乃益精進勤修梵行者,可必其宗風 寒山寺之名冠姑蘇也,實繫於「江楓漁火」之句,然亦以其地當孔道,舟車

而談實相。」資生産業,總非違背,貴有所以用之耳!檀度一門,原以破人慳囊, (三三),間一染指於自然生息。凡有建造,易於措置。 達之衢, 朝商夕賈,呼籌握算,耳目熏染,以是圓頂方袍,不能不以計 顧經不云乎: 「不壞世相, 然餘

佛 諸所有,回向菩提,悟成壞之無嘗,識聚散之皆幻,繇有爲法,證無住相,則 尋因覓果,各乘願力,以覺群迷。吾公不吝資財,廣作勝事,因地真矣。 7,彈指 關超出,直躋聖境,乃至聖凡都泯,空有俱無。斯巍巍殿閣,眼前 圓 通,又寧惟人天小果已哉?寺有寒山、拾得二像,相顧軒渠,勞勞塵 佛邦,即 若能 又且 心 即

土,偶 寒山慨世警世,百千嘆咏,要不若一笑之直捷矣!殿成於己未年。 險,略已備嘗,知世間事無非 吾,請予爲記者僧性寧,所謂勤修梵行者也。 一瞻禮,亦不覺輾然自笑。不知張繼題詩時已有此否?閱世既深,順逆 一笑者。 凡人我、是非、愛惡、好醜,皆笑具 崇禎庚午仲冬之吉。 住持僧即 也。 即

#### 校記

《寒山寺重興記 宣統《吴縣志》卷三十六上《寺觀 》節録本同。 《吴都法乘》(一 九三六年,上

州府楓橋」五字。

〔二〕 西行 《法乘》作「而行」。《吴縣志》無此兩字。

〔三〕即《法乘》作「而」、《吴縣志》同。

〔四〕 南 《法乘》作「西南」、《吴縣志》同。

〔五〕 臨 《法乘》上有「寺」字、《吴縣志》同。

〔七〕 履 《法乘》作「屐」。

云

履

法乘》作「旅」、《吴縣志》同。

〔八〕 飲 《法乘》作「椀」。

〔九〕 持 《法乘》作「杜」。

〔一〇〕 與 原作「興」,據《法乘》改。《吴縣志》無此字。

碑刻澌泯無考 《法乘》作「碑刻澌沉、 無可考見」、《吴縣志》同。

〔一二〕 札授 《法乘》上有「僧録司」三字。

〔一三〕 赤手奮發 《法乘》上有「深谷莅其任」五字。

[一四] 佛殿 《法乘》上有「大」字、《吴縣志》同。

〔一五〕 于中 《法乘》作「中坐蓮花臺」。

補編

二六 《吴縣志》同。《法乘》作「坐于」。

雲 《法乘》作「臺」。

則 《法乘》作「中間」、《吴縣志》同。

二二二九七 覩 《法乘》作「觀」。

都人士 其同參友雲海 《法乘》作「搢紳大夫士」。 《法乘》作「於是深谷所交之友」。

《法乘》作「鮮」。

長洲

《法乘》作「吴郡」。

# 志鐘續補

寒山 前 八歲。 南 寺鐘,相傳唐代物,細視之,乃嘉慶七年重鑄者,廢然而返。」《古學彙刊 屏住山僧六舟達受《寶素室金 正月既望,以常住事交却畢,住吴門,訪吴中石佛像於開 |石書畫編年録》:「嘉慶二十三年戊寅,二 元寺。」「訪

今寺内鐘樓所懸之鐵鐘,外徑約一百二十餘厘米,上鑄「古寒山寺」、「大清光緒 歲次 丙午三十二年仲冬月穀旦」等銘文。

大雄 Ш Ш 寺歷劫 有詩,次韵以代銘 田 寶殿所置之銅鐘,外徑約六十二厘米,上鑄《姑蘇寒山寺鐘銘》: 姑蘇寒山 寒 Ш 年久,唐時鐘聲空於張繼詩中傳耳!嘗聞寺鐘轉入我邦,今失所在 搜索甚力,而遂不能得焉!乃將新鑄一鐘資往懸之,來請余銘,寒

姑蘇 非异域,有路傳鐘聲。 勿說盛衰迹,法燈滅又 明。

明治 三十八年四月,大日本侯爵伊藤博文撰,子爵杉重華書,大工小林誠義,

補

四七

四八

施主十方檀那。

鐘房内置三鐘。左一鐘,外徑約八十二厘米,上鑄「欽差提督大岳太和山等處司 禮監太監王宗」等銘文。中間一鐘,外徑約九十六厘米,上有「天寧禪寺」、「大 清乾隆伍拾肆年玖月敬鑄」等銘文。右一鐘,外徑約一百六十厘米,上鑄「寒

山寺」、「西曆一九八六年夏曆丙寅仲夏」、「鑄鐘施主南陽葉晨暉」等銘 文。

羅漢堂内置九鐘,分别鑄有「鴻筏禪院」、「萬壽菴」、「如意禪院」、「貞凈禪院」等

# 志碑續補

宋岳飛題書「文章華國,詩禮傳家」、「三聲馬蹀閼氏血 横二竪。 行書。 有「岳 飛印信」篆印二方。 石嵌 碑廊 壁間 刊 刻年代不詳 ,五伐旗梟克汗頭」。三石,

張 樗寮書《金剛般若波羅密經》。末有識語: 寒拾殿壁 有董其昌、畢懋康、林則徐、俞樾等人題跋。十一名,字體草篆不一。經跋共三十八石,嵌 丙午,即之年六十一歲謹題。」二十七石,每石二十行、行十字不等,行書。刊刻年代不詳。後 太師資政殿大學士張六三相公遠忌,謹書此《經》,用伸追 「孝男張即之伏遇六月初 一薦。淳祐六年,歲在 日日 顯 考

明姚廣孝撰《寒山寺重興記》。碑佚,文見《寺記輯存》。

間。

文震孟撰《寒山寺重建大雄殿記》。 「修竹名花」、「靜好」、「以奉大」、「行者也」等十餘字。文見《寺記輯存》。 楷書, 碑植 山門内庭園南側。 碑文漫漶,依稀可辨

清石韞玉題「現千手眼」觀音佛像圖。篆書,右上有「庚戌狀元」篆文印章一方。邊款:「大 清嘉慶戊寅六月十九日,姑蘇寶蓮寺松濤摹勒,炳齋姚明煜敬鎸,馮箕敬

編

補

四九

一五〇

**無**。」石在寒拾殿。

鄧石 守之鈎摹刊刻,以公同好。 聞 如書聯「處世勞塵事,傳家寶舊書」。隸書。 、李申耆諸老表章後,海内翕然宗之。友人見詒此聯,尤爲奇古,因求先生嗣君 同治元年三月曾國藩識。」行草,下有「國藩之印」一方。 上聯有識語:「完白先生法書,張皋 下聯

陳 變龍詩石刻。 落款「頑伯 鄧石如」。 一石,二十一行,每行十一字不等。 行草。 印二方。 下有「汪定執敬觀」五字。 詩四首,見《志事》篇。 石嵌碑廊壁間。 詩後 有跋:

北洋 方伯 寒山寺爲吴中名勝,惜久傾圮。 官解。」下有「臣夔龍印」、「小石」象印二方,石嵌迴廊 復修葺 殿宇,遠索拙詩,賦此寄奉。辛亥十一月, 余丙午撫吴,鑄鐘建屋,以存古迹。 壁間。 贵陽陳夔龍筱石氏作於 今申甫

歷 代咏題 動 橋 賦 游 夜泊》 響盡霜天空。 寒 得 寒山 Ш 刻 二首。 寺 石。次第爲: 寺 》、程 送别 唐釋皎然《聞鐘》詩云:「古寺寒山 師 永夜一禪子,冷然心境中。」餘見《志詩》篇。詩後有跋: 》、《極 孟 《寒山寺》、《游 韋應物《宿寒山寺》、張 橋》、王 士正《夜 楓 橋偶 雨題寒山寺寄 成》、孫覿《與溫老》、又三絶、高 祜《楓橋》、皎然《聞鐘》、張 上,遠鐘揚 西 [樵禮 好風。 吉》、沈德潜《楓 聲餘 月樹 師

既 不具録云。 有 録,得韋蘇 夜泊》一 知,當不笑余多事也。 寫 寒山、拾得詩,刻石壁間,繼念古今過客咏題斯寺者衆矣,何竟讓《楓橋 絶獨有千古?豈詩之傳不傳,亦有幸有弗幸耶?致 州 程德全書并識。」下有「程德全印」、「雲樓」篆印二方。長洲周梅谷刻。共八石,每 以次十數首,訖歸愚尚書而止。 張懿孫詩,曲園太史已昉王郇公故事,大書植石,故 意爲妙利古刹,重拭爪痕,寒山 事稍暇,隨筆選

程 德全題書「妙利宗風」。 臺 垣上 一石,横列,行 11: 末有 「程德全印」、「雲樓」篆印二方。 在 Ш 門 内 左 侧

石十八行,行六字。

嵌大雄寶殿

壁間

東 湖 不詳 陶濬 官 書「寒山寺」。 三石,每石一字,横列。字作魏碑,長洲周梅谷刻。 嵌照墻間。 刊 刻

公元一九二〇年,康有爲詩碑,詩云:「鐘聲已渡海雲東,冷盡寒山古寺風。 使豐 血 文舉同游吴下楓橋寒山寺,則唐人鐘已爲日人取去,故吾於龍壽山房善繼 書《華嚴經》,亟保存之。 干又饒舌,他人再到不空空。」跋語云:「庚申二月廿五日,偕韓樹園徵 臨風感慨題詩,康有爲。」草書。 右上角有篆印一 勿

補

維 新 百日 ,出亡十四年,三周大地,游遍四洲,經三十一 國,行 四十萬

五二

里。」住持近舟立石,吴郡張仲森刻。石立碑廊。

公元一 頻。 朝? 九二一年,萬 問 Ш 他橋 一僧不 畔停船客,省得鐘聲能幾 解興亡 繩栻 恨,祇閉禪關拾墮 詩碑,詩二首云: 人?」跋語云: 一樵。」「掉首 「古刹豐碑劫運銷,摩挲誰 寒岩迹已陳,樺冠 「寒山寺久殘破,巡 木 與認前 屐 ~無程 去 來

德全以宣統辛亥春重修落成,八月而國事遂變。辛酉來此,爲先人營兆寺左, 聞 鐘憬然,愴懷家國,情何容已!南昌萬繩栻。」楷書。 住持近舟立石,吴郡楊中孚刊。

石嵌碑廊壁間。

公元一九四七年,滄州張繼書唐人《楓橋夜泊》詩碑。 欣先 勝迹,頻 前 相同,屬 年十二月,滄 生文緣也。 生轉求 害此詩鎸石。惟余名實取恒久之義,非妄襲詩人也。 年往來吴門,迄未一 ·書《楓橋夜泊》詩,不意書成翌日,溥公即作古人,遂成絶筆,是亦 爰付刻石,樹寒山寺中,留此佳話,并將濮君函刻於下,真迹贈 州 、張繼。」皆草書。 「余以張溥泉先生名與唐張繼同,乃請濮伯 游。 湖帆先生以余名與唐代題《楓橋夜泊》詩者 識語云:「余夙慕寒山寺 中華民 或

别後俗 拜啓。 實其絕筆,史館同人欲予保留,繼又因執事對於此紙自具勝緣,自應將真迹 史館保存云。丁亥冬吴湖帆識。」行書。「湖帆先生左右:申江奉教、諸承款接。 賜 因 張 、俯允,感戴不盡矣!天寒手凍,草草不恭。敬頌台綏,并候儷福。弟濮一乘 溥老近日勞瘁過甚,致遲至三日前始行書就,越一夕即作古人矣。 惟懇尊處於上石之後,仍將原紙寄還史館,俾其保存,作爲紀念品。希 十二,十七。」黄懷覺刻。 冗,兼以屬件未報命,致疏箋候,歉仄無既。《楓橋夜泊》詩屬事敦促, 今藏寺内。 此紙

寒 山寺,江蘇省文物保護單位公告刻石。江蘇省人民政府一九八二年公布。蘇 州 市 人民政府一九八五年立。石立山門北側。

附《吴縣鄉都義役田記碑》。篆額,二十七行,行四十四字不等,楷書。 虞葛 桷記。 嘉靖辛亥冬十一月。 賜進士知常熟縣上

社倉事宜碑 Ш 右二石,分别爲 寺時出土 記》。 ,皆非寺中石刻。 明嘉 篆額,二十五行,行二十五字不等。隆慶戊辰歲季冬吉日一。 ,靖三十年、隆慶二年碑記,係公元一九一一年春重修寒 見《緣督廬日記鈔》卷十四辛亥六月十四日。 石嵌碑廊 壁間

*⊞*.

附

録

寒山 寺楹聯輯存

陸潤庠:

傍 Ш 新結構、依舊楓 江野渡,客船夜半 聽 鐘 聲。

近郭古招提,毗連滸墅名區,漁火秋深涵

月影;

程德全: 遁迹笑豐干,從知舌粲蓮花,地近虎丘 曾講 法

宗風傳刺史,幸得詩鈔貝葉,劫餘龍壽共藏 經

陸

|鍾琦:

踏春西去,傍十里横塘,水木湛清華,曾移茂苑扁舟,

訪吴銅造像,

塔殘磚,古迹重搜,余亦北平人,濡筆擬賡翁氏 記

妙疏、墨花争拓、客歸東海澨、行縢宛載米家船。 生佛南來,振千古名刹,池臺新結構,補此天台真相,與待招遺 上三聯録 自《姑胥 薪,解元 勝迹》。

葉昌熾: 木屐樺冠,世外寒岩,頌古相傳 如雪寶

鐘聲塔影,山塘精舍,到今依舊屬雲陽。 録自《緣督廬日記鈔》卷十四。

鄒 福保: 塵劫歷一千餘年,重復舊觀,幸有名賢來作主,

詩人題二十八字,長留勝迹,可知佳句不須多。

楓橋歷代宅第園林

孫武子宅,在楓橋西南孫武子橋側。 同治《府志》卷四十六。

三瑞堂,在閻門之西楓橋,孝子姚淳所居,有園亭頗足雅致。家世業儒,以孝稱。 事,其意極可嘉。 賦《三瑞堂》詩。姚氏致香爲獻,公不受,以書抵虎丘通長老云: 其先墓嘗有甘露、靈芝、麥雙穗之异,故以名堂。 然不須以物見遺,惠香八十罐,却托還之。 蘇文忠公往來必訪之,嘗爲 已領其厚意,實 「姚君篤善好

爲 他相識所惠,皆不留故也。」據《吴郡志》卷十四、宣統《吴縣志》卷三十九上合纂。

唐夫先生宅,先生生洪武間,家江村橋。 灣 流 水繞柴門。 種來松樹高於屋,借與春禽養子孫。」《夷白齋詩話》。 其《江村》詩云: 「家住夕陽江 見同治《府 上村,

紫芝園,在閶門外上津橋,徐太學墨川園也。 文待韶、仇十洲爲之圖畫,後歸項

附録

詹事煜,甲申爲火毁。

同上。

志》卷四十六。

義

士顔佩韋宅 在 江村橋。《吴門表隱》引《五人墓志》。 見宣統《吴縣 志》卷三十九

五六

松鶴堂 ,在楓橋寒山寺前,殷斐仲所居。 葉燮有《記》。 同上卷三十 九

漁隱 袁枚、王昶皆有《記》。中有貞節堂、竹柏樓、紅惠山房、楓江草堂、吟暉亭、五 頗多、最愛文氏翰墨、故以「小停雲」名其館。後歸袁氏廷檮、改葺漁隱小圃。 小圃,在江村橋。先爲處士王庭魁小停雲館。庭魁字 岡齡,能畫,藏弆名迹

竹柏樓,在楓橋西沿塘,乾隆中袁廷檮母韓氏守節處。 遺音集》。 同上。 當時題咏甚富,有《霜哺

硯樓等十六景。

同上卷三十九

下。

枝園,在閶門 楓 橋,段玉裁寄居於此,中有經韵樓。 同治《府 志》卷四 + Ŧi.

顧文學廣圻宅,在楓橋。 統《吴縣志》卷三十九下。 中有思適齋, 歙縣程瑤田書額。 其孫河之亦居於此。 宣

萱園 在 閶門外下津橋東,周謹所居。 同治《府志》卷四十六。

廣居 在 閶 門外寒山寺東,孝 子戈宙 襄所居,自 爲《記》。 諸生戈載、子宙襄世居

楓橋,父子并有文行。宣統《吳縣志》卷三十九下。

冷香别館,在楓江,惠磐卿所居。 磐卿高祖士奇家於葑門冷香溪,後遷滸

磐卿 卜宅楓江、與戈載爲鄰、名其室、以志先澤。《翠薇花館集》。同治《府志》卷四

十六

周 香岩錫瓚宅,在閶門外馬鋪橋,藏書處名水月亭。黃丕烈《士禮居題跋記》。 同上卷三

十九上。

馬鋪橋、白蓮橋,均在楓橋附近,硯六室在馬鋪橋,周錫瓚仲璉及子漱六藏書 處。 見劉禧延《硯六齋筆記跋》。王謇《宋平江城坊考》增訂本卷五「楓橋」下。

宣統《吴縣志稿》:「汪大紳縉居楓江。」今案:章光黻《聞見闡幽録》云:「余於 丙午遷居馬鋪橋,因思先輩汪大紳曾居是里,而其室不能訪焉。」據此,則《志

稿》尚可增「馬鋪橋」三字。同上。

《藏書紀事詩》注: 吴昌碩舊居,在寒山寺附近西畝巷,名曰四間樓。 静怡小築在白蓮里,余蕭客門人朱邦衡藏書處。 吴長鄴《吴昌碩先生年譜》簡表,載《西 同 上。

附一年録

泠藝叢》第九期。

敵樓鐵鈴關

楓 橋 面 敵 甃 磚 樓 在 中爲 楓  $\equiv$ 橋 一層,上 堍下,方廣周十三丈有奇,高三丈六尺有奇, 一覆 以瓦 ?,旁置多孔,發矢石銃 炮。 嘉靖三十六年,巡按 下壘石 爲 基,四

御

史

尚

維持、知府溫景葵、知縣安謙建。明崇禎《吴縣志》卷

明 鄭 草草 設 修 細 太 州 江 北菽 湖 財貨 重兵 舉。 ,至難盤詰。 若 以 凡四方 曾《楓橋險要說》自閶門至楓橋將十里,南北二岸,居民櫛比,而 莫盛於閶門。 應之乎?團長之力,曾何足以禦之也!乾隆《吳縣 粟棉花大貿易咸聚焉!南北往來之客,停橈解維,俱在於此。 寇之所熱中者 以 雖然險 鎮 ,難得之貨,靡所不有過者, 之,不當與婁、齊諸附郭例視。 要有重有輕,楓 往時嘗建敵樓、設團營於接官亭。寒山寺遺址見存,不可 倭寇 ,城内十一,而此地十九。 垂涎,往事可 橋雖 不當江潮水口 爛然奪目。 鑒。 何也?天下財貨莫盛 楓橋北近射 其來也,必非 之衝,而 楓橋 北馬 志》卷四 瀆、長蕩,南通 所 商舶 關係 7 輕舉 淵藪,上江、 於蘇 至重,似 ,我兵豈可 盗賊奸 南岸尤 海 脑 塘、 州,蘇 以 不

敵

樓有三、高三丈六尺、方廣周十三丈。一在木瀆市東,一在葑門外,一在楓橋,

行 鐵鈴關。明萬曆三十年[1],巡按尚維持、吳縣安謙建。國朝道光十年,巡撫

陶澍改鐵鈴關爲文星閣,以昌文運。《吳門表隱》卷三。

米業晨集茶肆,通交易,名茶會。婁、齊各行在迎春坊,葑門行在望汛橋,閶門行

在白姆橋及鐵鈴關。同上附集。

·鐵鈴關」題額石刻,「合郡士商公捐重建」,「大清道光九年仲秋穀旦」。

### 校記

升霸州副史。則敵樓始建年代,當以崇禎《志》作「嘉靖三十六年」爲是,《表隱》誤。 守,三十八年任,居四年以憂去。卷七《職官表六》,郡守溫景葵,嘉靖三十五年以御使任,三十八年 明萬曆三十年 考宣統《吴縣志》卷二《職官表一》,吴縣知縣安謙、嘉靖三十五年任。後任曹自

# 修志紀事輯自《緣督廬日記鈔》上海蟬隱廬印行本卷十四

# 辛亥(公元一九一一年)二月

十九日 道諸巨公捐俸鼎新,今方知工,三月可以落成,請布施聯額。 山子集》一册,寒、拾兩僧象拓本,羅兩峰所繪,有題詞,謂即世所傳和合象,亦聞所未聞也。寒山寺經當 得陸申甫方伯一函,附至其子靜山兩卷,一爲《把酒問天圖》,一爲《移情海上圖》,徵題詞。又《寒

# 三月

初十日 舍,到今依舊屬雲陽。」附識語云:「顧雲美塔影園,在虎邱雲岩寺之陽。 「雲陽草堂」。今雲陽中丞,下車清節,同符巨公,重興刹竿,振寒、拾之宗風,存吴闐之名迹,甚盛舉也。 燈下撰寒山寺楹帖,枕上改定之: 「木屐樺冠,世外寒岩,頌古相傳如雪寶,鐘聲塔影,山 用《後漢書·宣秉傳》,署曰 塘精

# 四月

爰拈此爲頌云。」

初九日 初八日 得申甫方伯函,送至寒山子詩石刻三十首 中丞募修寒山寺、屬搜輯唐宋以後藝文。文字之役、無不可承教、允之。

十五日 仲蕃甥來,以《臨川集》付之,録擬寒山子詩二十首。

十八日 仲蕃 來繳《臨 川集》,又携去《吴郡 志》一册、乾隆《蘇 州府 志》一 册,绿 寒 Ш 寺

# H 詣芸巢齋,借歸《唐六如集》一部,中有《寒山寺募鐘 疏》,擬傳 録

廿三日 以《唐六如集》、《王百穀集》各二册,《南畇文録》、《百城烟水》、《鷗陂漁話》各一册,共書七本,付 通。

廿五日 仲 蕃 甥傅 以《陳季方詩集》、《梅葉閣文集》各一册,吾宗《己畦集》、褚仙根《行素堂集》各二册,托仲蕃傳録 録寒山詩文。

寒山 事實

廿九日 仲 蕃甥來,又付以徐俟齊《居易堂集》二册、陳文莊《無夢園集》、《瞿冏卿集》各 册,録 寒山詩

# 五月

初四 日 仲蕃甥來,又以《歸愚詩鈔》、《小浮山人詩》各一册付之。

十四四 屬 不 日 可析也。 仲 蕃來繳書兩本,前録《百城烟水》、乾隆《府志》,但有寒山 《鷗陂漁話》「王郇公封國年月」一則,亦未録。 此三册仍付之。 寺詩文,楓橋皆見遺,不知橋與 又付《吴郡 志》、《中 寺相 紀

聞

》、《漁洋精華録》、《儀顧堂題跋》、《五鐙會元》、《指月録》各一本。

十六日 故,擬: 至,筱雅太守爲中丞索寒山題 仿靈岩、聖思之例,輯爲《寒山寺志》。一伽藍地,雖非如府、縣志,必集群策群力經歲 昨宵卧後,聞鈴聲,似一騎馳來,既而叩扉,斷續甚厲,心頗訝之。 咏,亟 一付刻。 文字之役 ,半夜敲門,過於風 今晨起亟詢奴子,則郡 雨 催 租 矣 月 以 月而後成,一 來,網 廨 繙 送 典 書

屬稿亦何能 爲 「急就章」! 即 寄一函,以此意直告之。

十七日 得 筱雅 一同年函,言寒山寺陷壁貞珉尚有八石未刻,中丞亟須餽貧糧。 即檢出詩文五通: 詩王臨

附

川二十首、陳季方十四 首、彭南畇一首,文瞿汝稷、徐昭法各一首,共十紙,作一 函寄去。

十八日 瀛島田翰本摹刻於簡首,昨以告,今日即索觀甚殷。 適咏甥午後來,即命迻録一副本。又從《困 得何筱雅郡尊函:「中丞見寒山詩文,喜爲得,未曾有此。」何足喜耶? 朱晦翁、陸 放 翁 兩 札,東

聞 》得 何屺瞻識 語,附録於後

廿四 約泛小舟,偕橘農同年登寺閣落成。 日 申甫方伯函來,送至《寒、拾問答》一首,又言薛叔畇筆記中載寒山寺僧中蕈毒事,皆饋 即復一函、允之、而請稍展其期。 輯《寒山寺志》發凡起例。 貧糧也。

前兩日

成《志橋》、《志寺》兩篇,今日《志塔》一篇又脱稿。

廿 五日 輯《寒山寺志》,成《志象》一篇。

廿六日 重修,詩文可附記,簡末更及楹帖,則非《志》例矣。 得申甫同年函,附至《庸盦筆記》一 則,述寒 Ш 《寺志》續成第五篇《志鐘》。 僧中蕈毒。 有關 興 廢之迹,不可 以 不記。 又言此次

廿七日 輯《志碑》一篇,未脱稿

廿九日 廿八 日 輯《寺志・志游》一篇,未竟。 續成《志碑》篇,次《寺志》第六。 又成《志僧》一 篇,以次爲第七。

初一 日 續《志游》篇竟,又草《志事》篇,次第八、第九。

初二 日 寒山寺石刻,中丞之意但録詩,前稿尚不足。 輯《寺志》,成《志詩》一篇,第十爲 殿。

筱雅太守以

函來請益。

即自郵復

緘,取《吴郡

日

月,不半月而卒業。以考獻徵文之事,等於風檐角藝,又似星使馳驛,廚傳騷然,倉皇供帳,塞責而已,安 後,爲十一、十二兩篇終焉!此兩篇無小序,以 志 》所 録詩十章應命。《寺志》十篇已脱稿,昨今兩日又以《寒、拾事迹》、《寒山子集題詞》排 其爲附庸 ,示有 别也。 溯自首夏創 稿 發篋 陳 比成 書 帙,附 於

能有佳構乎?

初十日 中,寒山 又 治百《清嘉録》、錢梅溪《履園叢話》。今晨即以一柬送來,并爲趙學南轉貽新刻《明懿安皇后外傳》一 司 志 詩 以所撰《寒山寺記》拓本見示。 寺觀 均绿出 昨聞鄭小圃言,同治《蘇州府志》「寒山寺」有姚少師《記》。前事茫不記憶,即從芸巢借閱,並借顧 縛茅於此」,其言何可據?不知當日從何得之?今篋中所藏姚少師集鈔本,并無此文也。 門,即爲鄙 顧、錢兩書無可采,即作一函,并還之。 人所纂,四 新上石。 十餘年惘惘如夢,此次不能不糾正,狐埋之而狐搰之矣!尚有韋左 檢郡志、果有姚《記》。寒、拾皆在隋唐間 ,而此《記》乃云二元 同治 和

十四四 窗 葦之航,與峨峨巨艦對泊。 院圃清 修委員伍從之亦出迓。 彦。賓主八人即 牖 H H 洞 曠,結構頗 達,憑高四 陸方伯招明日游寒山寺,在胥江會集。午後作一緘,告以 晨起,以八百文喚扁舟出閶門。 在 一跳,遠 不俗。 水窗 布席 山門之内新建御碑亭工未竣,内爲大殿。 山近水,平疇略行,二三十里皆在目。左爲鐘樓,右亦有小樓一角。 伍委員導觀土中新刨出各碑: 主人立鷁首相見,并見孫展雲觀察毓驥、橘農、鼎孚兩同年、芸巢、智涵、叔 ,艇厨精美,照例先以 十鐘至楓橋,泊日甫亭。 肴點果腹。 一《吴縣鄉都田役》,明嘉靖中知吴縣事葛浶立 同登岸,主僧偕一小沙彌 扁舟徑出 午聞氣 殿後精舍三楹,上有樓,據一寺之中。 筒 嗚 楓橋, 艤棹以待。 嗚聲,知 方伯 迓於寺門外。 聯 迴 從 涖,止 廊繚曲

樓圍坐,凉風徐來,長談至兩鐘之久始下船。即開尊再酌,嘉肴苾芬,既多且旨。大小三舟,皆由輪船拖 [一],又有隆 :,取道彩雲港,繞出横塘,至胥江馬頭,適罷酌,主賓皆倦,興辭各散,仍孤棹歸抵花橋,天色暮矣! 石記乾隆三十九年住持宣能重修大殿,皆郡志所未詳,其餘皆檀越姓名,無裨考證。 慶《社 倉 》一碑、皆非寺中石刻。 惟一告示碑,咸豐間修繕禁約所立。又有長條十餘石 適陽光漸 登 内

# 閏月

初五 鄭學,植園坐次,察言觀色而知之。 H 筱雅同年 ·夜來一函,并示程中丞書,拙稿送鄭小坡參訂。文章天下之公器,不妨商榷。此老服膺

二十日 志事》一門。 申甫、中丞晨來一函,寒山寺求樊山方伯楹帖未來,得其覆函見示,以文采可愛,欲登入《寺志 本如郡、縣志雜記之例,瑣聞叢載,皆所不遺。 拙稿寂寞,願得名作爲助,即 允之。

廿九日

斯 角。 鄭叔 未夢見。此真妄人,奚足與校!後一函又索前稿去,想塗抹尚以爲未足?姑付之,亦加 人,日本人士聯襼來兹者踵接,各國來賓姓名應否并列?請中丞自 俄領事格羅思以寒山寺公燕在座,求附名簡末。外人亦好名邪?但此會非俄一國領事,亦非 問 .所簽,則如囈如吠,閱之迷瞀,罔知所從"悍然奮筆删改,大言不怍,直是毀瓦畫墁,著書義例全 何筱雅太守來兩緘。先一函,附還拙稿。又示中丞函,是正五條,雖人人所能見到,尚得要領。 一簽,未大露 格羅

言》,攻鄭學。

又以一函來謝過。

初二日 筱雅 同年 先來一函,言中 丞欲 留 拙 稿 付寫官 1,并索 還前 示一函,即付之。 另箋作《〈聖證論〉訟

歇後詩不可讀,於諸公何有?

# 壬子(公元一九一二年)四月

初六日 三絶、《姑蘇志》已采入「寒山寺」。 閱《宋詩鈔》,薛士龍《浪語 集》有楓橋詩一 首、孫仲益《鴻慶居士集》五首、請葵伯録副。孫詩中有

### 七月

稿幸在,病中擬稍加 廷畀以畺寄,儼然重臣也。聖人云:「不逆詐,不億不信。」人非蓍龜,孰能前知?陽貨、桓魋焉浼我?舊 矣!楊子雲之劇秦美新、陸劍南之《南園記》,皆在凶燄方張之日。去秋僕屬稿時,其人假 書,皆於是乎在。 去年輯《寒山寺志》,爲夫己氏作也,不幸脱稿適逢國變,遂留未歸,「佳人已歸 即於今日爲始。 董録 而出之。惟書法,不易一字。再加一序,以寓誅貶辨奸之論,討逆之檄、絶交之 沙吒 面 利」, 猶 未 還 剥 無 朝 日

## 八月

廿二日 十四日 爲寒山寺獺祭窮數 武林往哲遺編》前後集病中瀏覽,至今日而畢,得寒山寺詩七首、舊聞 十册,羌無故實,僅從王元文《北溪詩稿》得楓橋 詩一首解 兩則。 嘲

廿三日 檢《穰梨館過眼録》,得僧明綱即祁六公子所繪寒拾圖。 又文待詔《姑蘇十景册》有 楓 橋詩。 《志

象》、《志事》皆可增一故實,甚喜。

廿五日 又從《天禄琳琅》、日本《經籍訪古志》各得《寒山子詩 》解 題各 通。

廿八日 從袁穀廉《邃懷堂集》得《楓橋》一首。 又《秋鐘》斷句可補寒山

廿 九日 重 |檢《曝書亭集》,得楓橋詩一首。又從吴曾《能改齋漫録》得「半夜鐘」| 條,可與《苕溪叢話

互證。

初二日

檢《崇文總目》:

「《寒山子詩》七卷。」竹垞據《唐志》校,上有「釋智昇對」四字,此爲諸本所無。新

得未明之義,俟詳考。

初五日 繕《志》稿至第二卷,重訂《志碑》篇,頗有所增纂。

檢《别下齋叢書》,從翁雒《小蓬海集》得題徐虹亭《楓江漁火圖》詩,可補《志事》一

則。

初六日

初七日 前删《志塔》一篇,今增《志産》篇,爲第七。

初九日 作《寒山寺志後序》一首。

初十日 健忘,不能無改竄也。 客秋因《寒山寺志》事,與何筱雅太守郵筒不絶,擬附一書於序後,而其稿已佚,重録出之,師丹

十四日 翁雒《小蓬海遺詩》增纂兩則 昨據明《倪文僖集》暨阮文達《石渠隨筆》,補《寒山寺志・志事》兩則。 今日又據《南州草堂集》、

十六日 刻,此識語爲贅。 補纂《志事》三則,皆據近人詩牘。 申甫、筱雅兩同年所開示後序之後,又撰附識一 則,若不即付

十八日 又補撰《志事》一 則

十九日 《寺志·志詩》篇小序未愜,重撰一首。

六六


# 校記

〔一〕 知吴縣事葛辡立

按: 碑本作「賜進士知常熟縣上虞葛桷記」,詳《志碑續補》。

録

附



泰州舊事摭拾 至順鎮江志

龍江船廠志 丹午筆記・吴城日記 宋平江城坊考 吴歌·吴歌小史 南明史料(八種)

五石脂

寒山寺志 吴郡歲華紀麗 吴郡志 吳郡圖經續記 吴地記 吴越春秋 過雲樓書畫記 吴門表隱 吴趨訪古録 清嘉録 太湖備考 白城烟水

